

Xtiidxa za'ca Jesucristo ni bacaa San Lucas

Zapoteco de Santa Catarina Albarradas

Versión preliminar
Mayo de 2022
25 ejemplares
ztn

La ilustración de la pasta es propiedad de
© 1997 Foreign Mission Board S.B.C.
y © 1997 New Tribes Mission,
y es usada con el permiso correspondiente.

Licencia Creative Commons
(Reconocimiento-NoComercial-SinObraDerivada 4.0 Unported)

- Compartir — Usted es libre de copiar, distribuir y comunicar públicamente la obra.
- Reconocimiento — Debe reconocer los créditos de la obra.
- No comercial — No puede utilizar esta obra para fines comerciales.
- Sin obras derivadas — No se puede alterar, transformar o generar una obra derivada.

<https://creativecommons.org/licenses/by-nc-nd/4.0/deed.es>

Xtiidxa za'ca Jesucristo ni baca San Lucas

Rixa'la Lucas tijbi guiichi loj Teófilo

1 Zienri bejn ba been guayan gucuaa ni gojca che guzu Jesús con dunoj,² zegagajcacazi baliiri bejn dunoj, bejn babiaari ni ben Jesús che galodo'ti, ne ni guzajcama, choru gutie'charma Xtiidxa Diosi.³ Yela zani, naj Lucas babazajchan loj xta xhia'xquie, yela zani naladxin gucuanan xnejzaduru para lij, Teófilo,⁴ deen gagabiaalu gualica ni babaliirma lij.

Rusin tijbi ángel gala Juan

⁵ Che tiempa gunebiaa Herodes xhidibi niza Judea, guxhu tijbi bixioza brelaj Zacarías, bachagama tijbi cuاري bixioza ni najca xbejn Abías. Xgunaa Zacarías brelaj Elizabet, nazama loj xdiaa bixioza brelaj Aarón.⁶ Groparma guban zagadxe niza loj Diosi, choru bazoobarma grazi ni re Diosi lojrma loj Xtiidxama.⁷ Peri di guxhudiga xi'nurma, deen Elizabet dirudiga xiinma, choru yana gropazirma ba na bejn gola.

⁸ Tijbi dxej badoolari bixioza lada naxhua Zacarías güinrma mandadu len xhidoo ro'o Jerusalén.⁹ Zega najca xcostumbriri bixioza nina, bazaala suerti loj lasa'rma deen chugarma nadoola chigudxe'e guxayaala len xhidooro'o yee, ne Zacarías badoola gudxe'n nina.¹⁰ Choru la'ti cagudxe'ma guxayaala nina, graziri bejn zua'a lulia'a cabejdxirma Diosi.¹¹ Dxelacazi baliloj tijbi xángel Diosi loj Zacarías zua'ma ladu xnejza cue'e altar lada cagudxe'ma guxayaala nina.¹² Che guna Zacarías ángel nina, bidxebidoxama, xerla güinma.¹³ Peri re ángel nina lojma:

—Zacarías, yadi rdxebilu, deen babaqueexhdiaga Diosi ni rniabalu. Chu'u xi'n xgunaalu Elizabet, bindoo nixhoo gajcami cueelajlu laami Juan.¹⁴ Yabaadoxalu, choru ne zienri bejn zabaa che gala bindoo nina,¹⁵ deen biin lasajca gajcami loj Diosi. Di zia'digami vino, nega tijbi ni gusidxi laami, xtala che gadimi gala bazua'ne xEspíritu Diosi laami.¹⁶ Por laami

zienri bejn Israel yabi'i loj xtada Diosrma.¹⁷ Laami ned
loj bejn guixa'la Diosi, chu'u xEspíritu Diosi ladimi, chor
zajpami yelarnebiaa zega Elias, bejn bate Xtiidxa Diosi lojri
bejn, yabe'quidxeemi dadari con xi'nrma, gulimi bejn ni di
rucueexhdiaga, guzusinmi bejnri che xhi'ta Mesías.

¹⁸ Reti Zacarías loj ángel nina:

—¿Xena gagabiaan la guali ni nalu? Deen naj con da
bengunaan banajcanu bejn gola.

¹⁹ Choru re ángel nina:

—Naj najca ángel Gabriel, zua'n dalanti loj Diosi, laama
guxa'la naj deen gusinan lojlu diidxaza'ca yeri.²⁰ Peri yan, la
dibiililadxilu dadiidxan, yaya'nlu gojpa, dizajcadia xhinielu
xta guidxin dxej gala xi'nlu.

²¹ La'ti cayajcari nine, graziri bejn rga'a lulia'a nina
cabejzarma Zacarías, yela cayagalaadoxama len xhidoo nina.

²² Che bariaa Zacarías len xhidoo yee diru rajcadia xhiniema,
ganaxa sen rinma deen babaya'nma gojpa. Choru gogabiaarma
xhu'u xe gunama len xhidoo nina.

²³ Che baza'a dxej ni ben Zacarías mandadu len xhidoo nina,
zia lidxima. ²⁴ Che guderি dxej nina, guxhu xi'n xgunaama
Elizabet, jaiy bee di biriaacazi lidxima, rema:²⁵ “Se najca ni
benne Diosi naj lenri dxej yee, deen yadiru guze'ri bejn naj.”

Rusin tijbi ángel loj María gala Jesús

²⁶ Che gojca xo'pa bee nuxi'n Elizabet, guxa'la Diosi ángel
Gabriel tijbi xyedxidoo Galilea la Nazaret,²⁷ deen chiganama
tijbi biungunaa la María. Ne ba xhu'lá tijbi nixhioo xhica'a
laami la José, zedami xdiaa David.

²⁸ Guxhu ángel nina lada zua'a María, rema:

—¡Dxan María, Diosi rubia lij zagadxe! Diosi sua'ne lij,
Diosi ba gule lij loj grari bejngunaa.

²⁹ Che guna María ángel nina, beendxia lojmi ni re ángel
yee, chorù rinmi xgaba yexa rema lojmi zani.³⁰ Choru re ángel
nina lojmi:

—María, yadi ridxebilu, deen lij ba gule Diosi.³¹ Chu'u
xi'nlu, chorù che galami cueelajlu laami JESÚS.³² Laami
bejn lazajcadoxa gajcami, xhinieri bejn laami Xi'n Diosi bejn
xhu'u yabaa. Güin duxtada Diosri laami rey zega David

xyedagola guayajcama.³³ Laami güinnabiaa bejn Israelri, choru di gojcacazi chiloxa xyelarnebiaami.

³⁴ Choru re María loj ángel nina:

—¿Xenaga chu'u daxi'nan dichudiga bejn nixhioo ba guzuneen?

³⁵ Badxi'i ángel ninan rema:

—Por xEspíritu Diosi bejn xhu'u yabaa chu'u xi'nlu, con xyelarnebiaama gugajcuma lij xbalama. Ze'ti bindoo gala dixediga dola güinmi, choru xhinieri bejn laami Xi'n Diosi.

³⁶ Zanigajca lasa'l lu Elizabet banuxi'nma mazi banajcama bejn gola, ne reri bejn dizajcadiga chu'u xi'nma, yana bagojca xo'pa bee xhu'u xi'nma. ³⁷ Deen para Diosi dixecazi ni nacuan.

³⁸ Choru re María loj ángel nina:

—Diosi najca bejn rnebiaa naj, gajca zega banalu.

Choru ziati ángel yee.

Rigana María Elizabet

³⁹ Lenri dxej nina la biajticazi María tijbiri yedxi ni rga'a lada dajn Judea. ⁴⁰ Che guxhumu lidxi Zacarías, bagajpadiozimi Elizabet. ⁴¹ Che bin Elizabet chia'mi, la baniibigajca bindoo xhu'u lenma, choru guxhu xEspíritu Diosi luxtooma xhidibilagaa. ⁴² Choru gune Elizabet naya jcharo'o rema loj María:

—¡Diosi ruza'ta maziru zagadxe lij loj grari bejngunaa ne bindoo xhu'u lenlu! ⁴³ ¿Chuza naj ze'ti zida gana xna da Diosin naj? ⁴⁴ Deen che bagajpadiozilu naj la baniibigajca da bindoon yela tantu rabaami. ⁴⁵ Xechaba lij biliiladxilu zajca zega basin Diosi lij.

⁴⁶ Choru re María:

Ruzajtan Diosi zagadxe,

⁴⁷ rabaanedoxan laama, deen rajcanema naj.

⁴⁸ Deen mazi bin rinzi xmandaduma najcan, ba
gulema naj.

Choru desde yana zanari bejn naj:

“Xechabaa lij.”

⁴⁹ Deen Diosi bejn ni rnebia, xoro'o na ni babeenma
por naj,

choru naya nali na lajma.

⁵⁰ Ganaxa rayama bejn ruzooba Xtiidxama.

⁵¹ Xoro'o na ni babeenma con xyelarnebiaama, basie'nma xgabari bejn rin bejn naro'o.

⁵² Gudobacama yelarnebiaa lojri bejn rnebiaa, choru lojri bejn dirzobaloj badeema yelarnebiaa.

⁵³ Badeema yelanaza'ca lojri bejn biaadxa yelarau, bedari bejn dan dixecazi basa'nrema laarma.

⁵⁴ Choru gojcanema bejn Israelri, xbejnma, di goolaladxidiama nayama laarma,

⁵⁵ zegati rema loj duxbejngolari

Abraham choru xdiaama, tibilaya yayama laarma.

⁵⁶ Choru baya'nne María Elizabet zega choona bee, choru babi'mi zia lidximi.

Rajla Juan

⁵⁷ Che bidxin dxej gola xi'n Elizabet, bindoo nixhioo gojcami. ⁵⁸ Choru che gogabiaari lasa'ma conri xbesinma Diosi baya laama, babaanerma laama. ⁵⁹ Che bagojca bindoo nina tuxman, binerma laami guxumi sen ni ruri bindoo nixhioo Israel. Guyenrma nibelajrma laami Zacarías zega la xtadami, ⁶⁰ peri gune xnami rema:

—Di zareelajdiami zani. Rayala grelajmi Juan.

⁶¹ Choru rerma lojma:

—¿Yexaga greelami Juan? Dichudiari lasa'l lu la zani.

⁶² Choru con sen gunabadiidxarma loj xtada bindoo nina chu renma greelajmi. ⁶³ Choru gunabama tibilia'a tablu, bacaama lojn: “Juan greelajmi.” Choru rindxia loj grari bejn rga'a nina. ⁶⁴ Lugoraze'gajca gojca bane Zacarías, choru guzuloj ruza'tama Diosi zagadxe.

⁶⁵ Graziri xbesinma badxia lojrma, choru graziri yedxi rga'a ladari dajn Judea gogabiaa ni gojca. ⁶⁶ Choru gracaziri bejn ni gogabiaa, rniabadiidxa loj lasa'rma rerma:

—¿Chuza gajca bindooye che ni'simi?

Deen Diosi rubiaa zagadxe laami.

Ni gune Zacarías

⁶⁷ Zacarías, bejn na xtada bindoo nina guidxa xEspíritu Diosi luxtooma, guzloj rniema rema:

- ⁶⁸ Naza'ca na duxtada Diosri bejn rnebiaa Israel,
yela biidaganama dulaari, choru biidagalaama dulaari
deen najcari xbejnma.
- ⁶⁹ Guxaalama tijbi bejn ni rajpa yelarnebiaa deen
gulaama dulaari.
- Zi'tama loj xdiaa rey David, bejn najca xbejn Diosi.
- ⁷⁰ Zega gunéri bejn rate Xtiidxa Diosi lojri bejn,
promesa ni ben Diosi lojrma, bejn gubanri
zega renma:
- ⁷¹ Yabeema dulaari lojri bejn ni ridxe'chi dulaari,
ne lojri bejn xhu'xian dulaari,
- ⁷² yayama duxbengolari
choru dizaalaladxitigama promesa ni benma.
- ⁷³ Ne na promesa ni benma loj duxbejngolari Abraham:
- ⁷⁴ Yabeema dulaari lojri bejn ni ridxe'chi dulaari
deen gajca yeenri xmandaduma sin yelardxebi,
- ⁷⁵ Xhibanri yeenri zega renma gracazi dxej ni xhibanri.
- ⁷⁶ Choru lij xi'n, xhinerma lij xbejn Diosi bejn xhu'u
yabaa, bejn rate Xtiidxa Diosi lojri bejn.
Deen nedilu loj bejn guixaala Diosi deen güin cuentari
bejn laama che xhi'tama,
- ⁷⁷ deen gulilu xbejnma deen gagabiaarma gajca
xdolarma perdón, choru xena laarma lo
xcastigarma.
- ⁷⁸ Deen duxtadari rayadoxama dulaari ze'ti
guixaala xi'nma, bejn na zega xbacha'a gubidxa deen
gusinima dulojri,
- ⁷⁹ deen guixalamama xhijquiri bejn ni se nejza mala, bejn di
naban xnejza zega ren Diosi, gulima dulaari
yadxoori loj xnejzama
deen xhibanri yidxu'ri zagadxe sin yadijliri.
- ⁸⁰ Guni'si bindoo nina Diosi badee mazru xquelariejnmi.
Gulezami loj dajn bidxi xta bidxin dxej gunemi Xtiidxa Diosi
lojri bejn Israel.

Rajla Jesús

2 Lojri dxejze'e gunebiaa rey César Augusto xhigaba
grari bejn rnebiaama. ²Che galodo'ti che bigabari
bejn, Cirenio najca gobernador Siria. ³Graziri bejn

rayala yaxhiaj ladxirma deen xhigabarma.⁴ Yela zani biriaa José yedxi Nazaret ni riga'a niza Galilea, biajma xta Belén ni riga'a Judea, lada gola rey David deen loj xdiaa rey David zedama.⁵ Binema María xgunaama deen xhigabarma, ne nuxi'nmi.⁶ La'ti zua'rma Belén, bidxin dxej gojla bindodo nina.⁷ Nina gola xi'n galo María. Choru bati'pima bindoo nina lajdi, gudixama laami lada ru ni rauri be yi'xi, deen diru bidxejladiga lanio lada naya'nrma.

Bidxinri xángel Diosi lada zua'ri bejn rajpa xili

⁸ Gajxa Belén rga'ri bejn, dajn cayajparma xili, rdyeela raparma laarba.⁹ Dxelacazi baliloj tijbi xángel Diosi lojrma, naxhinidoxa basini xxhi Diosi lada rga'rma, choru bidxebidoxarma.¹⁰ Peri re ángel nina lojrma:

—Yadi rdxebidu deen laana ziela gusin ni güen lojdu, yela zani yabaa grari bejn.¹¹ Yan, Belén, ladxi rey David, bagojla bejn ni gulaa lejtu, láma Cristo, laama najca bejn rnebiaa.¹² Choru para yaxhinbiadu laama, nadi'pima lajdi naga'ma lada ru ni rauri bee.

¹³ Dxecalacazi balilojri ziendoxari ángel cue ángel gal o nina, ruza'tarma Diosi zagadxe rerma:

¹⁴ ¡Gola guza'ta zagadxe Diosi xhu'u xanyabaa, choru loj yidxilij surma zagadxe zega caxhinrma ni ren Diosi!

¹⁵ Che ziari ángel nina xanyabaa, re loj lasa'ri bejn rajpari xili nina:

—Cho'ri Belén chogabiaari ni gojca, zega babasin duxtada Diosri dulaari.

¹⁶ Resi zerma, ne badxejlarma María con José, con bindoobezu nina naga'mi lada ru ni rauri bee.¹⁷ Che gunarma bindoobezu nina, rirma diidxa ni reri ángel nina lojrma xcuenta bindoobezu yee,¹⁸ gracaziri bejn baqueexhdiaga badxiadoxa lojrma ni reri bejn rajpa xili nina.¹⁹ Peri María, rudxe'cheema luxtooma grazi ni nine, choru rintiman xgaba.²⁰ Choru babi'ri bejn rajpa xili nina, rusa'tarma xquelalasajca Diosi, rudeerma xquixti loj Diosi por gra ni babiaarma con ni baqueexhdiagarma, deen gojca zega re ángel nina lojrma.

Binerma Jesús len xhidoro'o Jerusalén

²¹ Che gojca tuxman gojla bindoo nina, badxe'rma laami sen ni ruri bindoo nixioo Israel, choru guleelajrma laami Jesús, zega re ángel nina loj María che gadi Jesús gagaxej lenmi.

²² Che baza'ri dxej ni ben María zega rinri bejngunaa che ru xi'nрма zega rnebiaa xley Moisés, binerma bindoo nina len xhidoro'o Jerusalén, loj Diosi. ²³ Benrma zani deen loj xley Diosi ca: "Grari bindoo nixhoo ni rajla gal o banajcarimi para Diosi." ²⁴ Choru binegajcarma gon para Diosi zegagajca rnebiaa xley Moisés: rayala chinerma tio'pari dojza o tio'pari paloma.

²⁵ Tiempa ze'e rbeza tijbi bejn yedxi Jerusalén, bejn laa Simeón. Najcama bejn za'ca, choru renma Diosi, rbejzama bejn ni gajcaneri bejn Israel. Choru zua'ne xEspíritu Diosi laama. ²⁶ Por Espíritu nina gogabiaama di zejtinezadigama xta gubiaama Cristo, Bejn guixaala Diosi. ²⁷ Choru por xEspíritu Diosi bijma len xhidoro'o Jerusalén. La'ti xhu'ma len xhidoo nina, bidxin José con María, bidxinnerma Jesús deen güinrma zega re loj ley, ²⁸ choru gudiidxi Simeón bindoobezu nina, guzuloj ruza'tama Diosi zagadxe rema:

²⁹ Yanaru Dada, ba zajca gulaalu guejtin sin yelarza'a,
Deen bagojca zega nalu, najcan bejn rin xmandadulu.



Copyright © Global Recordings Network. Used with permission.

³⁰ Deen con lon bagunan bejn ni gulaa dulaari choru
günma dulaari perdón.

³¹ Deen guxa'lalu laama loj grari bejn rga'a yidxilij.

³² Laama na xni ni gusini lojri bejn ni di najca bejn Israel,
najcagajcama xni gusiniza lojri bejn Israel.

³³ José con xniaa Jesús badxiadoxa lojrma ni
baqueexhdiagarma ni re Simeón xcuenta bindoobezu yee.
³⁴ Choru badeema diidxa za'ca para bindoo nina, choru rema
loj María xniaa Jesús:

—María, Diosi bagule bindoobezu yee deen por laami
zienro'ri bejn Israel laa loj xdola, peri zienrma yaya'n loj
xdola. Zidaguliimi bejnri cóm ni ruladxi Diosi, peri zienri
bejn dizendigarma laami. ³⁵ Zani gagabiamma xena na xgaba
tibigajrma, beda lij María zega tijbi espada chezi luxtoolu che
gajcari nine.

³⁶ Ninagajca zua'a tijbi bejngunaa yu'xa lama Ana, rudeema
Xtiidxa Diosi lojri bejn, xtadama breelaj Fanuel, zi'tama
loj xfamilia Aser. Naquie'nma che bachiliaama, gadxijzazi
gulejzane xnixhiooma. ³⁷ Ba gojca tapagajlatapijza baya'nma
bizejbi. Dxejzi yeela xhu'u gadiaama len xhidoro'o yee,
rniaaba rbejdxima loj Diosi choru rcueezati rauma tibida'an.
³⁸ Laagajca goraze'e bidixinma, guzuloj rudeema xquixti loj
Diosi choru ruza'tama bindoodo nina loj grari bejn ni cabejza
guixa'la Diosi tijbi bejn ni gulaari bejn Jerusalén.

Rabi'rma Nazaret

³⁹ Che ba beenrma grazi ni rnebiaa loj xley Diosi, babi'rma
zia ladxirma Nazaret ni riga'a niza Galilea. ⁴⁰ Xlialazi cani'si
bindoo nina, guxumi gojla, gojcami nasin, choru Diosi
rusa'tama laami zagadxe.

Xhu'u Jesús len xhidoro'o Jerusalén

⁴¹ Gazobijza riajri xtada Jesús Jerusalén lanij Pascu. ⁴² Che
basa'a Jesús chibitio'pijza, bineri xtadami laami lanij, zega
najca costumbri nina. ⁴³ Che ba gude lanij nina, bazari
xtadami zia ladxirma. Ne nega di gogabiaarma baya'nla Jesús
Jerusalén. ⁴⁴ Naladxirma nemi naxhua lojri bejn ni ziganerma.
Zani guzarma tijbi dxej. Peri che baxhiilirma laami lojri bejn



Copyright © Global Recordings Network. Used with permission.

San Lucas 2:41-50

rajca lasa'rma choru lojri bejn ni numbiarma,⁴⁵ dichudiga laami naxhua lojrma. Choru babi'rma ziarma Jerusalén stijbi, zigadiilirma laami.

⁴⁶ Ne ni báyondxejru badxejlarma laami xhu'mi len xhidoro'o Jerusalén, zojbami galayri mextru rajca ley, caguqueexhdiagami laarma, choru canabadiidxami lojrma.

⁴⁷ Grari bejn ni caguqueexhdiaga ni rniemi rindxia lojrma yela nasindoxami choru rajca radxi'mi xtiidxarma.⁴⁸ Che gunari xtadami laami, rindxia lojrma, choru re xnami:

—Xi'n, ¿yexa basajcalu dunoj zani? Xtadalu con naj babanijtodoxanu lij.

⁴⁹ Choru babi'i Jesús remi:

—¿Yexaza raxhiiliduj naj? ¿Di ragabiaadu rayala güinan xchiin da Dadan ya?

⁵⁰ Peri di gogania'diarma xe ren gue ni remi lojrma.

⁵¹ Choru babi'ganerma laami zia ladxirma Nazaret, choru gracazi diidxa re xtada xniami ruzoobamin, choru xniaami gracazin rudxe'chee luxtooma.⁵² Zinua zinijsi Jesús choru zinua caxhu xquelariejnmi. Rabanee Diosi laami choru neri bejn rabanee laami.

Rizuloj Juan ruliima Xtiidxa Diosi

3 Che gojca chieenijza rnebiaa rey Tiberio César rey maziru zobaloj Roma, Poncio Pilato rnebiaa niza Judea, Herodes rnebiaa Galilea, bijchima Felipe rnebiaa Iturea ne Traconite, bejn la Lisanias rnebiaa Abilinia, ²choru Anás con Caifás najcarma bixioza rnebiaa grariziri bixioza. Lenri dxej nina gune Diosi Juan xi'n Zacarías, loj dajn bidxi. ³Choru gude Juan gracaziri yedxi ni riga'a gaxa rua'a xhiigu Jordán, rema lojri bejn guza'nrma ni mala najcarma, choru xhirobanijsarma, deen güin Diosi xdolarma perdón. ⁴Zani gojca cumplidu ni bacaa Isaías bejn bate Xtiidxa Diosi lojri bejn loj tijbi libru lada rema:

Nen chia'a tijbi bejn loj dajn bidxi rema:

“Gola yaxhinza'ca xnejza duxtada Diosri,
gola guixala tijbi nejza nalí.

⁵Grari la'chi rga'a yejta yadxarin, choru dajnri,
Conri loma yayajcarin tibiloj,
neri nejza nalejcu yayacarin tibili,
Yadxari nejza ni di najca tibiloj.

⁶Grari bejn yidxilij gubiaa Bejn guixaala Diosi
deen gulaama dulaari lo gra ni mala.”

⁷Che biriaa zienri bejn deen gurobanijsa Juan laarma,
rema lojrma:

—¡Xepaza bejn mala lejtu zega be'llo dojxa! ¿Chu na
lojdu zalaadu loj castigaro'o ni zeda? ⁸Gola xhiban zagadxe
deen yen gualicadu babidxaadu, choru di gue loj lasa'du:
“Dunoj zio'panu xdiaa Abraham”, deen naj rniin lojdu xta
xhiaj yeri zajca güin Diosi xdiaa Abraham. ⁹Choru bejn
ni dizinala xnejza Diosi zega rayalan, ba zidxingajxa güin
Diosi laama zega rijnne bejn yaga ni di rca, rtiigaman choru
ruze'quiman.

¹⁰Choru gunabadiidxarma lojma, rerma:

—¿Xeza rayala yennu?

¹¹Badxi'i Juanin rema:

—Bejn rajpa tio'pa xaba, rayala gudema tijbin loj bejn
ni di rajpan. Zanigajca bejn ni xhu'u ni rau, rayala gudema
ta'nin loj bejn ni riaadxan. ¹²Neri bejn ni ruquixa impuesto
bidxinrma deen xhirobanijsarma. Choru gunabadiidxarma loj
Juan, rerma:

—Mextru, dunojza, ¿xe rayala yeennu?

¹³ Badxi'i Juanin, rema:

—Di guquijxadu maziru loj ni rayala guquijxadu.

¹⁴ Xhu'ri soldado gunabadiidxarma lojma rerma:

—Dunojza, ¿xe rayala yeennu?

Badxi'man rema:

—Di cueexuuudu xe xeen bejn, yadi guchebidu laarma o guti'pidu laarma ni dibeenrma, gola gajca conforma ni riyixarma lejtu.

¹⁵ Choru bejnri la rengajcarma gagabiaarma laa Juan na Cristo, ¹⁶ peri rema loj grazirma:

—Naj rurobanijsan lejtu con nijsa. Peri zi'ta tijbi bejn ni gurobanijsa lejtu con xEspíritu Diosi ne con bajla. Laama najca bejn mazru zobaloj lon negala loj xgurachima di rayala gaxequin. ¹⁷ Zega rayaa trigo zani güinnema bejnri, deen bejn zinala Xtiidxa Diosi laarma rayala ch'u lada rnebiaa Diosi, choru bejn ni di zinala Xtiidxama guixaalamala laarma loj bajla ni di raxhiicazi.

¹⁸ Zani gunenee Juan laarma, choru ne conri diidxa garen basinia'ma laarma, ruliima laarma Xtiidxa za'ca Diosi.

¹⁹ Zanigajca rdilima rey Herodes deen yela cua'ma Herodías xgunaa bijchima Felipe, choru ne por gracazi ni mala ni ba beenma. ²⁰ Peri di baqueexhdigadia Herodes Xtiidxa Juan; lugardi laan, zega beenlama stijbi ni mala: badxe'ma Juan ladixixhiiba.

Rirobanijsa Jesús

²¹ Che caguroobanijsa Juan bejnri, ne Jesús barobanijsama. La'ti cabejdxi Jesús loj Diosi, bixala xanyabaa, ²² biejta xEspíritu Diosi zega tijbi paloma xta laama. Choru binjrma diidxa naza xanyabaa, ren:

—Lij najca da xi'nan ni rendoxan, choru ni rabaanedoxan.

Xbejn gojcala Jesús

²³ Zega galabichi yijza xhu'u Jesús dxe guzloj rusinia'ma Xtiidxa Diosi. Naladxiri bejn xi'n José laama. José gojca xi'n Elí, ²⁴ Elí gojca xi'n Matat, Matat gojca xi'n Leví, Leví gojca xi'n Melqui, Melqui gojca xi'n Jana, Jana gojca xi'n José,

²⁵ José gojca xi'n Matatías, Matatías gojca xi'n Amós, Amós

gojca xi'n Nahúm, Nahúm gojca xi'n Eslí, Eslí gojca xi'n Nagai,
²⁶ Nagai gojca xi'n Maat, Maat gojca xi'n Matatías, Matatías
 gojca xi'n Semei, Semei gojca xi'n José, José gojca xi'n Judá,
²⁷ Judá gojca xi'n Joana, Joana gojca xi'n Resa, Resa gojca xi'n
 Zorobabel, Zorobabel gojca xi'n Salatiel, Salatiel gojca xi'n
 Neri, ²⁸ Neri gojca xi'n Melqui, Melqui gojca xi'n Adi, Adi gojca
 xi'n Cosam, Cosam gojca xi'n Elmodam, Elmodam gojca xi'n
 Er, ²⁹ Er gojca xi'n Josué, Josué gojca xi'n Eliezer, Eliezer gojca
 xi'n Jorim, Jorim gojca xi'n Matat, ³⁰ Matat gojca xi'n Leví,
 Leví gojca xi'n Simeón, Simeón gojca xi'n Judá, Judá gojca
 xi'n José, José gojca xi'n Jonán, Jonán gojca xi'n Eliaquim,
³¹ Eliaquim gojca xi'n Melea, Melea gojca xi'n Mainán, Mainán
 gojca xi'n Matata, Matata gojca xi'n Natán, ³² Natán gojca xi'n
 David, David gojca xi'n Isaí, Isaí gojca xi'n Obed, Obed gojca
 xi'n Booz, Booz gojca xi'n Salmón, Salmón gojca xi'n Naasón,
³³ Naasón gojca xi'n Aminadab, Aminadab gojca xi'n Aram,
 Aram gojca xi'n Esrom, Esrom gojca xi'n Fares, Fares gojca xi'n
 Judá, ³⁴ Judá gojca xi'n Jacob, Jacob gojca xi'n Isaac, Isaac
 gojca xi'n Abraham, Abraham gojca xi'n Taré, Taré gojca xi'n
 Nacor, ³⁵ Nacor gojca xi'n Serug, Serug gojca xi'n Ragau, Ragau
 gojca xi'n Peleg, Peleg gojca xi'n Heber, Heber gojca xi'n Sala,
³⁶ Sala gojca xi'n Cainán, Cainán gojca xi'n Arfaxad, Arfaxad
 gojca xi'n Sem, Sem gojca xi'n Noé, Noé gojca xi'n Lamec,
³⁷ Lamec gojca xi'n Matusalén, Matusalén gojca xi'n Enoc,
 Enoc gojca xi'n Jared, Jared gojca xi'n Mahalaleel, Mahalaleel
 gojca xi'n Cainán, ³⁸ Cainán gojca xi'n Enós, Enós gojca xi'n
 Set, Set gojca xi'n Adán, choru Adán za gojca xi'n Diosi.

Been bejndxaba Jesús prueba

4 Guidxa xEspíritu Diosi luxtoo Jesús che bazama xhiigu
 Jordán, choru bine xEspíritu Diosi laama loj dajn bidxi.
² Nina guzujma tiaa dxej tiaa yeela, choru been bejndxaba
 laama prueba. Dixecazi gudauma lojri dxej ze'e choru
 gulaandoxama. ³ Choru re bejndxaba nina lojma:

—Baali gualilu najcalu xi'n Diosi, gunebiaa yayajcari xhiaj
 yee yedaxtilij.

⁴ Badxi'i Jesús Xtiidxama rema:

—Loj Xtiidxa Diosi re: “Di ganaxadia yedaxtili xhibanne
 bejn, zabangajcama con gra Xtiidxa Diosi.”

⁵ Choru bine bejndxaba nina laama xhijqui tijbi dajn yaro'o, len tibiguejtidoo basienlojma laama grari nación riga'a loj yidxilij. ⁶ Choru re bejndxaba nina lojma:

—Gunedxan lij grazi yelarnebiaa ne yelnaza'ca ni xhu'u lojri nación yee deen daxeenrinan, choru zajca gudenan chutizi bejn renan. ⁷ Baali guzu xibilu lon, yaxhinbiaalu naj zega Diosi, gracazi nine gajca xeenlu.

⁸ Badxi'i Jesúsn rema:

—Loj Xtiidxa Diosi re: “Tibizi loj xtada Dioslu guzu xibilu, choru tibizi lojma güinlu mandadu.”

⁹ Choru bine bejndxaba nina laama Jerusalén, bazujma Jesús xhijqui xhidoro'o Jerusalén, lada na maziru yaa. Choru rema lojma:

—Baali gualijlu najcalu xi'n Diosi, godaya'ga xhijquiye xta luxhuj, ¹⁰ deen loj Xtiidxa Diosi re:

Diosi guixaala xángelma para gajparma lij.

¹¹ Yanaazarma lij con yaarma,

Deen yadi chitin xhia'lú lojri xhiaj.

¹² Badxi'i Jesúsn rema:

—Regajca loj Xtiidxa Diosi: “Di rudxe'lú prueba xtada Dioslu.”

¹³ Che dirubadxejla bejndxaba nina xena güinma prueba Jesús, guleenladxima laama tijbi tiempa.

Rizuloj Jesús ruliima bejn Galileari

¹⁴ Badxin Jesús niza ladu Galilea, guidxa xEspíritu Diosi luxtooma, choru guiraziri yedxi rga'a niza Galilea ruza'ta laama. ¹⁵ Ruliima bejnri len xhu lada rusiidirma Xtiidxa Diosi ni rga'a niza nina, choru guirazirma ruza'ta laama zagadxe.

Rabi'i Jesús Nazaret

¹⁶ Biaj Jesús Nazaret luyedxi lada guni'sima. Dxej ni raziladxirma dxej sabadu, gux huma lada ruchaga lasa'ri bejn Israel zega naya'ma. Choru guzulima baliima Xtiidxa Diosi.

¹⁷ Baderma yi'chi ni bacaa Isaías bejn guayajcala, bejn ni bate Xtiidxa Diosi lojri bejn. Che guxalama loj yi'chi nina badxejlama lada re:

¹⁸ xEspíritu duxtada Diosri zua'ne naj, deen laama
gule naj deen ganen Xtiidxa za'cama lojri
bejn probi.

Guxaalama naj deen ga'caneen bejn zua'a nayari,
guxa'lama naj deen gusinan lojri bejn
xena laarma,

Choru yaxalan lojri bejn ni di rni loj,

Choru ne deen ga'caneen bejn cazagadiajri.

¹⁹ Deen gusinan ba bidxin dxej ni gajcane Diosi laarma.

²⁰ Choru batipi Jesús yi'chi nina, badeeman loj bejn ni
rajcane len xhidoo nina, choru gurejma. Gracaziri bejn ni rga'a
nina rubiaadxijchirma laama. ²¹ Guzlojma rnienema laarma,
rema:

—Yan dxegajca bagojca zega ca loj Xtiidxa Diosi ni
babaqueexhdiagadu.

²² Gracazirma ruza'ta laama zagadxe, choru radxiadoxa
lojrma diidxa güen ni rniema. Choru rniabadiidxa loj lasa'rma,
rema:

—¿Di laadima najca xi'n José ya?

²³ Choru re Jesús lojrma:

—Ba ragabiaan zanadu naj diidxa ni re: “Doctor, basiajca
lijgajca”, choru zanagajcadu naj: “Ni babaqueexhdiaganu
bénlu yedxi Capernaum, beengajcan ye ladxilu.” ²⁴ Regajca
Jesús:

—Didxalicazi rniin, nega tijbi bejn rute Xtiidxa Diosi lojri
bejn, di rendiarma laama ladxima. ²⁵ Gola gusaaladxi lojri dxej
guban Elías, ziendoxari bejngunaa bizejbi xhu'u Israel, che di
been xhiaa choonyiza garola, choru guxhu gubijn gracazi lajta.
²⁶ Peri Diosi diguxa'ladijama Elías loj tijbi bejngunaa bizejbi
Israel, guxa'lama laama loj tijbi bejngunaa bizejbi ribeza
yedxi Sarepta gajxa yedxi Sidón. ²⁷ Nega lenri dxej ni gubajn
Eliseo bejn bate Xtiidxa Diosi lojri bejn, ziendoxari bejn rajca
yelaxhijdxa la lepra, peri nega tijbirma di basiajcama, tijbizi
bejn Siria basiajcama bejn laa Naamán.

²⁸ Che binri bejn rga'a len xhu lada rusiidirma Xtiidxa Diosi
ni re Jesús, bidxe'chidoxarma. ²⁹ Choru bisujrma guleerma
Jesús luyedxi nina, luyedxi nina rga'n xhijqui tijbi dajn.

Binerma laama rua'a yedxi nina deen gutaya'rma laama.

³⁰ Peri badee Jesús galayrma, choru ziatima.

Rabee Jesús bejndxaba luxtoo tijbi bejn

³¹ Biaj Jesús stijbi yedxi ni riga'a Galilea lan Capernaum. Nina rulima bejnri lojri dxej ni raziladxirma. ³² Choru rindxiadoxa lojрма ni rulimadeen rniema laarma con yelarnebiaa. ³³ Len xhu lada rusiidirma Xtiidxa Diosi nina xhu'u tijbi bejn ni xhu'u bejndxaba luxtoo, guridxidajma nayajcha rema:

—Basa'n dunoj, ¿xhe renlu con dunoj, Jesús bejn Nazaret? ¿Zi'tagunijtilu dunoj ya? Numbiaan lij, xi'n Diosi lij, dixecazi xdolalu.

³⁵ Choru rdilij Jesús bejndxaba nina, rema lojma:

— ¡Baseegu rualu, bariaa luxtoo bejn ze'e!

Choru bariaa bejndxaba nina luxtoo bejn nina, bareexhujma laama niza loj grari bejn rga'a nina choru dixecazi gojcama.

³⁶ Gracazirma badxia loj, choru re loj lasa'rma:

— ¿Xe re diidxa rniema? ¡Con yelarnebiaa ni rajpama rnebiaama yariaari bejndxaba luxtoori bejn!

³⁷ Choru xhidibizi niza nina rusa'tarma laama.

Rasiajca Jesús xnasuegra Pedro

³⁸ Che bariaa Jesús len xhu lada rusiidirma Xtiidxa Diosi, biajma lidxi Simón. Dxeze'e ragamala xnasuegra Simón, xhu'ma xliaa roo, choru gunaabarma loj Jesús yasiajcama laama. ³⁹ Choru guzurloj Jesús lada naga'ma choru gunema, gunebiaama yariaa xliaa nina, choru bariaan. Lugoraninagajca bixquiejma guzuloj rudeema ni raurma.

Rasiajca Jesús zienri bejn ragamala

⁴⁰ Che ba guyeezi gubijdx, gracaziri bejn ni rajpa bejn ragamala bejn rajcari xecaru yelaxhijdx, binerma laarma loj Jesús, choru guxooba yaama tibiga xhijquirma, zani basiajcama laarma. ⁴¹ Choru Jesús rulaagama bejndxaba xhu'u luxtoori bejn, rbidxidajrma rerma:

— ¡Lij najca xi'n Diosi!

Peri rdili Jesús bejndxaba ninari, di balaadigama ninierma, yela ragabiaarma laama naa Cristo.

Rulii Jesús Xtiidxa Diosi niza Galilea

⁴² Che barayela, biriaa Jesús luyedxi nina biajma lada dichucazi bejn rbeza. Peri baxhiiliri bejn laama, bidxinrma lada zua'ma, choru rerma lojma: baya'nne dunoj. ⁴³ Peri re Jesús lojma:

—Neri yedxi garen rayala chineen Xtiidxa za'ca Diosi xena najca xyelarnebiaama, deen yela zani guxa'lama naj.

⁴⁴ Zani binua Jesús gunema Xtiidxa Diosi len xhu lada rusiidirma Xtiidxama, xhidibizi niza Galilea.

Rniaazarma zientandari bejla

5 Tibiaja zua'a Jesús rua'a nijsa Genesaret, bidxin ziendoxari bejn, ruteedxi'chirma laama yela renrma gucueexhdiagarma Xtiidxa Diosi. ² Choru guna Jesús tio'pari barcu rua'a nijsanina, ni basa'nri bejn ni rniaaza bejla la'ti caxhiibirma guijxa ni rniaazarnerma laariba. ³ Choru guye'pima loj tijbi barcu nina, ni najca xeen Simón, choru gunabama lojma güinma güen gudxigaman galay loj nijsa. Choru gurejma, guzuloj caguliima laarma. ⁴ Che guyaaloj gunema laarma, choru rema loj Simón:



Copyright © Global Recordings Network. Used with permission.

—Bine barcu yee lada mazru naxijta, choru gola guzaala xguixadu deen xhiniazadu bejla.

⁵ Babi'i Simón rema:

—Mextru, gudeyeelacazi biennu dxiin, dichucazi bejla banaazaranu. Peri baali lij na, güinazanan zani.

⁶ Che bazaalarma guijxanina loj nijsa, ziendoxari bejla gunaazarma xta guzuloj cayaxuri guijxanina. ⁷ Choru beenrma sen loj xcompanierarma ni xhu'ri loj stijbi barcunina, deen chigajcanerma laarma. Biajrma, choru bacharma bejlaninari lo gropari barcunina xta ba nizeebirin xan nijsa. ⁸ Choru guna Simón Pedro ni gojca, bazu xibima loj Jesús, rema:

—Gudobaca lada zua'n dada, deen bejn dola naj.

⁹ Deen Simón conri bejn zua'nema nina badxiadoxa lojirma, yela zienro'o bejla gunaazarma. ¹⁰ Zanigajca bidxebiri Jacoboo con Juan, bejn ni najcari xi'n Zebedeo, najcarma xcompaniera Simón. Peri re Jesús loj Simón:

—Di ridxebilu, deen desde yana guto'palu bejnri para Diosi lugardi xhiniazalu bejla.

¹¹ Che babeerma barcuninari loj nijsa, basa'nrma gran, choru zinalatirma Jesús.

Rasiajca Jesús tijbi bejn rajca yelaxhijdxla la lepra

¹² Che zua'a Jesús tijbiri yedxi rga'a nina, bidxin tijbi bejn ni rajca yelaxhijdxla ni la lepra, xhidibicazima xhu'u yelaxhijdxanina. Che guna bejn yee Jesús, bazuj xibima basajba lojma xta luxhuj, gunabama lojma rema:

—Dada, baali zaquejbilu zajca yasiajcalu naj.

¹³ Choru balí yaa Jesús, baqui'ma laama, rema:

—Renan. Bayajca.

Lugoraze'gajca bayajcama. ¹⁴ Choru re Jesús lojma:

—Dichucazi loj guelu babayajcalu. Lojzi bixioza biaj deen gubiaama lij. Bine gon ni rayala chinelu, zega re Moisés deen gagabiaa gracaziri bejn babayajcalu. ¹⁵ Peri guixe guixe maziru care'cha ni caxhin Jesús. Choru rdo'pa ziendoxari bejn deen guecueexhdigarma ni rniema choru deen yasiajcamra bejn rajcari yelaxhijdxla. ¹⁶ Peri Jesús riajma lada dichucazi bejn, deen zani rbejdxima Diosi.

Rasiajca Jesús bejn ni nejti xcuerpa

¹⁷ Tijbi dxej cagulii Jesús bejnri, choru zojba tiooba choonri bejn fariseo conri mextru ni rajca ley. Zi'tarma grari yedxidoo ni riga'ri niza Galilea, niza Judea, choru Jerusalén. Zua'ne xyelarnebiaa Diosi laama deen yasiajcama bejn ragamalari.

¹⁸ Choru bidxin tiooba choonri bejn, bidxinnerma tijbi bejn nejti xcuerpa, naga'ma loj ni nalenjirma laama. Choru guyenrma nixhunerma laama len xhu nina deen niyixarma laama loj Jesús. ¹⁹ Peri di bidxejladiarma lada nixhunerma laama deen ziendoxari bejn rga'a nina. Choru guye'pinetirma laama xhijqui xhunina, guxalarma xhijquin, choru gulejtarma laama, galay lojri bejn lada zua'a Jesús. ²⁰ Che guna Jesús rliiladxipacari bejn nina laama, rema loj bejn ragamala nina:

—Lij bejn nixhioo, babenarin xdolalu perdón.

²¹ Peri mextru ni rajcari ley con ri bejn fariseo, guzuloj rinrma xgaba: “¿Chu najca bejn yee ze'ti rinma bejn maziru rzobaloj loj Diosi? Dichucazi rajca rijn perdón dola, tibidoozi Diosi.”

²² Peri gogabiaagajca Jesús xe xgaba rinrma, choru rema:

—¿Yexa rindu xgaba zani? ²³ ¿Con ni mazru di nacuan, guejpin: “Va benarin xdolalu perdón ya”, o guejpin: “Bixquie choru guzaa”? ²⁴ Peri yana, gulin lejtu naj Bejn guxa'la Diosi ra'pan yelarnebiaa loj yidxilij yee deen güinan perdón dolari.

Choru re Jesús loj bejn ragamala nina:

—Lojlu rniin, bixquie, baca'a ni go'talu loj Baxhiaj lidxiluj.

²⁵ Lugoraninagajca bixquiema niza loj grari bejn riga'a nina, balejsama ni go'tama loj choru zia lidxima ruza'tama Diosi zagadxe.

²⁶ Grazirma rindxiadoxa lojrma choru ruza'tarma Diosi zagadxe, choru bidxebidoxarma, rerma:

—¡Nadxiaalojdoxa na ni babiaari yana!

Rnie Jesús Leví

²⁷ Che gude grari ninee, biriaa Jesús gunama tijbi bejn ruquixa impuesto lama Leví, zojbama lada ruquixama. Choru re Jesús lojma:

—Danala naj.

²⁸ La bisujgajca Leví, guro'nladxima gran, choru zinalatima Jesús.

²⁹ Choru Leví beenma tijbi lanijro'o lidxima para Jesús, ne zienri bejn ruqujxa impuesto zua'rma nina, neri bejn garen zojba rua'a mexa con laama. ³⁰ Peri bejn fariseo conri mextru rajca ley guzulojrma rniexhixdarma xbejn Jesús rerma:

—¿Yexa ria'a raunedu bejn ruquixari impuesto, choru bejn naxhuari dolaj?

³¹ Badxi'i Jesúsn lojrma rema:

—Bejn nadanri di naquiindigarma doctor, bedari bejn xhu'u mala laarma naquiin doctor. ³² Naj di zieladigan parari bejn za'ca, zielan parari bejn dolaj, deen guchaarma xena nabanrma choru yadiru güinrma dola.

Rniabadidxarma loj Jesús por dxej ni di raurma

³³ Choru bejn fariseori conri mextru rajca ley rerma loj Jesús:

—Yexaga xbejn Juan, conri bejn fariseori xtalabiajadoxa rcueeza raurma choru rbjedxirma loj Diosi, nézari xbejnlú di rcueezacazi ria'raurma.

³⁴ Reti Jesús lojrma:

—Lejtu, ¿la zajca guedu lojri bejn rga'a lada caguchiliaarma, yadi gaurma la'ti zua'a bin nixhoo caguchiliaa nina ya? ³⁵ Peri zadxin dxej yaza biinnixhoo nina, choru cheze'ru gucue'za gaurma tibida'n.

³⁶ Choru regajcama:

—Dichudiga rtiiga tijbilia'a lajdi cuibi deen yacaaman loj tijbi lajdi yujxa, deen baali güinma zani, zuxiinma lajdi cuibi nina, choru lajdi cuibi yacaama nina di zaliiza'cadigan.

³⁷ Zanigajca dichudiga rga'a vino cuibi len tijbi xhidi yujxa, deen baali güinrma zani, zayiixuya'a vino cuibiyeet xhidi nina, choru gropazirin rixin ³⁸ Bedaza baali xhida'a vino cuibi len xhidi cuibi, zani dizaxindiga nega tijbin. ³⁹ Nega tijbi bejn ni ria'a vino xhu'u gojcala, dizuladxdigama vino cuibi, deen rema: “Laa vino ni bagogaxchej xhu'u laan na güenduru.”

Rajxuri xbejn Jesús xdoj trigo loj dxej ni raziiladxiri bejn

6 Tijbi dxej, dxej ni raziiladxiri bejn Israel, cadene Jesús xbejnma loj tijbi xhiniaa lada na'nrma trigo, rajxurma



Copyright © Global Recordings Network. Used with permission.

San Lucas 6:1-5

xdoj trigo nina, rutin yaarman, choru rautirman. ²Xhu'ri bejn fariseo rema:

—¿Yexa rindu ni di rayala güindu lojri dxej ni raziiladxiri bejn?

³Badxi'ti Jesúsn lojrma rema:

—¿Gadidu goola loj Xtiidxa Diosi ni ben David che gulaanne xcompanierama ya? ⁴Xena gux huma len xhu lajdi ni nagachenee lidxi Diosi, lada cua'ma yedaxtili ni banagale'ri choru gudaune xcompanierama ni di rayala niaurma,deen gananaxaziri bixioza rayala gau laan.

⁵Choru regajcama:

—Naj bejn guxa'la Diosi rajpan yelarnebiaa dxej ni raziiladxiri bejn.

Rasiajca Jesús tijbi bejn ba güijti yaa

⁶Stijbi dxej ni raziiladxirma, guxhu Jesús len xhu lada rusiidirma Xtiidxa Diosi, choru guzloj cagusinia'ma bejnri. Nina zua'a tijbi bejn ba güijti yaa ladu xnejza. ⁷Choru bejn fariseori conri mextru rajca ley zua'gule'chirma baali zasiajca Jesús loj dxejze'e, deen yadxejlarma xe ni mala guti'irma laama. ⁸Peri laama balaragabiaama xgaba ni caxhinrma, choru rema loj bejn ba güijti yaa nina:

—Bisuj, guzu galayrma.

Choru bisuj bejn nina guzujma galay.⁹ Choru re Jesús lojрма:

—¿Xe rayala güin bejn dxej raziiladxirma, ni güen ya o ni mala ya? ¿Gajcanelu xhiban bejn ya o gulaalu guejtima?

¹⁰ Babiaa Jesús grari bejn rga'a nina, choru rema loj bejn ba güijti yaa nina:

—Balí yaalu.

Baliti yaama, choru bayajcan.¹¹ Peri bejn fariseori conri mextru rajca ley bidxe'chidoxarma, choru guzloj re loj laza'rma xena güinnerma Jesús.

Rbe Jesús chibitio'pa xapostolma

¹² Lenri dxej ze'e biaj Jesús tijbi dajn lada gurejdxima Diosi, nina gudediyela guredxjima Diosi.¹³ Che baxhinii, gune xbejnma, choru gulema chibitio'parma bejn guleelajma apóstoles,¹⁴ Laarma najca:

Simón bejn gunegajcama Pedro, Andrés bijchi Simón, Jacoboo, Juan, Felipe, Bartolomé,¹⁵ Mateo, Tomás, Jacoboo xi'n Alfeo, Simón bejn bachaga lojri bejn cananistas,¹⁶ Judas bijchi Jacobo choru Judas Iscariote bejn ni ben ntrega Jesús.

Rulii Jesús xtalaro'ri bejn

¹⁷ Bayejta Jesús dajnnina conri bejn bagulema, choru badxinrma lada najca lula'chi. Choru nina bido'pa xtalaro'ri xbejnma, ne xtalaro'ri bejn Jerusalén, bejn Judea, bejn Tiro con Sidón, yedxi ni riga'ri gajxa rua'a nijsadoo. Bidxinrma deen gucueexhdigarma diidxa rniece Jesús choru deen yasiajcamla laarma yelaxhijdxa ni rajcarma.¹⁸ Neri bejn xhu'u bejndxaba luxtoo bayajcarma.¹⁹ Choru gracaziri bejn ren guqui'i laama, deen che ruqui'rma laama rayajcarma con xyelarnebiaama.

Xechabaari bejn

²⁰ Choru babiaati Jesús xbejnma rema:

—Xechabaa lejtu bejn probi, deen para lejtu najca xyelarnebiaa Diosi.

²¹ Xechabaa lejtu rliaandu yana, deen storu chigadxinladxidu.

²² 'Xechabaa lejtu roondu yana, deen storu yabaadoxadu.

²² 'Xechabaa lejtu che yidxe'chiri bejn lejtu, gulagarma lejtu, gulaadiidxarma lejtu, choru güinrma lejtu tijbi cue'e zega bejn mala yela rliiladxidu naj. ²³ Gola yabadoxa che yidxin dxej ze'e, deen güendoxa najca ni xhica'du xanyabaa, deen zanigajca beenri xbejndu bejn ni bate Xtiidxa Diosi lojri bejn.

²⁴ 'Probi lejtu bejn danri, deen lejtu yanazi rbezadu zagadxe.

²⁵ 'Probiza lejtu rigadxinladxi raudu yana deen storu xhiliaandu.

'Probi lejtu zega rabaadu yana deen storu sudu nayaa choru gondu.

²⁶ 'Probi lejtu che gracaziri bejn xhinieza'ca lejtu, deen zani beenri xbejngoladu, guneza'carma bejn ni reri rate Xtiidxa Diosi lojri bejn, né ganaxa diidxa muxtera rnierma.

Golaguen bejn rdxe'chi lejtu

²⁷ 'Peri naj rniin lejtu, zega caguqueexhdiagadu da diidxan: Gola guen bejn rdxe'chi lejtu. Gola gajca bejn za'ca lojri bejn xhu'xian lejtu. ²⁸ Bejn ni rixhi'ndxoona ni mala para lejtu, gola xhiniaaba loj Diosi gajcanema laarma choru bejn rniexhijdxo lejtu gola xhiniaba loj Diosi por laarma. ²⁹ Baali chu bejn chezi xajgalu, zega badeela stijbi ladun; baaliza churma cuexuu xchamarralu, balaadila xhica'rma ne xmangalu. ³⁰ Chutizi bejn rniaaba xenina lojlu badeen, o baali chu bejn xhica'a xe xeenlu, yadi yanabalun. ³¹ Gola güin bejn zega rendu güinrma lejtu.

³² 'Baali rendu ganaxaziri bejn ren lejtu, ¿xeza na ni güen caxhindu? Deen xtari bejn dola rin zani. ³³ Baali rindu güen ganaxazari bejn rin lejtu güen, ¿xeza na ni güen caxhindu? Deen xta neri bejn naxhua dola rin zani. ³⁴ Baali gudedu xe ni xhiniabari bejn lojdu deen ragabiaadu zajca yayijxarman, ¿xeza na ni güen caxhindu?. Deen xtari bejn dola rudeerman lojri bejn ni rliilojrma zajca yayixa lojrma. ³⁵ Peri lejtu zega gola guenla bejn ni rdxe'chiri lejtu, choru gola güin ni güen con laarma. Che gudedu xe naquiin ben garen, yacadi güinlojdu xegajca guneedxarma deen zani xhica'du xoro'o yelanzac'a xanyabaa deen zani gajcadu xi'nma, deen laama najca güen xta conri bejn ni di rudee xquixti lojma choru conri bejn mala. ³⁶ Gola yaya bejn zegagajca raya duxtada Diosri lejtu.

Yadi gudxibadu ni mala xhijqui bejn

³⁷ Yadi gudxibadu ni mala xhijqui bejn, deen yadi güinza Diosi lejtu zani. Yadi guti'pidu xenina bejnri, deen yadi sajcadu zani. Gola güin perdón bejnri, deen güinza Diosi lejtu perdón. ³⁸ Gola gudee bejn ni riaadxama, choru Diosi mazru zienro'o guneedxama lejtu. Zega tijbi bolsa ni tantu xhidxadın xta rire'cha ni xhu'u lenin. Deen zega rudeedun lojri bejn, zanigajca gunee Diosin lejtu.

³⁹ Choru regajca Jesús lojrma:

—¿Zajca chinee tijbi bejn dirnii loj stijbi bejn ni dirniigajca loj lada renma chiama ya? ¿Di zadaya'a grojparma len tijbi yeedi ya? ⁴⁰ Dichucazi bejn cagusiidi rajcaduru loj xmextruma. Peri che gusiaaloj gusidima tibizi gajcane xmextruma.

⁴¹ Yadi rubiaalu faltá maamado rajpari bejn, bidxiga'dila faltaroo ni rajpalu. ⁴² Baali mazru faltaro'o rajpalu, ¿xoga guelu loj stijbi bejn: “Dilaadiga na ni caxhinlu”? ¡Bejn muxtera!, galoxga been lij zega rayalan, che babeenlun, bazajca guelu loj stijbi bejn: “Dilaadiga na ni caxhinlu”.

Por ni rca loj yaga, raxhinbiaa bejn xe yaganinan

⁴³ Baal tijbi yaga najcan güen, di zacadiga ni nadxaba lojn, beda baali yaga nina di najcan güen di zacadiga ni güen lojn.

⁴⁴ Deen tibbiga yaga nina raxhinbiaarma laan por ni rca lojrin. Dircadiga higo loj yagayejchi, zanigajca dircadiga uva lojri yaga ladirayejchi. ⁴⁵ Bejn najca güen rniema diidxa za'ca deen laan xhu'u luxtooma, choru bejn mala rniema diidxa mala deen laazan xhu'u luxtooma. Deen ni xhu'u luxtooma laan ririaa rua'ma.

Xhu'u tio'pa loj xena ragachee xhu

⁴⁶ ¿Yexaza rniedu naj, “Dada, Dada”, choru nega di rinduj ni rmin? ⁴⁷ Lana gani lojdu xena najca bejn ri'ta lon, bejn ni rcueexhdiaga dadiidxan choru rinman: ⁴⁸ laama najca zega tijbi bejn ni rinchee xhu, galoxga rgueenma naxijtar'o oxta ridxinma loj xhiaj. Rudxe'man xhiaj, choru che riejta nijsaro'o rlian lajdi xhu nina, peri negala di rniibi xhu nina, deen



Copyright © Global Recordings Network. Used with permission.

San Lucas 6:46-49

yela zojban xhijqui xhiaj yee. ⁴⁹ Peri bejn ni rcueexhdiaga dadiidxan choru nega dirinma zega re lojn, najcama zega tijbi bejn rinchee xhu, negadi rudxe'ma xhia'n. Choru che riejta nijsaro'o rlian ladi xhu nina, lugoraze'gajca riye'nin choru dixecazi rixuu.

Rasiajca Jesús xmojsa tijbi soldado romano bejn rnebiaa soldadori.

7 Che basialoj gunené Jesús bejnri, biajma Capernaúm.

² Ne nina rbeza tijbi soldado ni rnebiaa lojri soldado, rajpama tijbi mosa ni rendoxama, xhu'malama bacazi rejtimá.
³ Che bin soldado ni rnebiaa nina ruza'tarma Jesús, guxa'lama tioobachoona bejn gola rnebiaari Israel loj Jesús, deen chichu'liadxarma yasiajcama xmosama. ⁴ Che bidxinrma loj Jesús, guxhuliaadxarma laama rerma:

—Rayala gajcanelu soldado ni rnebiaa yee, ⁵ deen rendoxama duxbejnnu, choru yan por laama gojca xhu lada rasiidiidiri Xtiidxa Diosi.

⁶Choru bine Jesús laarma. Peri che bazidxinrma gajxa lidxima, guxa'lama tioobachoon xamigoma loj Jesús deen chiyedxirma lojma:

—Mazi zunajca xhi'talu xta lidxin deen dirayaladiga chu'lulani lidxin,⁷ yela zani dirayaxadia nielagadili xhijbin lij. Peri yana xta lada zua'lu gunee deen yayajca da mosan.⁸ Deen zegagajca naj xhu'ri bejn rnebia naj, nega naj xhu'gajcazari bejn rnebiaan. Dxe rejpin loj tijbima: “Biaj”, riajma. Repin loj stijbima: “Guda,” ri'tagajcama. Choru che rejpin loj damosan: “Been nine,” ringajcaman.

⁹Che baqueexhdia Jesús ni rerma, badxiadoxa lojma ni re soldadonina, choru badxi'i lojma lada rga'ri bejn ni zinala laama, rema:

—Naj ganin lojdu, negari bejn Israel dichucazi rliiladxi Diosi zega rliiladxi bejn yee.

¹⁰Che badxinri bejn ni guxa'lla soldado ni rzobaloj nina lidxima, gunarma babayajca xmosama.

Rasiban Jesús tijbi xi'n bejn bizejbi

¹¹Che gude gojca zani, biaj Jesús tijbi yedxi la Naín, bine xbejnma con xtalaro'ri bejn.¹² Che bidxinma gajxa rua'a yedxi nina, gunama zigucue'chirma tijbi bin nixhoo güijti, tijbidoozi laami na xi'n xniami, najcama bejn bizejbi. Choru ziendoxari bejn yedxi nina zine laama zigucue'chirma xi'nma.¹³ Che guna Jesús bejn bizejbi nina bayama laama, rema lojma:

—Yadi roonlu.

¹⁴Choru gubigama gajxa baqui'ma xcaja bindoo güijti nina, guzudxeri bejn nuxu'ca laami choru re Jesús loj bindoo güijti yee:

—Xi'n, naj rni lojlu: ¡Bixquie!

¹⁵Choru la gureligajca bindoo güijti nina, guzuloj canemi, choru been Jesús laami ntrega loj xnami.¹⁶ Che guna grari bejn rga'a nina zani, bidxebidoxarma, guzuloj ruza'tarma Diosi zagadxe, rerma:

—Ba xhu'u tijbi bejn rutee Xtiidxa Diosi lojri bejn, regajcarma, Diosi babi'ta deen gajcaneri xbejnma.

¹⁷Choru xhidibi niza Judea ne xhidibiri yedxi ni rga'a nizanina bayonrma ni ben Jesús.

Biganeneri xbejn Juan Jesús

¹⁸ Basinri xbejn Juan lojma gracazi ni caxhin Jesús, chorū gunema tio'pa xbejnma ¹⁹ deen chiganabadiidxarma loj Jesús baali laama najca Cristo bejn xhi'ta o cuezarma bejn garen.

²⁰ Che bidxin xbejn Juan lada zua'a Jesús, rerma loj Jesús:

—Juan guxa'la dunoj deen yanabadidxanu lojlu baali lij najca Cristo bejn ralejzanu o yalejzanu bejn garen.

²¹ Lugoraze'gajca basiajca Jesús xtalaro'ri bejn rzagadijne xyelaxhijdx, neri bejn xhu'u bejndxaba luxtoo, chorū xtalaro'ri bejn di rni loj, baxalama lojrma. ²² Choru badxi'i Jesús diidxa lojri bejn guxa'la Juan, rema:

—Gola yaxhiaj loj Juan, gola gue ni bagunadu chorū ni babijndu. Gola gue, bejn di rniiri loj ba rnii lojrma, bejn ni rca'ri xhia'a ba rza zagadixerma, chorū bejn rajcari yelaxhijdx lepra babayajcarma, bejn di rojnrri barojnrma, bejn bagüijtiri bababanrma, bejn najcari bejn probi ba rucuehxdiagarma Xtiidxa za'ca Diosi. ²³ ¡Xechabaari bejn di zucueeza xhiliiladxi naj!

²⁴ Che bazari bejn guxa'la Juan, guzloj Jesús canema xcuenta Juan lojri bejn, rema:

—¿Chu naladxidu najca bejn bigabiaadu loj xhuj bidxi? ¿Naladxidu najcama zegazi biqui runiibi bi ya? ²⁵ O ¿Chuza bigabiaadu?, ¿Tibbi bejn ni najcu lajdi za'cadoxa ya? Lejtu ragabiaadu bejn rajcuri lajdi za'ca, chorū bejn nabani zagadxe, lidxiri rey rbezarma. ²⁶ ¿Chuza biidagabiaadu puejsi? ¿Tibbi bejn ratee Xtiidxa Diosi lojri bejn ya? Zanin, chorū masiru que nize'e naa Juan, Juan najca bejn maziru zobaloj lojri bejn ratee Xtiidxa Diosi lojri bejn. ²⁷ Juan najca bejn ni ruza'ta loj Xtiidxa Diosi, lada re:

Naj rixalan tibbi bejn nedj lojlu,

Bejn güinchee xnejzalu.

²⁸ Rnин lejtu, loj gracaziri bejn rga'a yidxilij yee, dichucazirma najca bejn mazru zobaloj loj Juan. Peri mazi zani, bejn di zobaloj lada rnebiaa Diosi, laama mazru zobaloj loj Juan.

²⁹ Che binri bejn zani, neri bejn ruquia impuesto, rerma gurobanijsa Juan laarma, deen bagogania'rma güen najca Xtiidxa Diosi. ³⁰ Peri bejn fariseo, con ri mextru rajca ley, di cuejbidiarma nurobanijsa Juan laarma, zani basienlojrma di rendigarma ni ren Diosi para laarma.

³¹ Choru re Jesús:

—¿Xenaza ganin lojdu najcari bejn rga'a loj yidxilij yee yana? ¿Chuza najca zega laarma? ³² Laarma najca zegari binquie'n zojbari galay luyedxi, rbidxia'a lasa'rimi, rermi: “Bacuedxinu flauta deen nuya'du, peri nega di baya'du. Bidoolanu ni naya, peri nega di biindu.”

³³ Zani najcadu, deen bi'ta Juan el Bautista, di raudiamaxedaxtili choru nega vino di ria'dama, ne redu bejndxaba xhu'u luxtooma. ³⁴ Choru yana bi'ta Bejn guxa'la Diosi, rauma, ria'ma, choru rabi'zadu redu raudoxama choru nalama, choru ruchagama bejn ruquixari, choru neri bejn dolaj. ³⁵ Peri xyelabini Diosi rienin por ri bejn zinala laama.

Riaj Jesús lidxi tijbi bejn fariseo lama Simón

³⁶ Tijbi bejn fariseo rema loj Jesús chitauma lidxima. Che bidixinma lidxima gurejma rua'a mexa. ³⁷ Tijbi bejngunaa dojla rijn ni mala rbeza luyedxinina, che gogabiamaxayau Jesús lidxi bejn fariseo yee, bidixinma ca'ma lumeti xhu'u perfume.

³⁸ Roonma gubigama xhia'a Jesús, choru guzuloj rugaxdamana con nijsa roonma; rucuiidximan con yidxaxhijquima, choru rauman xidu, choru badxe'ma perfume xhia'ma. ³⁹ Che guna bejn fariseo nina zani, benma xgaba: “Baali guali bejn yee, laama najca bejn ratee Xtiidxa Diosi lojri bejn, zagabiaama, chu caguquil'i laama choru xena nabana deen bejn dolan.”

⁴⁰ Choru re Jesús loj fariseo yee:

—Simón, xhu'u tijbi ni rayala ganin lojlu.

Choru re Simón:

—Guna, mextru.

⁴¹ Choru re Jesús lojma:

—Tio'pari bejn ralarma medi loj tijbi bejn rbeedi'nin.

Tijbima rala jaiigaxhuua medi lasajca ni la denarios, stijbima rala tiaabichin ⁴² Choru nega tijbirma dirajpa medi ni yayixarma, peri bejn guleedi'n medi nina, beenma laarma perdón ni ralarma lojma. Yana gunaa, ¿chu loj grojparma rendiru laama?

⁴³ Reti Simón:

—Naj naladxin, bejn ni rala xho'duru.

Choru re Jesús:

—Gualicalu.

⁴⁴ Choru babiaa Jesús bejngunaa nina, rema loj Simón:

—Babiaa bejngunaa yee. Che guxhu'n lidxilu nega di baneelu nijsa nixhibi xhia'n. Beda laama bagudiibima xhia'n con nijsa roonma choru bacuidximan con yidxaxhijquima.

⁴⁵ Di banedxadigaluj naj xidu, beda laama xta che guxhu'n di rucueezacazi rauma xidu xhia'n. ⁴⁶ Dixediga seti badxe'lu xhijquin, peri laama babadxe'ma perfume xhia'n. ⁴⁷ Yela zani rnin lojlu Simón, gracaziri xdolama ba benan perdón deen rendoxama naj. Beda bejn xhu'u ta'nzi xdola choru rajcama perdón, ta'nzi renma naj.

⁴⁸ Choru re Jesús loj bejngunaa nina:

—Banajca graziri xdolalu perdón.

⁴⁹ Choru bejn ni zojbaneri laama nina, guzuloj rniabadidxa loj lasa'rma, rerma:

—¿Chuga bejn yee ze'ti rinma perdón xta dolari?

⁵⁰ Peri re Jesús loj bejngunaa nina:

—Banajcalu perdón yela ba rliiladxilu naj, baxhia zagadxe.

Bejngunaa ni rajcaneri Jesús

8 Che gude gojca grari nine, biaj Jesús yedxi rga'ri niza nina, rusinia'ma laarma xena güiinrma deen gajcairma xbejn Diosi. Ne chibiti'opa xapostolma binema, con ²tio'pa choonri bejngunaa ni basiajca Jesús, bejn babeema bejndxaba luxtoo, choru yelaxhijdxra ni rajcarma. Lojrma no'cha María bejn rniegajcarma Magdalena bejngunaa babee Jesús gjwdx bejndxaba luxtoo, ³ne Susana choru Juana xgunaa Cuza, bejn nulen xchiin Herodes. Choru ne zienruri bejngunaa gojcane Jesús con ni rajparma.

Xuenta tijbi bejn rtie'cha bin

⁴ Xtalaro'ri bejn biriaa ladxirma deen gubiaarma Jesús, choru che bido'pa xtalaro'rma, bima tijbi cuento lojрма:

⁵ —Tijbi bejn biriaama zigatie'chama bin loj xiama. Che catie'chaman, gaiin bidiin lunejza, baleeri bejn xhijquin, choru gudauri bixinin. ⁶ Zagaiin bidiin ladari xhiaj, che gulenrin gubidxirin deen di xhu'u xgojpadiga lojri xhiaj nina. ⁷ Zagaiin bidiin ladari yaga yejchi. Che gulenrin gunidilojrin ladari yaga



Copyright © Global Recordings Network. Used with permission.

San Lucas 8:4-8

yejchi ni gulejnnerin. ⁸ Choru zagaiizan bidiin loj xhuj za'ca, gulejnrin, guniisirin, choru cuadoxarin, xta tijbi gaxhuaa bin cua loj tijbigajn.

Che guloxa gune Jesús zani, choru gunema nayacharo'o rema:

—Bejn ren guquexhdiaga, gola guquexhdiaga.

Yexa rulii Jesús conri cuento

⁹ Choru gunabadidxari xbejn Jesús lojma rerma:

—¿Xe ren gue cuento yee?

¹⁰ Reeti Jesús lojrma:

—Diosi babasa'n lejtu deen gagania'du, peri demaziri bejn riinan por cuento deen mazi rubiarma di sanadigarma, choru mazi rojnrma dizaganiaadigarma.

Rusiniaas Jesús xcuenta bejn rtie'cha bin

¹¹ 'Nine ren gue cuento rin lojdu: Binnina najca zega Xtiidxa Diosi. ¹² Lunejza lada bidiinri binnina, najcan zegari bejn ni rucueexhdiaga Xtiidxa Diosi, peri ri'ta bejndxaba rugobacaman luxtoorma deen yadi xhililadxirma choru yadi laarma. ¹³ Choru loj xhiaj lada bidiinri binnina, najcarin

zegari bejn rucueexhdiaga Xtiidxa Diosi, rabaadoxarma run luxtoorma, peri yela najcarma zega cuaan ni dixe luj, rliiladxirma laan tibiladedoozi choru che xe rzajcarma la ruza'ngajca rliiladxirma laan.¹⁴ Choru lojri yaga yejchi, lada bidiinri binnina, laarin najca zegari bejn rucueexhdiaga Xtiidxa Diosi, peri ta'ndoga ziarma raxan, deen rindirurma xgaba gra yelanaza'ca xhu'u loj guidxilij yee, choru zani diru rinjndigarma ni ren Diosi.¹⁵ Peri bin ni bidiin loj xhuj güen, laan najca zegari bejn rucueexhdiaga Xtiidxa Diosi con xhidibi luxtoorma, choru zuaadxi'chirma loj Xtiidxama choru zinua rijnrma ni renma.

Dixediga ni nague'chi xhu'u

¹⁶ 'Dichudiga ruse'qui tijbi xhij choru ruseeguma xhijquin o gudxe'man xan ruloon, rixoobalarman yaa deen gúsinin loj bejn chu'u lanioo.¹⁷ Deen dixediga ni rijn bejn ralan di zayagabiaa bejn, nega ni nage'chi di zayagabiaa bejn deen zadxin dxej yayagabiaarma laan.

¹⁸ 'Ze'ti gola gucueexhdiaga zagadxe, deen bejn ragania Xtiidxa Diosi, mazru zagania'man. Peri bejn ni di ragania'n, xta ni rliilojma rajcama zaalaladximan.

Xna Jesús conri bijchima

¹⁹ Xnaa Jesús conri bichima bidxinrma lada zua'a Jesús, peri digojcadiga nibigarma lada zua'ma, deen zienroori bejn rga'a nina.²⁰ Choru tijbi bejn basin loj Jesús rema:

—Laa xniallu conri bijchilu zua'a fuera ni, renrma xhinienerma lij.

²¹ Peri re Jesús lojrma:

—Da naan con ri da bijchin nari bejn rucueexhdiaga Xtiidxa Diosi, choru rinrma zega renma.

Rucue'za Jesús bi roo

²² Tijbi dxej guye'pi Jesús loj tijbi barcu conri xbejnma, choru rema lojrma:

—Cho'ri stijbi ladu loj nijsa yee.

Choru biajрма. ²³Ne la'ti caderma loj nijsa nina goodayejsi Jesús. Choru guzulojza rbi'i biro'doxa loj nijsa nina, chorу guzuloj cada'a nijsa loj barcu yee barzebicazin xan nijsa.

²⁴Choru bigacueenrma laama rerma:

—¡Mextru! ¡Mextru! ¡Laa dulaari bacazeebi xan nijsa!

Choru bixquiejti Jesús gunebiaama cueza biro'o nina, con nijsa rajsari yee. Choru guirazirin babedxe. ²⁵Choru re loj xbejnma:

—¿Conza yela riliiladxidu naj?

Peri laarma bidxebidoxarma, chorу rindxiadoxa lojrma re loj lasa'rma:

—¿Chuza bejn yee ze'ti xta bi con nijsa ruzooba Xtiidxama?

Rasiajca Jesús tijbi bejn xhu'u bejndxaba luxtoo

²⁶Choru bidxinrma stibiladu rua'a nijsa lada rnebiari bejn Gadarenos, stibiladu Galilea. ²⁷Che bayejta Jesús loj barcu nina, gubiga tijbi bejn Gadara cue'ma, xhu'u bejndxaba luxtooma. Xchero'o bagojca xhu'u bejndxaba nina luxtooma, chorу dixediga lajdi rajcuma chorу yana dirbezadigama len xhuu, rua'ziri baa ribezama. ²⁸Che guna bejn yee Jesús bazuj xibima chorу guridxidajma nayaçharo'o:

—¿Xe renlu con naj, Jesús, Xi'n Diosi yabaa?

²⁹Rema zani deen bacanebiaa Jesús yaria bejndxaba nina luxtooma. Ba gogaxchero'o xhu'ma luxtooma. Choru baguxiiri bejn yaama, ne xhia'ma con caden deen yadi ca chiama. Peri laama rtigaya'ma caden nina chorу rinee bejndxaba laama lada dichucazi bejn rbeza. ³⁰Gunabadidxa Jesús lojma:

—¿Chu lalu?

Choru rema:

—Legion laan.

Rema zani deen yela zienro'ri bejndxaba xhu'u luxtooma.

³¹Choru gunabari bejndxaba nina loj Jesús yadi guixaalamа laarma loj castiga. ³²Gajxa nina rga'a zienro'ri cuijchi cayauriba. Choru gunabari bejndxaba nina loj Jesús gulaama chichu'rma ladiri cuichi nina. Choru cuejbima. ³³Dxe bariaari bejndxaba nina luxtoo bejn yee, baxhurma ladiri cuijchi nina, chorу guzuloj ruxindxiariba, godaya'riba rua'a bala'a xta loj nijsa, nina gogariba chorу güijtiriba.

³⁴ Che gunari bejn cayajpa cuijchi ninari ni gojca, ruxiinrma bigasinrma lojri bejn rga'a yedxi nina conri bejn rga'a luxhiniaa nina. ³⁵ Bigabiaari bejn ni gojca. Che bidxinrma lada zua'a Jesús, gunarma bejn bariaa bejndxaba luxtoo nina, laama zojba xhia'a Jesús ba najcu xabama, babayajcama; choru bidxebirma. ³⁶ Bejn gunari ni gojca, rirma diidxa lojri bejn xena bayajca bejn guxhu bejndxaba luxtoo yee. ³⁷ Gracaziri bejn rbeza niza Gadara gunabarma loj Jesús yaxhiajma deen ridxebidoxarma. Choru Jesús guye'pima loj barcu, ziatima. ³⁸ Bejn ni bariaa bejndxaba nina luxtoo, gunabama loj Jesús gulaama chinalama laama.

Peri di cuejbidia Jesús, choru bagu'nejzama laama rema lojma:

³⁹ —Baxhiaj lidxilu, bigaye diidxa gra ni babeen Diosi con lij.

Choru zia lidxima, rima diidxa gra lojri bejn yedxi nina ni babeen Jesús con laama.

Rayajca xi'n Jairo ne bejngunaa baqui'i xaba Jesús

⁴⁰ Che badxin Jesús stibiladu rua'a nijsa nina, rabaadoxari bejn badxinma, deen grazirma ba zua'beza laama. ⁴¹ Lugoraze'e bidxin tijbi bejn nixhioo la Jairo, laama rnebiaa len xhu lada rusiidirma Xtiidxa Diosi, bazuj xibima loj Jesús, choru gunabama lojma chiama lidxima, ⁴² deen xhu'u tijbidoozi xin'ma biin gunaa, xhu'mi chibitio'pijza barejticazimi. Choru zeti Jesús lidxima, xtalaro'ri bejn zinala laama, xta ruteerma laama.

⁴³ 'Peri tijbi bejngunaa naxhua lojrma, ba gojca chibitio'pijza ragamalama di rbejzadiga riajbama rejn, choru xoro'o babanijtima riajma lojri doctor, peri nega tijbirma di basiajca laama. ⁴⁴ Bibigama niza xijcha Jesús baqui'ma rua'a xabama, ne lugoraze'gajca gulejza riajbama rejn.

⁴⁵ Choru gunabadidxa Jesús lojri bejn nina rema:


—¿Chu baqui'i naj?

Peri grazirma re:

—Di dunojdiga baqui'i lij.

Choru Pedro conri bejn zua'ne laama rerma:

—Mextru, ruteerma dulaari choru rulayaarma dulaari, ne rniabadiidxalu chu ni baqui'i lij.



Copyright © Global Recordings Network. Used with permission.

San Lucas 8:40-48

⁴⁶ Peri re Jesús:

—Naj ragabiaan xhu'u chu baqui'i naj deen ragabiaan xhu'u chu babayajca con da yelarnebiaan.

⁴⁷ Che gogabiaa bejngunaa nina bagogabiaa Jesús laama baqui'i xabama, rnima gubibigama loj Jesús choru bazuj xibima. Choru niza loj grari bejn rga'a nina bima diidxa yexa baqui'ma xaba Jesús choru che baqui'man la bayajcagajcama.

⁴⁸ Choru re Jesús loj bejngunaa nina:

—Xi'n, babayajcalu deen babiladxilu naj, baxhiaj zagadxe.

⁴⁹ Sta canene Jesús bejngunaa nina che bidxin tijbi bejn naza lidxi Jairo, bejn rnebiaa len xhu lada rusiidirma Xtiidxa Diosi, rema loj Jairo:

— Ba guiti xi'nlu, yadiru rin nagueegalux Mextru.

⁵⁰ Peri che baqueexhdiaga Jesús zani, rema loj Jairo:

—Yadi xhidxebilu, bililadxizi, zayajca xi'nlu.

⁵¹ Che bidxinrma lidxi Jairo, di balaadiga Jesús nixhuri bejn garen, Pedrozi con Juan, con Jacobo conri xtada xniaa bindoo nina guxhú. ⁵² Gracaziri bejn rga'a nina cayoonrma choru zua'a nayarma por laami. Peri re Jesús lojrma:

—Yadi roondu, di güijtidigami, nayejsizimi.

⁵³ Gracazirma baxijdxila laama, yela ragabiaarma bagüijtimi. ⁵⁴ Peri Jesús gunaazama yaami, gunema laami nayajcha, rema:

—Bindoo, bixquiej.

⁵⁵ Choru baban bindoonina, lugoraze'gajca bixquiejmi. Choru gunebiaa Jesús baderma ni gudaumi. ⁵⁶ Badxiadoxa lojri xtadami ni gojca, peri Jesús gunebiamma yadi chu loj guerma ni ba gojca.

Rixaala Jesús chibitio'pari xbejnma chiguliirma Xtiidxa Diosi

9 Bato'pa Jesús chibitio'pari xbejnma, choru badeema yelarnebiaa laarma deen yabeerma grari bejndxaba luxtoori bejn choru yasiajcarma bejn ragamalari. ² Guxaalama laarma chiguliirma xena najca xyelarnebiaa Diosi, choru yasiajcarma bejn ragamalari. ³ Rema lojrma:

—Di chinedu xenina tibinejza, nega yaga riliadxidu, nega yijxa, nega ni gaudu, nega medi, nega stijbi nejza xabadu. ⁴ Chutizi lidxi guidxindu ninazi gola yaya'n, golayaya'n xta che yazadu luyedxi nina. ⁵ Baali xhu'u yedxi di renrma lejtu, gola yariaa nina, choru gola cuijpa guxaxhuj xhia'du, zega tijbi sen ni di renrma guzobarma Xtiidxa Diosi.

⁶ Choru biriaarma zerma gracaziri yedxidoo rga'a gajxa nina, zigatie'charma Xtiidxa za'ca Diosi, choru rasiajcarma bejn ragaxuu.

Rayon Herodes ni caxhin Jesús

⁷ Che gogabiaa rey Herodes gracazi ni caxhin Jesús, choru di gogabiadigama xe xgaba ninma, deen xhu'ri bejn re Juan bejn baroobanijsa bejnri bababan, ⁸ xhu'rma re Elias bejn bate Xtiidxa Diosi lojri bejn babareeca, xhu'zarma re, tijbiri bejn gojcali ni bate Xtiidxa Diosi lojri bejn bababan. ⁹ Peri Herodes re:

—Naj gajca gunebiaa birua'a yen Juan. ¿Chuzá bejn ni rucuehdiagan ruza'tarma?

Choru Herodes renma gubiaama Jesús.

Rudee Jesús ni rau jaay miliri bejn

¹⁰ Che badxinri xapostol Jesús, rirma diidxa gracazi ni biyeenrma. Choru binema laarma lada dichucazi bejn rbeza, gajxa yedxi Betsaida. ¹¹ Peri che gogabiari bejn, binalarma

laama lada zema, choru bay'a'nnnerma laama. Baliima laarma xcuenta xyelarnebiaa Diosi choru basiajcama bejn ragamalari.

¹²Che ba zidxee, gubigari xhibitio'pari xapostolma lojma rema:

—Güidxi loj grari bejn nina, deen yaxhiajrma chigadiili lada yaya'nрма yedxidoori choru ranchuri ni rga'a gajxa, choru chitiili ni gaurma, deen lada dxu'ri dixecazi xhu'u.

¹³Choru rema:

—Lejtu gola gudee ni gaurma.

Retirma:

—Jaayzi yedaxtili naca'nu con tio'pazi bejla; baali yosiidilazanu ni gau grari bejn ye.

¹⁴Zega jaymiliri bejn nixhoo rga'a nina. Peri re Jesús lojri xbejnma:

—Gola cue'qui tia'bichigarma lajta lajta.

¹⁵Choru beenrma zani, gurej grama. ¹⁶Choru cua'ma xhgay yedaxtilinina con grojpari bejlanina. Gulejsa lojma xanyabaa, badeema xquixti loj Diosi, choru gula'man badeeman lojri xbejnma deen qui'sirman lojri bejn rga'a nina. ¹⁷Gracazirma gudau xta bigadxinladxirma. Choru bato'parma chibitio'pa dximin, ni bay'a'n.



Copyright © Global Recordings Network. Used with permission.

San Lucas 9:10-17

Re Pedro Jesús na Cristo

¹⁸ Tibiaja dxej cabejdxí canaba Jesús, zua'neri xbejnma. Gunabadiidxama lojrma, rema:

—¿Chu reri bejn najcan ne?

¹⁹ Choru rerma:

—Xhu'rma re lij najca Juan bejn baroobanijsa bejnri, xhu'zarma re lij najca Elías bejn bate Xtiidxa Diosi lojri bejn, stibicuaazarma re lij najca tijbiri bejn bate Xtiidxa Diosi lojri bejn gojcalá, bejn bababan.

²⁰ Choru gunabadidxa Jesús lojrma, rema:

—Lejtuza, ¿chuza nagondu najcan?

Guneti Pedro rema:

—Lij najca Cristo, xi'n Diosi.

Rusin Jesús guejtima

²¹ Peri gunebiaa Jesús dichucanzi loj guerma nine. ²² Choru rema lojrma:

—Naj Bejn guxa'la Diosi rayala gazaagadiadoxan: di zendigari guxtisi Israel naj, negari bixioza ni rnebiaari bixioza, negari mextru rajca ley; Zugüijtirma naj, peri che yayon dxej yabanán.

²³ Choru rema loj gramma:

—Baali chu ren gajca da bejnan di rayaladiga güinma zega naladxima, gucuaaladxima sagadijma guixe guixe choru xhiidanalamá naj. ²⁴ Deen bejn ni mazru ren yelanabaan ni rajpama lo yidxilij yee, zadxin dxej diru zajpadigaman, peri bejn guejti por naj, zajpama yelnaban con Diosi. ²⁵ ¿Xeza gan güin bejn gan, gajpama graloj ni xhu'u yidxilij, choru nijtima loj Diosi? ²⁶ Baali chu ratunee naj, neri da didxan, zanigajca naj Bejn guxa'la Diosi, zatuneegajcan laama e yelan con dayelarnebiaan, ni najca gajca xeen da Dadan con xángelma. ²⁷ Peri naj rnin lojdu, xhu'ri bejn zua'a yee di zejtidigma xta gubiarma xyelarnebiaa Diosi.

Bidxaa Jesús lojri xbejnma

²⁸ Che gojca zega xun dxej gune Jesús didxaninari, bine Jesús Pedro, Juan, con Jacobo tijbi dajn lada gurejdxima Diosi. ²⁹ La'ti cabejdxí Jesús loj Diosi, bidxaa lojma, choru



Copyright © Global Recordings Network. Used with permission.

San Lucas 9:28-36

xabama gojcan naquijchi bej choru rliabacha'n. ³⁰ Nina gogaxej tio'pari bejn nixhoo canenerma laama, laarma najca Moisés con Elías ³¹ rliabacha'doxarma, canenerma Jesús rirma diidxa xena sagadiajma choru guejtima Jerusalén. ³² Peri Pedro con stio'pari xcompanierama radxagadoxarma baca'l'a godayejsirma. Choru che babanrma, gunarma xena rliabacha'a Jesús con stio'pari bejn zua'nema. ³³ Che gudoobacari bejn nina lada zua'a Jesús, re Pedro lojma:

—Mextru, ¡zaagala dxu'nu yee! Zajca yeennu choona ranchu, tijbin para lij, tijbin para Moisés, stijbin para Elías.

Peri nega di ragabiaa Pedro ni cayema. ³⁴ La'ti caye Pedro zani, biepta tijbi bej xhijquirma, ne che xhu'rma galay loj bej nina, bidxebidoxarma. ³⁵ Choru loj bej nina bieen chia'a bejn rema:

—Laa bejn yee najca da xi'nan bejn rendoxan. Gola gucueexhdiaga Xtiidxama.

³⁶ Che guyaloj bínrman, gunarma xtibizi Jesús bazua'a, diruxecazi rerma choru lojri dxeze'e dichucazi loj rerma ni babiaarma.

Rasiajca Jesús tijbi biin nixhoo xhu'u bejndxaba luxtoo

³⁷ Che barayeela che bayejtarma ladi dajn nina zienro'ri bejn biriaa bigachaagarloj laama. ³⁸ Choru tijbi bejn nixhoo naxhua lojrma guridxidajma rema:

—Mextru, rniaban lojlu gubiaalu daxi'nan deen tibizi laami ra'pan. ³⁹ Tijbi bejndxaba ru luxtoomi, rucuidxidajma laami ne rbijpaya'ma laami, choru ririaa bichin rua'mi, rinnadoxama laami choru direndigama gulaama laami. ⁴⁰ Barejpin lojri xbejnlu cueerma bejndxaba nina ladimi, peri digojcadigarma.

⁴¹ Reti Jesús:

—Zaniticazi lejtu bejn dolari, bejn ni di rliladxiri, ¿xta goca gazuneen lejtu, choru güinan lejtu guantari? Dane xi'nlu yee.

⁴² Che cabiga bin nixhoo nina cue'e Jesús, bareexhuj bejndxaba nina laami luxhuj, choru guzloj rbijpaya'ma laami stijbi. Peri Jesús gunabiaama yariaa bejndxaba nina luxtoomi, basiajcamla laami, choru beenma laami ntrega loj xtadami.

⁴³ Gracazirma badxia loj, xquellazajca Diosi.

Rusin Jesús stijbi, guejtima

La'ti cayadxia loj grari bejn gra ni caxhin Jesús, rema lojri xbejnma:

⁴⁴ —Gola gucueexhdiaga zagadxe, choru yadi gaalaladxidu ni ganin lojdu: Naj Bejn guxa'la Diosi zajcan ntrega lojri bejn garen.

⁴⁵ Peri laarma di gogania'digarma ni rema, deen nague'chin para laarma, peri bidxebilarma niniabadiidxarma xe guyenma niejma lojrma.

¿Chu najca bejn zobaloj?

⁴⁶ Choru guzuloj rdilidiidxari xbejn Jesús, chuga loj grarma najca bejn zobaloj. ⁴⁷ Peri ragabiaagajca Jesús xgaba ni caxhinrma, choru cua'ma tijbi bindoo, bazujma laami cue'ma, ⁴⁸ choru rema lojrma:

—Bejn ni rincuenta tijbi bindoo por naj, naj caxhincuentama. Choru bejn rincuenta naj, bejn guxa'la naj caxhincuentama. Deen bejn rin mandadu loj gradu, laama mazru zobaloj lojdu.

**Bejn di rin xcontra dulaari,
con dulaari zua'ma.**

⁴⁹ Re Juan loj Jesús:

—Mextru, bananu tijbi bejn ni rabee bejndxaba luxtoori bejn con xyelarnebiaalu. Peri diru balaadiganu ninruman deen dinedigama najca dux bejnri.

⁵⁰ Peri re Jesús lojrma:

—Yadi rudxoondu, deen bejn dirijn xcontra dulaari, laama zua'ne dulaari.

Ruxuu Jesús Jacobo con Juan

⁵¹ Dxe bazidxin dxej yaye'pi Jesús xanyabaa, gux huma balori chiama Jerusalén. ⁵² Guxa'lama bejn gunediri, zerma tijbiri yedxi rga'a Samaria, bitiilirma lada yaya'nurma. ⁵³ Peri dibalaadigari bejn Samaria naya'nurma nina, deen gogabiaarma Jerusalén zerma. ⁵⁴ Che guna Juan con Jacobo zani, rerma loj Jesús:

—Dada, ¿renlu yanabanu yaba bajla xanyabaa zega ben Elías bejn bate Xtiidxa Diosi lojri bejn, deen nijtiri bejn yee ya?

⁵⁵ Choru babiaa Jesús lojrma, rdilima laarma, rema:

—¿Di ragabiaadu loj bejndxaba zi'ta ni rniedu ya? ⁵⁶ Naj Bejn guxa'la Diosi di zieladigan para gunijtin bejnri, zielan para gulaan laarma loj xdolarma.

Choru ziárma stijbi yedxi.

Bejn renri chinala Jesús

⁵⁷ Che zerma tijbi nejza, tijbi bejn re loj Jesús:

—Dada, renan gazanaalan lij ladatizi chialu.

⁵⁸ Choru re Jesús:

—Bezuri najca lada raxhuriba, choru bixhin rajpa xtia'sariba, peri naj, Bejn guxa'la Diosi, nega lada gayijxa xhijquin di ra'pan.

⁵⁹ Choru re Jesús loj stijbi bejn:

—Danala naj.

Peri re bejn nina:

—Dada, balaa naj gazunee da dadan xta che guejtima.

⁶⁰ Choru re Jesús lojma:

—Basa'n xtalalu conri bejn diren xhiidanala naj,
laarma gucue'chi laama, peri lij bigatie'cha diidxa xena na
xyelarnebiaa Diosi.

⁶¹ Choru re stijbi bejn:

—Dada, renan yelanaalan lij peri galoxga balaa chigusin loj
da familin.

⁶² Peri re Jesús:

—Bejn rniaaza xhia'a garadu, choru rudxi'i lojma trasa,
dizajcadiga gucuama xuxca tibili, zanigajca bejn ren xhiidanala
naj choru di rusa'nma graloj tibiladu, dizajcadiga chu'ma loj
xyelarnebiaa Diosi.

Rixa'la Jesús gayonchiiri bejn

10 Che gude gojcari nine, gule Jesús gayonchiiri bejnri,
choru guxa'lama tio'pagarma luyedxirii conri ranchu,
deen nedirma chiagarma lada najca chiama. ² Rema lojrma:

—Didxalicazi, xtalaro'ri bejn ren gucuaeexhdiaga Xtiidxa
Diosi, peri di ziendiari bejn gulin xhu'u. Ze'ti gola xhiniaba
loj Diosi deen guixaalam a mazru zien bejn, gulii laarma.

³ Gola chiaj, naj rxaalan lejtu zega riajri xili galayri cuyoti.

⁴ Di chinedu guijxa, nega medi, nega stijbi nejza xgurachidu,
yadi sudxedu xhininedu bejnri tijbinejza. ⁵ Che chu'du lidxi
tijbi bejn, galoxga gola gue: “Diosi gajcane cuezadu zagadxe.”

⁶ Choru baali bejn rbeza nina guneza'carma lejtu, zajcanee
Diosi cuezarma zagadxe. Beda baali di guneza'carma lejtu
di zajcanediga Diosi laarma xhibarma zagadxe. ⁷ Choru lada
rnieza'carma lejtu, gola yaya'n xhu ze'e gola gau gola xhia'a
ni guneedxarma lejtu. Deen bejn rijn dxiin rayala gauma.
Ninascazi gola yaya'n di yaya'ndu xhu garenti xhu garen.

⁸ Che guidxindu tijbi yedxi, lada güincuentarma lejtu, gola
gau ni guneedxarma. ⁹ Gola yasiajca bejn ragaxuu xhu'ri
luyedxi nina, gola gue lojrma: “Ba zeda gajxa xyelarnebiaa
Diosi lojdu.” ¹⁰ Peri baali guidxindu tijbi yedxi lada di renrma
lejtu, gola guiriaa lunejza, gola gue: ¹¹ “Xta guxaxhu ladxidu ni
cua du xhia'n, radxijpanu zega tijbi sen di baqueexhdiagadu
duxtiidxanu. Peri gagabiadu, ba zua'a gajxa xyelarnebiaa
Diosi para lejtu.” ¹² Naj rmin lojdu, che guidxin dxej yadeeri

bejn cuenta loj Diosi, mazru castigaro'o yado'larma que lojri bejn Sodoma.

Bejn di rucueexhdiaga Xtiidxa Diosi

¹³—¡Probi lejtu bejn Corazín! ¡Probi lejtu bejn Betsaida! Deen baali yedxi Tiro con yedxi Sidón niajca milagri ni gojca ladxidu, gojcal a nusa'nrma ninrma dola, niajurma lajdi ya'sa choru nugo'cha cobadej xhijquirma zega tijbi sen ba basa'nrma ni mala najcarma. ¹⁴Peri rnin lojdu, che yadeeri bejn cuenta loj Diosi, mazru castigaro'o yado'ladu que lojri bejn Tiro con Sidón. ¹⁵Choru lejtu, bejn Capernaum, yadi nagondu zaxhiajdu xanyabaa, lejtu rado'la yaxhiaj xta garej loj xhij re'qui.

¹⁶Choru re Jesús lojri xbejnma:

—Bejn ni rincuenta lejtu, naj caxhincuentama. Peri bejn ni di ren lejtu, najza di cayenma, choru bejn di ren naj, bejn guxa'laza naj di cayenma.

Badxin gayonchiiri bejn guxa'la Jesús

¹⁷Che badxin gayonchiiri bejn guxa'la Jesús rabaadoxarma rerma lojma:

— Dada, xtari bejndxaba ruzooba duxtiidxanu che raza'tanu lajlu.

¹⁸Choru re Jesús lojрма:

—Gualicadu, naj gunan, zegazi xxhij guzioo godaya'a bejndxaba xanyabaa. ¹⁹Naj banen lejtu yelarnebiaadeen guledu xhijquiri be'l a ne xhijquiri nuxibi, choru yana deen güiindu gan loj xyelarnebiaa bejndxaba, sin güinma lejtu xenina. ²⁰Peri yadi yabaadu ruzoobari bejndxaba nina xtiidxadu, gola yabaadila yela baca lajdu loj yi'chi ni xhu'u xanyabaa.

Rabaa Jesús

²¹Lugoraze'gajca babaadoxo Jesús por xEspíritu Diosi, choru rema:

—Ruzajtan lij zagadxe Dada, lij rnebiaa xanyabaa con yidxilij, deen ni baque'chilu lojri bejn ni rajca choru lojri bejn

ni ragania'a, laan babaliilu lojri bejn ni najcari zaga bindoori. Zani gojcan, Dada, deen zani guyenlu.

²² Da Dadan baneedxa graticazin naj. Choru dichudiga nunbiaa naj Xi'n Diosi, tijbizi Diosi; zanigajca dichudiga nunbiaa Diosi, tijbizi naj, xi'nma, conri bejn renan güinbiaa laama.

²³ Choru babiaa loj xbejnma, rema lojzirma:

—Xechabaari bejn ni gubiaa ni cagubiaadu ²⁴ deen naj rnin lojdu, zienri bejn bate Xtiidxa Diosi lojri bejn, conri rey guyenrma nubiaarma ni cagubiaadu, peri di babiaadigarman. Guyenrma nuqueexhdiagarma ni caguqueexhdiagadu, peri dibaqueexhdiagadiarman.

Tijbi bejn Samaria naza'ca

²⁵ Tijbi mextru rajca ley bisujma deen güinma prueba Jesús, gunabadiidxama lojma rema:

—Mextru, ¿xe rayala güinan deen xhibanan tijbilayaa loj Diosi?

²⁶ Badxi'i Jesús xtiidxama rema:

—¿Xe ca loj ley ni badee Diosi loj Moisés? ¿Xena ragania'lun?

²⁷ Choru re mextru nina:

—“Guyen xtada Dioslu, con xhidibi xgabalu, xhidibi luxtoolu, choru guyen lasa'a binie'tilu, zega renlu lijgajca.”

²⁸ Reti Jesús lojma:


—Laaca gunelu. Been grari ni nalu deen xhibanlu tijbilayaa loj Diosi.

²⁹ Peri guyencazi mextru yee naya'nma zagadxe, gunabadiidxama loj Jesús rema:

—¿Chuza bejn guenan zega ren najgajca?

³⁰ Choru ri Jesús tijbi diidxa lojma rema:

—Tijbi bejn Israel biriaama Jerusalén zema yedxi Jericó. La'ti zema gunaazari bejn gubaan laama, gudinrma laama choru cua'rma gra ni zinema xta xabama, choru zega bejn güijti baza'nrma laama. ³¹ Dxela gude tijbi bixioza niza nina, peri che gunama bejn nina, tibicue'la gudema, zetima. ³² Ninagajca gude tijbi levita bejn ni rajcaneri bixioza. Che gunama bejn nina, zanigajca tibicue'la gudema, choru zetima. ³³ Peri tijbi bejn Samaria gudema niza nina gajxa cue'ma, che gunama



Copyright © Global Recordings Network. Used with permission.

San Lucas 10:25-37

naga'a bejndo nina, bayama laama,³⁴ Choru gubigama lada
naga'ma, badxe'ma ceti ne vino lada nadxeelaxhijdxama choru
guxiiman. Choru badxiibama laama ladi xburama, binema
laama len tijbi xhu lada raya'nri bejn, nina gojpama laama.
³⁵ Barayeela, che bayaxhiaj bejn balejsa laama, badeema medi,
najcan tio'pa dxej dxiin, loj bejn najca lidxin, choru rema
lojma: "Gojpa bejndo yee, baali gunijtima xo'duru, che yabi'n
stijbi yayixanan lojlu."

³⁶ Choru re Jesús loj mextru nina:
—Yana guna, ¿chu loj yonari bejn yee ni gude nina, guyen
zega lasa'ma bejn gudinri bejn gubaan yee?

³⁷ Reti mextru nina:
—Bejn baya laama.
Choru re Jesús lojma:
—Biaj, choru bigayeen zani conri bejn.

Riganaa Jesús Martha con María

³⁸ Binua Jesús zema, bidxinma tijbi yedxidoo, nina
bigaya'nma lidxi tijbi bejn la Martha.³⁹ Xhu'za tijbi lasa'a
Martha lami María. Gurej María niza xhia'a Jesús deen

guqueexhdiagami ni cane Jesús. ⁴⁰ Peri Martha mazru ruquienne gra xmandadumi, choru bibigatimi cue'e Jesús remi:

—¿Dada, dirajca luxtoolu rubiaalu tijbizi raza'nne María naj mandaduyeri ya? Güijdxi lojmi gajcanemi naj.

⁴¹ Peri re Jesús lojma:

—Martha, Martha, ridxiga'nedoxari xmandadulu. ⁴² Peri tijbizi ni mazru ringuayen xhu'u. Choru María laan ba gulemi, dichucazi zajca coobacan lojmi.

Rulii Jesús xena cuedxi xhiniaba bejn loj Diosi

11 Tibiaja cabejdxí Jesús loj xtada Diosima. Che basiaaloj rbejdxima Diosi, re tijbiri xbejnma lojma:

—Dada, balii dunoj xena yabejdxí yanabanu loj Diosi, zega balii xbejn Juan bejn baroobanijsa bejnri.

² Choru re Jesús lojrma:

—Che cuedxi xhiniabadu loj Diosi gola gue:

Dada, lij xhu'u xanyabaa,

Rayala ya'padoxanu lojlu respeto.

Xhi'ta xyelarnebiaalu.

Gajca zega renlu loj yidxilij yee, zega rajca xanyabaa.

³ Basigada ni xhidaunu guixe guixe.

⁴ Been perdón grari duxdolanu, zegagajca rieennu
perdón grari bejn ni rin ni mala dunoj.

Yadi gulalu yeennu ni mala, babee dunoj loj grari
ni mala.

⁵ Choru regajca Jesús lojrma:

—Ye'chiri tijbidu xhu'u tijbi xamigodu, choru garola yeela riajdu lidxi xamigodu redu lojma: “Amigo, banedxasi naj choona xyedaxtililu, ⁶deen bi'tagana tijbi da amigon naj nazama zijtu, choru dixediga ra'pan guden laama.” ⁷ Choru xhiniema xta lanio nama: “Yadi rin nagüeegalú naj, banayegu rua'a lidxin. Laana banaga'neri da xi'nan. Dizajcadiga chixquiens gunenan.” ⁸ Peri rnin lojdu, mazcasi di zixquiejma guneema ni rniabadu lojma mazi najcama xamigodu. Peri yela canabazi canabadun lojma zixquiejcama guneema gra ni naquiindu deen yadiru güin nagüeegadu laama ⁹ Ze'ti rnin lojdu: Gola xhiniaaba loj Diosi, zuneecama ni xhiniabadu, gola yaxhiili laama, zadxejlacama güindu. Gola cuejdxí xhiniaba lojma zincuentacama lejtu. ¹⁰ Deen gracazi bejn rniaba lojma

zaca'ma, bejn raxhiili laama, rdxejlama laama. Choru bejn rbejdxi rniaba lojma zincuentama laama.

¹¹ Lejtu zega nadu dada, ¿yexa zudedu xhiaj loj xi'ndu che xhiniabami yedaxtili ya?, ¿o zudeedu tijbi be'la che xhiniabami bejla ya? ¹² ¿o zudeedu nuxibi che xhiniabami chijta ya? ¹³ Lejtu nadu bejn dola, ne ragabiaadu ni güen gude gau xi'ndu. ¡Mazru xtadadu bejn xhu'u xanyabaa rudeema xEspirituma lojri bejn riniaaba laan!

Reri bejn rajpa Jesús xyelarnebiaa Beelzebú

¹⁴ Cayabee Jesús bejndxaba luxtoo tijbi bejn basa'n bejndxaba nina gojpa. Che bariaa bejndxaba nina guzuloj cane bejn gojpa yee. Choru badxiadoxa lojri bejn rga'a nina. ¹⁵ Peri xhu'rma re:

—Bejn yee rabeema bejndxaba luxtoori bejn por xyelarnebiaa Beelzebú bejn rnebiaa lojri bejndxaba.

¹⁶ Xhu'zarma para güinrma laama prueba, rerma lojma güinma milagri zeda xanyabaa. ¹⁷ Peri Jesús ragabiaagajcama xgaba ni caxhinrma, choru rema:

—Grari nación ni di rga'a za'ca, rlia'a lasa'rma. Zanigajca tijbi famili di rga'a za'ca rlia'gajca lasa'rma.

¹⁸ Zanigajca baali Satanás chu'u xcontra lasa'a bejndxabama, zanidilojgajca xyelarnebiaama. Rnin zani deen nadu por xyelarnebiaa Beelzebú rabeen bejndxaba luxtoori bejn.

¹⁹ Peri baali rabeen bejndxaba luxtoori bejn por xyelarnebiaa Beelzebú, ¿chuza rudee yelarnebiaa lojri xbejndu deen yabeerma bejndxaba? Laagajcarma bana di laadiga na ni redu. ²⁰ Peri baali rabeen bejndxaba luxtoori bejn con xyelarnebiaa Diosi, laan ren gue bazua'ne xyelarnebiaa Diosi lejtu.

²¹ 'Binua Jesús caguliima: baali tijbi bejn fuerti ca'ma ni gjapane lidxima, dichucazi bejn zajca cuan ni rajpama.

²² Peri baali yidxin bejn mazru fuerti lojma, zinma laama gan, zabeexuma ni ca'ma, choru zaca'ma gracazi ni rajpama.

²³ 'Bejn di zua'ne naj, contra naj zua'ma, choru bejn di ruto'pa bejn para naj, rtie'chalarma laarma.

Bejndxaba ni rabi'i

²⁴ Che rariaa bejndxaba luxtoo tijbi bejn, choru rizama niza loj dajn bidxi, rixhiilima lada yaziiladxima. Choru che di ridxejlama lada yaziiladxima rinma xgaba: “Güendila yabi'n lada bariaan.” ²⁵ Che rabi'ma rniamma luxtoo bejn nina, zega tijbi lanio lada babiliooba, lada banagachée. ²⁶ Choru rica'ma zagajdxari bejndxaba mazru mala lojma. Grazirma ru luxtoo bejn nina. Choru mazru nadxaba bay'a'n bejn nina que che galo.

Xechabaari bejn ruzooba Xtiidxa Diosi

²⁷ La'ti cane Jesús diidxa yeri, gurdxia'a tijbi bejngunaa naxhua lojri bejn xtala nina rema:

—Xechabaa bejngunaa bidane lij yidxilij yee, bejn baxhia'a lij.

²⁸ Peri re Jesús:

—¡Mazru xechabaari bejn rucueexhdiaga Xtiidxa Diosi, choru rinrma zega ren Diosi!

Rniaabari bejn güin Jesús tijbi milagri

²⁹ Zienro'ruri bejn bido'pa lada zua'a Jesús, choru guzuloj rema lojrma:

—Bejn rga'ri loj yidxilij yee yana, bejn mala najarma; rniabarma tijbi milagri. Peri di zanadigarman, tijbizi zega guzajca Jonás bejn bate Xtiidxa Diosi lojri bejn. ³⁰ Jonás gojca tijbi sen para bejn ni gulezari Nínive, zanigajca naj Bejn guxa'la Diosi najcan tijbi sen parari bejn nabán yana.

³¹ Che yadeeri bejn cuenta loj Diosi zaban bejn gojca reina yedxi Saba, choru laama gue castiga najca yado'lari bejn rga'a yana ni najca xcastiga Diosi, deen laama zifturo'o nazama bidagaquexhdiagama rey Salomón. Yana naj bejn zua'ne lejtu, mazru lazajcama, loj rey Salomón. ³² Zanigajcari bejn guleza Nínive, zabanrma che yadeeri bejn cuenta loj Diosi choru guerma rado'lari bejn rga'a yana xcastiga Diosi. Deen bejn Níniveri babi'rma loj Diosi che baquexhdiagarma Xtiidxa Diosi ni gune Jonás. Choru bejn zua'ne lejtu yana mazru lazajcan loj Jonás.

Loj bejn najca zega xnii

³³ 'Dichudiga bejn rucuaxhij xe nina deen guzuman lada nague'chi, o guxa'taroljma galma lojn. Rayala sun lada yenin deen gulaan bacha'a loj bejn chu'u lanio. ³⁴ Ba'lloj bejn najcan zega tijbi xhij para xcuerpama. Baali rinma ni güen, xhidibizi rcuerpama xhu'u xni. Peri baali rinma ni mala, xhidibizi xcuerpama najca zega lada nacay. ³⁵ Gojpa cudadu deen yadi chine lojlu lij nejza mala. ³⁶ Baali nega tijbi parta xcuerpa bejn di rin ni mala, cheze'e rienin nakhini zega lada caxhij xe nina.

Ni rinri mextru rajca ley conri bejn fariseo

³⁷ Che guyaaloj guna Jesú con laarma, tijbi bejn fariseo re loj Jesú, chitauma lidxima. Che gux huma gurejma rua'a mexa. ³⁸ Peri beendxia loj bejn fariseo nina yela di banaadiga Jesú che guzlojma gauma zega najca xcostumbrirma. ³⁹ Peri re Jesú lojrma:

—Lejtu bejn fariseori najcadu zega tijbi basa con tijbi platu ni naya ladi, riendu bejn za'ca peri len luxtoodu najcadu bejn mala. ⁴⁰ ¡Bejn yadari! ¿La di ragabiaadu Diosi najca bejn ni benchee xcuerpadu choru laagajcama benchee luxtoodu ya? ⁴¹ Ze'tti gola gajcane bejn dixe rajpa deen yen gualicadu bejn güen najcadu.

⁴² ¡Probiza lejtu bejn fariseo! Rabecaladu ni najca para Diosi, rindun chii la'a zega menta con ruda, choru gracazi ni ruzibindu, choru rudeedu tijbila'n loj Diosi. Peri di rindigadu zega rayalan conri bejn choru direndigadu Diosi. Gola güin cuenta Diosi choru yadi gusa'ndu gudedu ni rudeedu laama.

⁴³ ¡Probiza lejtu bejn fariseo!, Deen ruladxitu rbejdu lada rbejri bejn zobaloj len lada ro'laarma Xtiidxa Diosi, choru ruladxitu gugajpa Diosrma lejtu lunejza.

⁴⁴ 'Probiza lejtu mextru rajcari ley nega lejtu bejn fariseo, ¡bejn muxterari!, deen lejtu najcadu zega baa ni dirien, ni di rniari bejn ruleerma xhijquin.

⁴⁵ Choru guna tijbiri mextru rajca ley nina rema loj Jesú:
—Mextru, ne dunoj canexhijdxalu relu zani.

⁴⁶ Choru re Jesú lojma:

—¡Zanigajca lejtu zega najcadu mextru rajca ley, probi lejtu!, Deen rnebiaazidu bejn güinrma ni nacuan, choru

rnebiaazidu güinrman, ne lejtu di rajcanedigadu nega ta'ndoo, deen gajca zega rendu.

⁴⁷;¹Probi lejtu!, Deen rincheedu xbaari bejn rate Xtiidxa Diosi lojri bejn, bejn gojcalari. ⁴⁸Zani ragabiaari bejn ruladxicadu ni benri xbejn guayajcadu. Laarma bagüijtiri bejn bate Xtiidxa Diosi lojri bejn, choru lejtu beencheedu xbaarma.

⁴⁹Ze'ti Diosi yela ragabiaama gran, rema: "Gaxalan bejn yateri da diidxan lojdu, gaxalagajcan neri apóstol, xhu'rma gugüijtidu, choru xhu'rma chu'u xcontradu laarma deen güindu laarma xe ni mala." ⁵⁰Choru guirazidu zega nabandu yana, lejtu yadee cuenta loj Diosi por rejn ni ba guxe'ri bejn bate Xtiidxa Diosi, bejn ni güijtiri xtala che gogachee yidxilij, ⁵¹xtala xrejn Abel xtaca xrejn Zacarías, bejn ni bagüijtirma lulia'a xhidoro'o Jerusalén. Yela zani rnin lejtu, bejn ni nabanri yana, laarma quixa por grama.

⁵²;¹Probiza lejtu, mextru rajcari ley!, Deen di rulaadigadu gagabiari bejn xena gajcarma xbejn Diosi, peri negaza lejtu di rindigadu guayejn gajcadu xbejnma choru di rulaagajcadigazadu gajcarma xbejnma.

⁵³Che gune Jesús zani, bidxe'chidoxari bejn fariseori conri mextru rajca ley choru guzuloj zienro'o ni rniabadiidxarma lojma. ⁵⁴Rudxe'rma laama prueba deen gagabiaarma xe ni mala guti'irma laama.

Xlevadurari bejn fariseo

12 La'ti cane Jesús zani, guzloj cado'pa por mili bejn, xtalaro'o najcarma acazi rulayaas lasa'rma. Choru guzloj Jesús rema lojri xbejnma:

—Gola gajpa cudadu con xlevadurari bejn fariseo, deen laan ren gue gajpadu cudadu con ni rusiyerma deen rinzirma bejn za'ca peri rusiyeezirma. ²Deen dixediga ni nague'chi xhu'u ni dizayen, zanigajca dixecazi ni ralan xhu'u ni dizayagabiaari bejn. ³Ze'ti gra diidxa ni bagunedu lada nacay, zayojnri bejn laan lada nakhini. Bedari diidxa ni bagunedu ralan lanio, xhu'u dxej cuidxia'rma diidxa ninari xta xhijqui xhu.

Chu rayala guidxebidu

⁴ 'Rnin lejtu, zega najcadu da bejnan, di rdxebidu bejn renri gugüijti lejtu deen mazi zile'e gugüijtirma xcuerpado, peri xespiritudu dizajcadiga guqui'rman. ⁵ Laana gani lejtu chu rayala guidxebidu: gola guidxebe Diosi bejn rajpa yelarnebiaa deen che babaca'ma xyelanabandu zajca guza'lama lejtu gabijlij. Ze'ti gola guidxebe laama.

⁶ 'Lejtu ragabiaa dilasajcadoxadigari bixhin, peri Diosi diraalaladxidigama nega tibbirba. ⁷ Beda lejtu xta guidxaxhijquidu, gracazin nulaba Diosi. Ze'ti yadi ridxebidu deen mazru lasajcadu loj zienro'ri bixhindoo.

Yadi yatudu loj bejn najcadu xbejn Jesús

⁸ 'Rnin lejtu, gracazi bejn di rucueechiladxi naj niza lojri bejn, zanigajca naj bejn guxa'la Diosi di zucueechiladxidigan laarma niza loj xángelma najcarma Xi'n Diosi. ⁹ Bedari bejn rucueechiladxi najcarma da bejnan, zanigajca güinan laarma niza lojri xángel Diosi.

¹⁰ 'Baali xhu'u bejn xhiniexhijdx Bejn guxa'la Diosi, zin Diosi laama perdón. Peri bejn xhiniexhijdx xEspíritu Diosi, di zindiga Diosi laama perdón.

¹¹ 'Che chinerma lejtu lenri xhidoo, lojri juez o lojri guxtisi, yadi güindu xgaba xena yadxi'du xtiidxarma, nega ni guedu lojrma. ¹² Deen che guidxin gora xhiniedu, xEspíritu Diosi ná diidxa rayala guedu.

Xuenta tijbi bejn dan

¹³ Loj grari bejn zien nina gune tijbi bejn rema loj Jesús:
—Mextru, güijdxi loj da bijchin deen guneedxami ni rayala gaca'n.

¹⁴ Peri re Jesús lojma:
—¿Chuza bazuj naj zega tijbi guxtisi deen gayi'sin ni xhica'du?

¹⁵ Choru re Jesús lojri bejn rga'a nina:
—Gola gajpa cudadu, yadi seebiladxidu gajpadu xtalaro'o ni rajpari bejn garen, deen di ni rajpadiga bejn rudee yelaban.

¹⁶ Choru rima tijbi cuento rema:

—Tijbi bejn dan gojcadoxa xiama. ¹⁷ Xtalaro'n bato'pama xta nega diruragabiaama ca gudxe'cheeman choru xena güinman. ¹⁸ Beentima xgaba rema: “baragabiaan xena güinan, gusie'nan xhu lada ragu'cheen yelnaza'ca ni ra'pan, deen güinan mazru xhuro'o lada yagu'cheerin gradoo ni ra'pan. ¹⁹ Choru guejin: ¡Xtalaro'ri ni güen bara'pan para xhibaannerinan xtalaro'o yijza! Baziiladxi, gudau, wa'a, choru babaadoxo.” ²⁰ Peri re Diosi lojma: “Bejn cajy, yan guaxingajca guejtilu, choru bejn garenla yaya'ne ni babadxe'cheelu.”

²¹ Zanigajca rzajcari bejn ni rudxe'chee xenina para laagajcarma, peri loj Diosi bejn probizi najcarma.

Dixecazi rayala yidxiga'ri bejn

²² Choru re Jesús loj xbejnma:

—Yadi rindu xgaba por ni gaudu para xhibandu, nega lajdi gajcudu. ²³ Mazru lasajca yelanaban loj yelarau, choru xcuerpadu di najcadigan ganaxazi para gajcun lajdi. ²⁴ ¡Golagubiaa balori! Di rbe'quidigarba bin, di rudxe'cheedigarba ni gaurba, peri Diosi rudeema ni raurba. ¡Peri lejtu mazru lasajcadu lojrba! ²⁵ ¿Naladxidu yela güindoxadu xgaba zajca güindu xhibandu xchejduru ya? ²⁶ Baali nega laan dirajca güindu, ¿xegaza gan rindu xgaba por ni garenri?

²⁷ ¡Gola gubiaa xena rni'siri xhiaa dajn! Di rindigarin dxiin para güinchee xabarin. Peri rrin lojdu, negala rey Salomón diguzujcheedigama zega zua'cheeri xhiaa nina, mazcasi guzujcheodoxama. ²⁸ Baali Diosi rinma xhiaa dajnri güendoxa, mazi ta'ndoozi rbajnin choru re'quirin. ¿Di zinma mazru por lejtu ya? ¡Rubian gatigadu gajca guxenladxi Diosi! ²⁹ Ze'ti yadi rindu xgaba xe gaudu o xe xhia'du, yadi ganaxazi laan rindu xgaba. ³⁰ Deen bejn di nunbiaa Diosi rinrma xgaba zani. Peri lejtu xhu'u xtadadu, laama ragabiaachee xe riaadxadu. ³¹ Peri gola guidxiga'xga güindu zega rnebiaa Diosi. Deen laama runee grazi ni riaadxadu.

Yelanaza'ca xhu'u xanyabaa

³² 'Gaidoo lejtu zega zi'danaladu naj, yadi ridxebidu, deen dux Tada Diosri renma gunema xyelarnebiaama lejtu. ³³ Gola guto'o ni rajpadu choru gola gudee medi nina lojri bejn probi. Gola güinchee yijxa ni di zaxin, gola güin guayejn güindu gan yelanaza'ca ni xhu'u xanyabaa, deen nina dizajcadiga cuanri bejn gubaanin, choru dixecazi nijti, choru di zacabedigan nina. ³⁴ Deen lada xhu'u xyelanaza'cadu, nina su luxtoodu.

Gola zujsin

³⁵ 'Gola zujsin zega tijbi bejn banajcu xaba ca'a xxhijma para gusinima. ³⁶ Gola güin zega rinri mosa cabejza yadxin xpatronma, bejn ni ze lanij lada caguchiliarma, deen che rniema rua'a puerta la guixalaticazirma. ³⁷ ¡Xechabaari mosa ni zua'a naa, cabejzarma che yadxin xpatronrma lidxima! Naj rnin lejtu, laagajca patron nina cue'qui laarma rua'a mexa, choru laagajcama ca'a cumida gaurma. ³⁸ Xechabaa laarma baali zua'narma che yadxin xpatronrma, mazi yadxinma garola yeela o che ba cayakhinii. ³⁹ Gola güin xgaba, baali ragabiaa bejn na lidxin xe gora chia gubaan lidxima cuanma, dizulaadigama chu'ma lidxima. ⁴⁰ Zanigajca lejtu gola sujsin deen diragabiaadigadu xe dxej xhi'ta Bejn guxa'la Diosi stijbi.

Tijbi mosa mala

⁴¹ Choru gunabadiidxa Pedro loj Jesús, rema:
—Dada, ¿naxa dulojnu bilu diidxa ye ya o ne lojri grari bejn rga'a ye?

⁴² Choru re Jesús:
—¿Chu lojdu yee najca zega tijbi mosa za'ca ni zobaloj, ni rusa'n xpatronma laama lidxima para gudema ni gau demazri mosa nina? ⁴³ Xechabaa mosa caxhin dxiin zagadxe che yadxin xpatronma. ⁴⁴ Deen diidxalicazi rnin lejtu, zusa'n gra xeen patron nina loj mosa yee. ⁴⁵ Peri baali naladxi mosa yee: “Ragalaaru yayeeda da patronan, gazulojn gaxhinan demazri mosa yee neri bejngunaa, gazulojn gau, xhia'n xta sidxin”, ⁴⁶ deen diragabiaadigama xe dxej xe gora yadxin xpatronma. Che yadxinma, castigar'o gutema laama, choru guixaalamá laama lada rijri bejn ni di rucueexhdiaga xtiidxama.

⁴⁷ 'Deen baali tijbi mosa ni ragabiaa ni ren xpatronma güinma, choru di rijnma privinido choru di rusoobama xtiidxama, castigaro'o tedima. ⁴⁸ Peri mosa ni di ragabiaa ni ren xpatronma güinma, choru dilaa rinma, ta'nzi castiga tedima. Deen bejn badee Diosi mazru yelariejn, zienru ni rayala güinma por yelariejn ni badee Diosi laama. Zanigajca bejn badee Diosi yelarnebiaa, mazru pien ni rayala güinma por yelarnebiaa ni badee Diosi laama.

Por Jesús rlia'a lasa'ri bejn

⁴⁹ 'Zielan loj yidxilij zega tijbi bejn ni zi'la gucua xhij xenina, choru ¡naj ba rioobaladxin xhicaxhijn! ⁵⁰ Peri gallo gaden loj tijbi prueba nacuan, choru ¡gazagadijdoxan xta yidxin gora nina! ⁵¹ ¿Lejtu nagondu bielan para cuedu güen loj yidxilij yee ya?. Naj rnin lejtu, di yela zanidiga bielan, zielan deen zielagalal'n lasa'du. ⁵² Deen desde yana, lada narma jaay loj tijbi famili, tili choonarma contra tio'parma, choru tio'pama contra choonarma. ⁵³ Dada chu'u xcontra xi'nma, choru xi'nma chu'u xcontra laama; naa chu'u xcontra xi'nma, xi'nma chu'u xcontra laama; nasuegra chu'u xcontra xgualidxima, choru laami chu'u xcontrazami laama.

Sen ni yen xanyabaa

⁵⁴ Re Jesús lojri bejn:

—Che rubiaadu zidaza bej xanyabaa redu: xhia yayeeda, choru rayeedapaca xhia zeganadu. ⁵⁵ Choru che rubiaadu rbi'doxa bii redu: nalaadoxa gajca, choru nalaapaca rajca. ⁵⁶ ¡Bejn muxterari! Lejtu ragabiaadu xe ren gue sen ni rien xanyabaa con yidxilij yee, ¿choru yexaza di ragabiaadu ni cayajca loj yidxilij yee yana?

Gola yayagaza'ca con bejn ridxe'chi lejtu

⁵⁷ ¿Yexa di rindu xgaba con ni na zagadxe ni güindu?

⁵⁸ Baali chu bejn ruti'pi lij xe ni mala choru rutema lij loj guxtisi, been guayen gule'quicheene laama diidxa, deen yadi chinema lij xta loj juez. Baali di zinlu zani, gude juez nina lij lojri gusiliari choru chinerma lij len ladixhiiba. ⁵⁹ Naj rnin

lojlu, di zariaanejzadigalu ladxixhiiba xta quixalu gra ni ná juez nina lojlu.

Gola güin xgaba por xdoladu

13 Che tiempa bi'ta, xhu'ri bejn rerma loj Jesús, Pilato bejn gojca gobernador romano guxa'lama bejn ni chigugüijtiri bejn Galilea, bagüijti Pilato laarma la'ti cagudee xgonrma loj Diosi. ²Choru re Jesús lojrma:

—¿Lejtu rindu xgaba guzajcarma zanideen rajpadrurma dola que loj demazri bejn Galilea ya? ³Baali lejtu di zuchaa xgabadu choru di rucueexhdiagadu Diosi, nedu guejti zega laarma. ⁴Lejtu ragabiaadu ni guzajcari chieenubichoonaari bejn bida'cu torre gusojba Siloé, ¿Naladxitu guzajcarma zani yela rajpadrurma dola loj demazri bejn Jerusalén ya? ⁵Baali dizuchaa xgabadu xena xhibandu, nedu guejti zega laarma.

Xcuenta tijbi yaga higo

⁶Choru re Jesús diidxa yeri:

—Tijbi bejn gojpama yaga higo lada na'nma uva, choru che bigabiaama la caa higo lojn, nega tijbin dixe ca. ⁷Choru rema loj bejn rajpa yaga ninari: “Bagojca choon yijza rielagubian yaga ye baali bacan, peri dixecazi rdxejlan lojn. Ze'ti guttiigadlan deen nagüeegazi rijnin yee.” ⁸Peri re bejn ni nulenin loj xpatronma: “Dada, zuzojbatizin stibijza, deen guquiejn xhuj xanin, choru gudxe'nan xcui'chi. ⁹Baali stibijza bacan yaya'nin nina, peri baali digajca zacan, ba zajca gure'xilun.”

Rasiajca Jesús tijbi bejngunaa che raziiladxirma

¹⁰Tijbi sabudu cagulii Jesús len xhu lada ro'laarma Xtiidxa Diosi, ¹¹nina zua'a tijbi bejngunaa ni bagojca chieenubichoonyijza ragaxuma, deen bejndxaba basa'n xijchama nalejcu choru di rajcacazi yalima nega ta'ndoo.

¹²Che guna Jesús laama, gunema laama rema:

—Náa, Diosi rasiajcama yelaxhijdxu ni rajcalu.

¹³ Choru baqui'ma laama, lugoraze'gajca balí xijchama, choru guzloj ruza'tama Diosi zagadxe. ¹⁴ Peri bejn ni rnebiaa len xhu lada rusiidirma Xtiidxa Diosi bidxe'chidoxama Jesús por ni benma lojri dxej ni raziliadxiri bejn. Yela zani bejn rnebiaa yee, rema lojri bejn rga'a nina:

—Xo'pa dxej xhu'u para chu güiin dxiin, stijbi dxej xhu'u yaziiladxirma, lejtu rayala xhi'tadu lojri dxej nina para yayajcadu, peri di che raziliadxidigma.

¹⁵ Badxi'i Jesús xtiidxaama rema:

—Bejn muxterari, ¿di rulaa xburadu o xbedu chixhia'riba nijsa dxej raziliadxirma ya? ¹⁶ Peri bejngunaa ye lasajcaduruma lojri bura o be deen nazama loj xdiao Abraham, choru bagojca chieenubichoonyijza nijn bejndxaba laama see, ¿dizajca yayajcama lojri dxej raziliadxiri bejn ya?

¹⁷ Che rema zani, gracaziri bejn ni rdxe'chi laama batuu, peri dimazri bejn rga'a nina babaadoxarma por ni ben Jesús.

Xuenta tijbi xaj mostaza

¹⁸ Re Jesús:

—¿Xena na xyelarnebiaa Diosi o xe gulin lojdu deen chigania'du xena najca xyelarnebiaama? ¹⁹ Najcan zega tijbi xaj mostaza ni basibin bejn loj xxhiniaama, guni'sin gojcan tijbi yagaro'o. Tantu yagaro'o gojcan xta xtia'sari bixinrudxe'riba xidxun.

Xuenta levadura

²⁰ Re Jesús stijbi:

—¿Con xeru zajca ganin xena na xyelarnebiaa Diosi?

²¹ Najcan zega levadura ni rugo'cha tijbi bejngunaa loj zienro'o harina, mazi gaidoosi levadura bagojchaman, guzaaxhij coba nina.

Rua'a puerta ni nadee

²² Che ze Jesús neza Jerusalén, ruliima bejnri luyedxi ro'ri neri yedxi maama niza rdema. ²³ Dxela gunabadiidxa tijbi bejn loj Jesús rema:

—Dada, ¿gayziri bejn gajca perdón ya?

Reti Jesús lojma:

²⁴—Gola güin guayen gola chu'u rua'a puerta nadee. Deen naj rnin lojdu, zienri bejn guen chu'u, peri disajcadigarma.

²⁵Deen che yaseegu bejn najca lidxi rua'a puerta nina, lejtu zega zua'du fuera xhiniedu guedu: “Dada, guxala Deen gajca yad xu'nu”. Peri laama nama: “Dinunbiaadigan lejtu.”

²⁶Choru suloj guedu: “dunoj bidau, bidua'nenu lij, choru lij balii dunoj niza lada najca duxnejzanu.” ²⁷Peri nama lojdu: “¡Ba rnin lojdu, di nubiaadigan lejtu! Gola coobaca cue'n, bejn dolari.” ²⁸Nina gondoxadu, xta gau laydu tantu naya sudu che xhiniadu Abraham, Isaac, Jacob, loj xyelarnebiaa Diosi choru graziri bejn ni rate Xtiidxa Diosi lojri bejn, peri lejtu di zajcadiga sunedu laarma. ²⁹Choru xhi'tari bejn rga'a xhidibi loj yidxilij yee deen cuerma gaurma lada rnebiaa Diosi. ³⁰Bejn dixegan yana laarma gajca bejn zobaloj, choru bejn zobaloj yana, laazarma gajca bejn chigara.

Re Jesús guejtima Jerusalén

³¹Lugoraze'gajca bidxin tiobachoonri bejn fariseo rerma loj Jesús:

—Baxiin, deen laa rey Herodes ren gugüijti lij.

³²Reti Jesús
lojrma:

—Gola chiaj gola chiyedxi loj bejn muxtera ze'e: “Yana, ne guixe yaben bejndxaba, choru yasiajcan bejn ragaxuuri, choru che yayondxej gusiaaloj da dxiinan.” ³³Peri naj rayala chinua da nejzan yana, ne guixe, ne güidxa, deen di rayaladiga guejti tijbi bejn ratee Xtiidxa Diosi lojri bejn yedxi garen.

³⁴, ¡Bejn Jerusalén, bejn Jerusalén, rugüijtidu bejn ratee Xtiidxa Diosi lojri bejn, rucooxhiajdu bejn rixa'la Diosi lojdu! ¡Belaxa baguyenan nuchagan lasa'du zega rijn tijbi xhidi rato'pa xi'nba, ragu'ba laarba len xiliba, peri lejtu di cuejbidigadu! ³⁵Yela zani Diosi guza'n lejtu. Choru rnin lejtu, yan diru zubiadigadu naj xta che guidxin dxej guedu: “¡Diosi rubiaa zagadxe bejn zi'ta por laama!”

**Raziajca Jesús tijbi bejn
xhu'mala rzaaxhij xcuerpama**

14 Tijbi dxej che raziiladxirma, bitau Jesús lidxi tijbi bejn fariseo rnebiaa. Xhu'ri bejn fariseo rga'a nina cagule'chi laama baali xeni güinma,² dxela gubiga tijbi bejn nixhioo ni xhu'mala rzaaxhij xcuerpama.³ Choru gunabadiidxa Jesús lojri mextru rajca ley con lojri bejn fariseo rema:

—¿Zajca yayajca bejn ragaxuu dxej raziiladxiri bejn ya o dizajcan?

⁴ Peri dixecazi reri bejn nina. Choru baqui'i Jesús bejn ragaxuu nina, basiajcama laama, choru rema: ba zajca yaxhiajlu.⁵ Choru re Jesús lojri bejn fariseo conri bejn rajca ley rga'a nina:

—Baali tijbi xi'ndu o tijbi xgo'ndu, taya'ba len bize, ¿di la zabeegajcadu laaba mazi na dxej raziiladxiri bejn ya?

⁶ Peri dixediga gojca nadxi'rma lojma.

Yadi rinlu bejn zobaloj

⁷ Che guna Jesús rberi bixioza cuerma lugar lada rbejri bejn mazru zobaloj, rema lojrma:

⁸ —Baali chu ná lojlu chialu loj tijbi lanij lada caguchiliarma, yadi cuelu lugar lada rbejri bejn mazru zobaloj. Deen zajca xhi'ta stijbi bejn mazru zobaloj lojlu,⁹ choru xhi'ta bejn gune lij nama: “Badee lada zojbalu cue bejn yee.” Choru dibi ratulu chisujlu, chisobalu xta trasa.¹⁰ Ze'ti baali che churi bejn xhiniee lij, biaj peri gurej xta trasa, deen che xhi'ta bejn gune lij nama lojlu: “Amigo gudaa, gurej yee lada rbejri bejn mazru zobaloj.” Deen zani xhinieza'cari bejn rga'a nina lij.¹¹ Bejn rin bejn zobaloj zaya'n xtuma, bedaza bejn ni di rin bejn zobaloj, laama gajca bejn zobalojduru.

¹² Choru re Jesús loj bejn gune laama:

—Che güinlu tijbi lanij, yajcadi xhinie xamigolu, nega lasa'l lu nega bejn dan rbeza gajxa lidxilu. Deen laarma zajcagajca xhiniarma lij che güinrma lanij.¹³ Zan che güinlu tijbi lanij gune bejn probiri, bejn di xe xhia'a yaa, bejn di rajca sa, choru bejn natie'pa loj.¹⁴ Xechabaa lij baali güinlu zani, deen laarma si dizajcadiga yaneerma ni badeelu laarma. Peri che guidxin dxej yabanri bejn bazooba Xtiidxa Diosi, che ze'e zayiixa Diosin lojlu.



Copyright © Global Recordings Network. Used with permission.

San Lucas 14:15-24

Xuenta bejn ben tijbi lanij

¹⁵ Che bin tijbi bejn zojbane Jesús rema lojma:

—Xechabaari bejn rayala gau lada rnebiaa Diosi.

¹⁶ Choru re Jesús lojma:

—Tijbi bejn bayaanma bejnri xchee, xtalaro'ri bejn gunema gudau lidxima. ¹⁷ Che bagulora gaurma, guxa'la xmosama deen chiyedxima lojri biooza nina: “Gola taa, laa gran banajca.”

¹⁸ Peri tijbi tijbirma di cuejbidigarma. Bejn galoo rema: “Guzin tijbi xhuj choru yana ringuayen chigubianan, been güen güijdxi lojma gajpama naj pacensi.” ¹⁹ Stijbima re: “Guzin jay nejza go'n, choru yana chiyanan laarba prueba, been güen güuidxi lojma gajpama naj pacensi.” ²⁰ Stijbima re: “Yanaga bachiliaan dizajcadiga gazaan.” ²¹ Choru baxhiaj mosa nina choru rima diidxa loj xpatronma ni reri bejn nina lojma.

Bidxe'chidoxa patron nina, choru rema loj xmosama: “Baquier biaj yana galay luyedxi, ladari nejza, choru dane bejn probiri, bejn natie'pa loj choru bejn ni di rajca sa.” ²² Choru che babeen mosa nina zani rema loj xpatronma: “Dada, laana babena zega naluu, peri sta xhu'u lajta lidxilu.” ²³ Choru rema loj xmosama stijbi: “Biaj lojri nejza cartera, ne niza lojri nejza la'sa, choru been lafuerzi bejnri xhi'tarma deen cha lanio lidxin.” ²⁴ Deen rnin lojlu, nega tijbiri bejn ni gunen galoo dizauj xchee lidxin.”

Ni rayala güinri bejn ren chinala Jesús

²⁵ Zienro'ri bejn zinala Jesús, choru badxi'i lojma rema lojrma:

²⁶—Baali chu xhiidanala naj, rayala guendu naj mazru loj xtadadu, loj xniaadu, loj xbejngunaadu, loj xi'ndu choru loj bijchidu, loj bizandu, choru mazru guendu naj loj xyelnabandu, deen baali di zindu zani di zajcadiga gajcadu da bejnan.

²⁷ Baali chu ren xhiidanala naj, choru direnma sagadijma xta guejtima por naj, di zajcadiga gajcama da bejnan.

²⁸ 'Baali chu ren güin tijbi xhuro'o, ¿di galoxga cuema güinma xgaba baali zadaan xmedima gusiaalojman ya? ²⁹ Deen baali zuloj gudxe'ma xhia'n choru di zusiaalojman, gracaziri bejn xhinieya laama, ³⁰ guerma: "Guzlojzima caxhinma xhu, choru nega di gojca nusiaalojman."

³¹ O baali tijbi rey tiline stijbi rey, ¿di galoxga cuema güinma xgaba baali zinma gan con chii mili xsoldadoma loj stijbi rey ni ziidane gajla mili xsoldadoma ya? ³² Peri baali rubiaama di zinma gan loj rey nina, la'ti zua'a rey nina ziju, guixaalama bejn ni chine xrazonma deen yaya'nrma diidxa di zudiga guadilij. ³³ Yan, zanigajca rnin lojdu, baali di zusa'ndu gra ni rajpadu di zajcadiga gajcadu da bejnan.

Baali di zajca zedi naxij

³⁴ Choru re Jesús:

—Ni güen najca zedi. Peri baali di naxijn, ¿xenaga yayaga naxijn stijbi? ³⁵ Dixecazi sirvan nega para luxhuj, nega para xcui'chi, xhigo'nzin. ¡Bejn ren gucueexhdiaga, gola guqueexhdiaga!

Xuenta xili ni gunijti

15 Grari bejn ruquixa impuesto choru ne demazri bejn dola bibigarma lada zua'a Jesús deen gucueexhdiagarma ni rniema. ² Bedari bejn fariseo conri mextru rajca ley rmieyarma laama, rerma:

—Bejn ye ruchaaganema bejn dolari, choru raunema laarma.



Copyright © Global Recordings Network. Used with permission.

San Lucas 15:1-7

³ Choru bi Jesús cuento ye lojрма:

⁴ —Baali tijbidu rajpadu tibigaxhuaa xili, choru runijtidu tijbiba, ¿di ruza'ndu za tajpa galachiibiga dajn deen chigadiilidu xili gunijti nina, xtacazi yadxeladu laaba ya?

⁵ Choru che radxeladu laaba rabaadu, rixoobadu laaba yejndu.

⁶ Choru che radxin lidxidu, ruto'pa xamigodu conri xbesindu, choru redu lojрма: “Gol taa, gola yabaane naj, deen babadxejla da xilin be gunijti.” ⁷ Yana, rnin lejtu, zanigajca rabaa Diosi conri xángelma por tijbi bejn dola ni ruchaa xyelanaban, loj tapagalachiibigari bejn za'ca ni di naquiin guchaa xyelanaban.

Xcuenta medi ni bigo'n

⁸ “Zanigajca baali tijbi bejngunaa rajpama chii medi ni plata, choru bigo'n tijbin, ¿di ruze'quima xhij choru ruloobama lanio nina choru con cudadu raxhiiliman xta yadxejlaman ya?

⁹ Che radxejlaman, ruto'pa grari xamigoma conri xbesinma, choru rema lojрма: “Gola yabaane naj, deen babadxejlan medi ni bigo'n.” ¹⁰ Yan, naj rnin lojdu, zanigajca rabaa Diosi conri xángelma por tijbi bejn dola ni ruchaa xyelanaban.

Xcuenta bejn rijn perdón xi'n

¹¹ Regajca Jesús lojрма:

—Tijbi bejn guxhu tio'pa xi'nma. ¹² Biin rarojpa nina re loj xtadami: “Dada, banee ni rado'la gaca'n.” Choru bala'ma

grari xeenma loj gropari xi'nma. ¹³ Di gogaxchejdiga cua'a biin rarojpa nina ni badee xtadami laami, bato'mi gran, choru con medi nina biriaazami bijalmi zifturo'o biyeenmi ni guyentizimi nina choru biganijti xlia'a grazi xmedimi. ¹⁴ Peri che bara xmedimi, guxhu gubin niza lada zua'mi, choru guzuloj riaadxa ni gaumi. ¹⁵ Biganabatimi dxiin loj tijbi bejn rbeza nina, laama guxa'lama laami chigajpami xcuijchima xiama. ¹⁶ Peri tantu rlianmi xta ni rauri cuijchi nina renmi gaumi, peri dixecazi badeerma laami. ¹⁷ Choru beentimi xgaba: “¡Zienro'ri bejn rin dxiin lidxi da dadan, xta sobri rin ni raurma, choru naj yee barejtin bejzu! ¹⁸ Yan, yazaan yaya'a lidxi da dadan choru guejpin lojma: Dada, ba benan dola loj Diosi choru ne lojlu. ¹⁹ Diru rayaladiga xhinielu naj xi'n; been naj cuenta zegazi tijbiri xmosalu.” ²⁰ Choru baxhunejzami ziá lidxi xtadami.

’Peri ziftula sigadxin lidxi xtadami che gunama laami, bayama laami choru ruxiinma bigachaagarlojma laami, gudiidxima laami choru guzuloj rdeema laami xidu. ²¹ Choru re loj xtadami: “Dada, babenan dola loj Diosi choru ne lojlu, diru rayaladiga xhinielu naj xi'n.” ²² Peri re xtadami lojri xmosama: “Gola guquien gola dane lajdi za'ca, gola gugajcun laami, sanigajca gola gudxe'e tijbi xhiibanili yaami, choru gola



Copyright © Global Recordings Network. Used with permission.

San Lucas 15:11-32

gudee ni gulemi. ²³Gola chica'a go'n quie'n mazru xhu'u dan, choru gola gugüijti laaba deen xhidauri yeenri lanij. ²⁴Deen para naj bagüijti da xi'nan choru yana bababanmi, gunijtimi peri yana babadxejlami." Choru guzuloj caxhinrma lanij.

²⁵'Choru stijbi xi'nma biin galo zua'timi luxhniaa. Che bazigadxingajxa lidximi, bijnmi cagucuejdxirma choru caguya'rma. ²⁶Gunetimi tijbiri mosa zua'a lidximi, choru gunabadiidxami lojma xe cayajca. ²⁷Choru mosa nina rema: "bijchilu babayeeda yela zani se'ti gunabiaa xtadalu guejti tijbi go'n quie'n mazru xhu'u dan, deen nadanmi bayeedami." ²⁸Choru bidxe'chidoxami, nega di guyenmi nixhumi. Zanizi biriaa xtadami gunabama lojmi yaxhumi. ²⁹Choru re loj xtadami: "Lij ragabiaalu belijza ba gojca caxhinneen lij dxiin, ganaxa ruzoban xtiidxalu, peri nega tibiaja gadilu guneedxa tijbi chibadoo deen güinneeri da amigon lanij. ³⁰Peri yana bayeeda xi'nlu, biin biganijti xlia'a xmedilu lojri bejngunaa dxiaa, gunabiaalu guejti go'n quie'n mazru xhu'u dan para laami."

³¹Choru re xtadami lojmi: "Xi'n, lij rbezagadiaanelu naj choru gracazi ni ra'pan na xeenlu. ³²Peri yana rayala yeenri lanij yabaari, deen bijchilu biin naladxin bagüijti bababanmi, gunijtimi peri babadxejlami."

Xuenta tijbi mosa ni rnebiaari mosa

16 Bigajca Jesús nine loj xbejnma rema:

—Guxhu tijbi bejn dan gojpama tijbi mosa ni gojpa grazi xyelanaza'cama. Choru tibi dxej biyedxiri ben lojma cagunijti xlia'a mosa nina ni najca xeenma. ²Choru guneti bejn dan nina laama rema: "¿Xe ne cayonan reri bejn caxhinlu? Bate cuenta lon ni rijnlu, deen diru zunedigan dxiin güinlu." ³Choru guzuloj been mosa nina xgaba naladxima: "¿Xenaga güinan yana bayasa'n da patronan naj sin dxiin? Dixediga gojla xhu'n güinan dxiin dajn, choru ratuzan ganaban carda. ⁴Baragabiaan xe güinan deen guenri bejn naj che diru xe dxiin ga'pan." ⁵Choru gunema tijbigari bejn rajla loj xpatronma, rema loj bejn bidxin galo: "¿Blaca rajlalu loj da patronan?" ⁶Choru re bejn nina: "Tibigaxhuaa barril zeti rajlan lojma." Choru reti bejn yee lojma: "Cua'a xyichilu lada ca lajlu choru la gurejticazi been stijbin bacaa lojn rajlalu tiaabichizin." ⁷Choru

gunabadiidxama loj stijbima rema: "Lijza, ¿blaca rajlalu loj da patronan?" Choru re bejn nina: "Tibigaxhuaa bulti trigo rajlan lojma." Choru re mosaa nina: "Cua'a yi'chi lada ca lajlu choru la gurejticazi been stijbin bacaa lojn lada rajlalu tapagajlan."⁸ Badxiadoxa loj patron nina deen yela nasin mosa mala yee por ni benma. Rnин lojdu, bejn ni di zinala loj Xtiidxa Diosi masiru nasinrma raxhilimodarma xena su zagadxenerma bejn garen, queri bejn zinala loj xnejza Diosi.

⁹ Binua Jesús rema:

—Ze'ti rnin lojdu, gola güinne dxiin yelanaza'ca ni rajpadu loj yidxilij yee para gajcanedu bejnri deen chu'u xamigodu, deen che yara ni rajpadu, baxhu'u bejn yaca'a lejtu lada gajpadu yelnaban tibilayaa.

¹⁰ Bejn rin zega rayalan con ta'n ni rajpama, zinnegajcama zagadxe con xhoron. Zanigajca bejn di rinne zagadxe con ta'n ni rajpama, di zingacadigama zagadxe con xhoron.¹¹ Yana zanigajca baali di zinnedu zagadxe con yelanaza'ca xhu'u loj yidxilij yee, ¿chuza guxenladxi lojdu yelanaza'ca ni xhu'u xanyabaa?¹² Baali di zinnedu zagadxe con ni di najca xeendu, ¿chuza gunee lejtu ni rayaladu?

¹³ Nega tijbi mosa dizajca güin dxiin loj tio'pa patron; deen zadxe'chima tijbima choru zenma stijbima; o zajcama bejn za'ca con tijbima, choru di zendigama stijbima. Zanigajca lejtu dizajcadiga güindu xchiin Diosi, choru güingajcadu dxiin lada güindu gan xoro'o medi.

¹⁴ Choru bejn fariseori bejn mazru renri medi che baqueexhdiagarma ni re Jesús, guzuloj rniexhijdxarma laama.

¹⁵ Choru re Jesús lojrma:

—Lejtu rindu bejn za'ca niza lojri bejn, peri Diosi nunbiaa luxtoodu; ni naladxi bejn lazajcadoxa loj xhidxili yee, di dixecazi ganin para Diosi.

Xley Moisés con xyelarnebiaa Diosi

¹⁶ Xley Moisés ne ni bacaari bejn ni bate Xtiidxa Diosi lojri bejn, naga'n xta che gadi Juan bejn baroobanijsa bejnri xhi'ta. Desde che bidxinma guzloj bire'cha Xtiidxa za'ca Diosi xena najca xyelarnebiaama, choru zienri bejn caxhin guayen chu'u lojn.


¹⁷ 'Dilaxo'o nijti xanyabaa con yidxilij yee, que yaya'n tijbi diidxa ca loj ley ni di zajca cumplido.

Rulii Jesús xcuenta che rala'a lasa'rma

¹⁸ 'Baali chu bejn nixhoo rala'ne xbejngunaama, choru raca'ma bejn garen, dola caxhinma. Zanigajca bejn nixhoo ni yaca'a bejngunaa ni ba bala'a xnixhoo, dolagajca nan caxhinma.

Tijbi bejn dan con Lázaro

¹⁹ Guxhu tijbi bejn dan, guzujcheodoxama con ganaxa lajdi za'ca, choru guixe guixe roucheema. ²⁰ Sanigajca guxhuza tijbi bejn probi birelaj Lázaro. Laama ni xhidibicazi ladima gojcha yedxu rudxa loj, choru rbejma rua'a xpuerta bejn dan nina. ²¹ Renma gouma masu ni ridaya'zi xan xmexa bejn dan nina. Choru xtari be'cu rlie'e loj yedxu yuudxa ni rajchama. ²² Che bidxin dxej güijti Lázaro baxhiaganeri xángel Diosi laama xanyabaa lada zua'a Abraham. Nega bejn dan nina güijtima choru bigaque'chirma laama. ²³ Che ba cazagadiaj bejn dan ye loj xhij re'qui, gulejsa lojma



Copyright © Global Recordings Network. Used with permission.

San Lucas 16:19-31

xanyabaa choru gunama Lázaro zua'ma cue'e Abraham.

²⁴ Choru gurdxia'a bejn dan nina rema: "Dada Abraham, baya naj, guxa'la Lázaro deen guguadxa lupunta xbacuenma deen xhi'ta gusia'laxhujma lidxin, deen cazagadiadoxan loj bajla ye." ²⁵ Peri re Abraham lojma: "Xi'n, bazaaladxi güendoxa gubajnlu loj yidxilij, choru Lázaro guzagadiajdoxama. Yana laama rayala su zagadxe yee, choru lij cazagadiajlu. ²⁶ Choru tijbi bala'a ni naxijta ro'o nala'a dulaari, bejn zua'ri yagaj dizajcadiga terma yee, choru bejn zua'zari ye dizaggadiga terma yagaj."

²⁷ Choru re bejn dan nina lojma: "Rniaban lojlu Dada Abraham, been güen guxa'la Lázaro lidxi da dadan.

²⁸ Deen xhu'u za jaiiri da bijchin, deen chigusinma lojrma deen yadi xhi'tarma lada xhu'u castigar'o yee." ²⁹ Peri re Abraham lojma: "Barajparma yi'chi bacaa Moisés con yichi ni bacaari bejn bate Xtiidxa Diosi lojri bejn, guzobazirma diidxa ca lojn." ³⁰ Choru re bejn dan nina: "Dizajcadigan dada Abraham, peri baali yaban tijbi bejn güijti chiguliilojma lojrma zuchaa xyelnabanrma." ³¹ Peri re Abraham lojma: "Baali laarma di rincuentarma ni bacaar Moisés, nega ni bacaari bejn bate Xtiidxa Diosi lojri bejn, di zaliiladxigagcadiarma, mazi yaban tijbi bejn bagüijti."

Bejn ruque'la bejn deen güinma dola

17 Re Jesús lojri xbejhma:

Ganaxa xhu'u xe ni ruque'la güinri bejn dola,

peri iprobiza bejn ruque'la stijbi bejn deen güinma dola!

² Para laama güenduru guixiirma xhiaj mulin yenma choru guza'larma laama loj nijsadoo, lugardi guqueelama stijbi bejn ni toru guzloj rliiladxi naj güinma dola. ³ ¡Gola gajpa cudadu!

'Baali tijbi bejn zega rliiladxitu naj rin xe ni mala contra lij, gunenee laama. Choru baali guchaa xgabama por ni benma, been laama perdón. ⁴ Mazi gadxa biaja güinma dola contra lij len tibidxejzi, choru gadxa biaja xhiida ganaabama perdón lojlu, nama: "Been naj perdón, diru zinadigan zani", been laama perdón.

Ni rin yelarliiladxi

⁵Reri xapóstol Jesús lojma.

— Gojcane dunoj deen gajca mazru xhireladxinu lij.

⁶Choru re Jesús lojrma:

—Baali lejtu rliiladxidu masu sega mididu najca xaj mostaza, zajca guedu loj yaga sicómoro yee: “Bia'xu yee, choru bigazoba loj nijsadoo”, zuzooban xtiidxadu.

Ni rayala güin tijbi mosa

⁷Ye'chiri tijbidu rajpa tijbi mosa ni ruga'n xiadu o rajpama xbeyi'xidu, choru che rayeedama, ¿yexa redu lojma: Guxhuu, gurej choru gudau ya? ⁸Di redigadu zani, zan redu: “Bachaa xabalu, been ni gaun, guda'n Choru guzunala naj. Che chaaloj gaun choru xhia'n bazajcaza gaulu.” ⁹Choru negala xquixti di zudeedu loj mosa nina por ni benma, deen caxhinma ni rayala güinma. ¹⁰Zanigajca lejtu che ba beendu gra ni na Diosi güündü, gola gue: “Mosa ni di xe sirvazi dunoj, deen bieenun gananaxazi ni rayala nieennu.”

Rasiajca Jesús chiiri bejn rajca yelaxhijdxla lepra

¹¹Che ze Jesús Jerusalén, gudema lada nadxaagari Galilea con Samaria. ¹²Choru che caxhuma tijbi yedxidoo, bigachaagarloj chiiri bejn nixhoo laama, bejn rajcari yelaxhijdxla la lepra. Peri ziftula zua'rma, ¹³gurdxia'rma rerma:

—¡Jesús, Mextru, baya dunoj!

¹⁴Che guna Jesús laarma, rema lojrma:

—Gola chiaj golachigulii xcuerpadu lojri bixioza.

Ne la'ti zerma tibinejza, baya xcuerparma yelaxhijdxla ni rajcarma. ¹⁵Choru tijbima che gogabiaama babayajcama, babi'ma, rbidxidajima ruza'tama zagadxe Diosi. ¹⁶Choru bazuj xibima loj Jesús, basajba lojma xta luxhuj badeema xquixti lojma. Ne ze'ti bejndo yee bejn Samarian. ¹⁷Choru re Jesús:

— ¿Di chiidiza najcari bejn bayajca ya? ¿Conza za gaarma?

¹⁸¿Xe, tijbizi bejn ziftu yee babi'i badee xquixti loj Diosi ya?

¹⁹Choru re Jesús lojma:

—Bisuj. Baxhiaj. Babayajcalu yela rliiladxilu naj.

Xena gajca dxej yayeeda xi'n Diosi

²⁰ Gunabadiidxari bejn fariseo loj Jesús goca xhi'ta xyelarnebiaa Diosi, choru laama badxi'man lojrma rema:

—Zega xhi'ta xyelarnebiaa Diosi di Zajcadiga gubiaadun.

²¹ Dichudiga gue: “Laan zua'a yee”, o “Laan zua'a ni”, deen xyelarnebiaa Diosi ba zua'nelan lejtu.

²² Choru re Jesús lojri xbejnma:

—Zadxin dxej guendu gubiaadu naj Bejn guxa'la Diosi masu tijbidxej, peri di zanadigadu naj. ²³ Xhu'ri bejn ná lejtu:

“Laama zua'a yee”, o “Laama zua'a ni.” Peri yadi chiadu, yadi chinaladu laarma. ²⁴ Deen zega che re'pi nijsa rulaan bacha'a xanyabaa tijbi ladu xta stijbi ladu, zanigajca gajca che yelan loj yidxiliyyee stijbi, naj Bejn guxa'la Diosi. ²⁵ Peri galoxga rayala gazagadiajdoxan choru dizendigari bejn rga'a yana naj. ²⁶ Zegagajca gojca che tiempa guban Noé, zanigajca gajca che yayelan naj Bejn guxa'la Diosi. ²⁷ Deen tiempa ze'e gudauri bejn, gua'rma, bachiliaarma choru badee xi'nrma guchiliaarimi, xta che bidxin dxej guxhu Noé len barcuro'o ni benma, choru been xhia dojxa bagüijtin gramma. ²⁸ Zanigajca gojca che guban bejn brelaj Lot, gudauri bejn, gua'rma, bato'rma, guziirma, basibinrma, choru beencheerma xhuri.

²⁹ Peri che biriaa Lot yedxi Sodoma, guzloj biajba bajla xan yabaa con azufre, choru bagüijtin grazirma. ³⁰ Zanigajca gajca che yayelan stijbi, Naj Bejn guxa'la Diosi.

³¹ Dxe gajca zani, bejn ye'pi xhijqui xhu, yadi yayejtama chigaleema ni nudxe'ma lanio. Choru bejn zua'a luxhniaa, yadi yabi'i lidxima xe chigaxiima. ³² Golayazaaladxi ni guzajca xgunaa Lot. ³³ Bejn rin mazru por yelanaban ni rajpama loj yidxilij yee, zadxin dxej diru zajpadigaman, peri bejn guejti por naj, zabajnma tibilayaa loj Diosi.

³⁴ 'Naj rnin lejtu, guaxin ze'e lada naga'a tio'pari bejn tijbizi luloon, tijbima yaxhiaj, stijbima yaya'n. ³⁵ Lada cayojta tio'pari bejngunaa, tijbima yaxhiaj, stijbizama yaya'n. ³⁶ Choru lada zua'a tio'pari bejn nixhioo luxhniaa, tijbima yaxhiaj, stijbima yaya'n.

³⁷ Che baqueexhdiagari xbejn Jesús zani, rerma lojma:

— ¿Caza guliiloju Jesús?

Choru rema:

—Lada naga'a tijbi be güijti, nina rido'pari bijcu.

Xuenta tijbi bejngunaa bizejbi con tijbi juez

18 Bi Jesús tijbi cuento lojri xbejnma para gulima laarma rayala cuedxi xhiniabarma loj Diosi gracazi dxej sin guidxeeladxirma. ² Rema lojrma:

—Guxhu tijbi yedxi lada guxhu tijbi juez, di bidxebidigama Diosi choru di beencuentacazima bejnri. ³ Luyedxize'gajca guleza tijbi bejngunaa bizejbi, rniabama loj juez nina deen gutema castiga bejn ridxe'lchi laama. ⁴ Peri juez nina, xchero'o di beencuentadigama bejn bizejbi nina, peri después beenma xgaba: “Mazi di ridxebin Diosi, choru di rincuentan bejnri, ⁵ peri bejngunaa yee sta zi'tayeen nagueegama naj. Ga'caneedilan laama deen yadiru chinua xhi'tama lon, güenloj gadi da pacensin chigara.”

⁶ Choru re Jesús lojrma:

—Zani re juez mala nina. ⁷ Xepaza mazru zajcane Diosi bejn gulema, bejn rniaba lojma dxejzi yeela. ¿Yexa zagalaama gajcanema laarma ya? ⁸ Naj rmin lejtu, di zagalaadigama. Peri che yelan stijbi, naj Bejn guxa'la Diosi, ¿la zadxejlarun bejn rliiladxi Diosi loj yidxiliij ye ya?

Xuenta bejn fariseo con bejn ruquixa impuesto

⁹ Choru bi Jesús stijbi cuento parari bejn rin xgaba najcarma bejn za'ca choru di renrma bejn garenri, rema:

¹⁰ —Tio'pari bejn nixhoo biajirma len xhidoro'o Jerusalén, lada guredxirma Diosi, tijbima najca bejn fariseo, stijbima najca bejn ruquixa impuesto. ¹¹ Bejn fariseo yee, zua'lima rbejdxima Diosi, rema: “Diosi xquixti runen lojlu, deen dinajcadigan zega najcari bejn garen, zega najcari bejn gubaan, bejn malari, bejn rcaneri bejngunaa garen, negala zega najca bejn ruquixa impuesto yee. ¹² Tio'pa biaja di raudigan len xman, choru gra ni ra'pan rinanan chiiga, choru runedxan tijbin lojlu.” ¹³ Peri bejn ruquixa impuesto nina, ziftula zua'ma nega di rayaxa xhiliejsa lojma xanyabaa, reezila luxtooma rema: “¡Diosi baya naj najcan tijbi bejn dola!” ¹⁴ Naj rmin lejtu, bejn ruquixa impuesto yee ba been Diosi laama perdón che babi'i lidxima, peri bejn fariseo nina di beendiga Diosi laama perdón. Deen bejn ruza'ta zagadxe laagajcama, zaya'nxtuma, peri bejn di ruza'ta zagadxe laagajcama, suza'ta zagadixerma laama.



Copyright © Global Recordings Network. Used with permission.

San Lucas 18:15-17

Jesús rniaba loj xtadama gajcanema bindoori

¹⁵ Bineri bejn bindoori lada zua'a Jesús deen guixoba yaama xhijquirmi, peri che gunari xbejn Jesús zani guzloj rdilirma bejn zine laarmi. ¹⁶ Choru re Jesús lojri xbejnma:

—Gola gulaa xhi'tarmi lon, yadi rudxoondu laarmi, deen lada rnebiaa Diosi najcan parari bejn najca zegari bindoo yeri. ¹⁷ Deen naj rmin lojdu, bejn di rliiladxi xyelarnebiaa Diosi zega rliiladxi tijbi bindoo, di zajcadiga chu'ma lojn.

Xuenta tijbi bejn dan

¹⁸ Tijbi bejn rnebiaa, gunabadiidxa loj Jesús rema:

—Mextru za'ca, ¿xe rayala güinan deen xhibanan tibilayaa loj Diosi?

¹⁹ Reti Jesús lojma:

—¿Yexaza nalu lon najcan bejn za'ca? Dichudiga najca bejn za'ca, tijbidoozi Diosi. ²⁰ Lij radxejlalu mandamientori: “Di xhicanelu bejngunaa garen, di gugüijtilu bejn, di cuanlu, di cueelu xtiidxa bejn, gojpa respeto xtada xniaalu.” ²¹ Choru re bejn nina loj Jesús:

—Grari nine caxhinan xta che najcalan bindoo.

²²Che bin Jesús zani, rema lojma:

—Xhu'u stijbi ni riaadxa güinlu: bato'o gra ni rajpalu choru badee medi nina lojri bejn probi, zani gajpalu yelnaza'ca xanyabaa. Choru gudaa, danala naj.

²³Che baqueexhdiaga bejn nina zani, guzuj nayadoxama, deen bejn dandoxa najcama. ²⁴Che guna Jesús zua'a nayama, rema:

—¡Nacuandoxa najcan chu'ri bejn dan lada rnebiaa Diosi.

²⁵Didla nacuan tedi tijbi camello xhia'a yaguxa, que chu'u tijbi bejn dan lada rnebiaa Diosi.

²⁶Bejn ni baqueexhdiaga ni re Jesús, rerma:

—¿Chuza gajca laa loj xcastiga Diosi?

²⁷Choru re Jesús lojrma:

—Ni nacuan parari bejn, para Diosi dinacuandigan.

²⁸Choru re Pedro lojma:

—Dada, dunoj babasa'nnu gracazi ni ria'panu deen guidxoonalanu lij.

²⁹Reti Jesús lojrma:

—Naj rmin lojdu, chutizi bejn rusa'n lidxi, o xgunaa, bijchima, o xtadama, xniaama, o xi'nma por xyelarnebiaa Diosi, ³⁰mazru zien najca ni xhica'ma loj yidxilij yee, choru zabajnma tijbilayaa loj Diosi xanyabaa.

Rusin Jesús stijbi, guejtima

³¹Gune Jesús chibitio'pa xbejnma tijbi ladu, choru rema lojrma:

—Yana yo'ri Jerusalén lada gajca cumplido zega bacaari bejn bate Xtiidxa Diosi lojri bejn xcuenta ni gaza'can, naj Bejn guxa'la Diosi. ³²Güinri bejn naj ntrega lojri bejn ziju. Deen xhinieyarma naj, narma lon diidxa malari, choru gucuua xxenrma lon. ³³Quinrma naj, choru gugüijtirma naj, peri che yayon dxej yabanan.

³⁴Peri xbejnma di gogania'digarma ni rema lojrma, di gogabiaadigarma yexa re Jesús zani, deen di gogania'digarma zega rema.

Rasiajca Jesús tijbi bejn di rni loj

³⁵ Che ba zidxin gajxa Jesús yedxi Jericó, zojba tijbi bejn di rni loj rua'nejza canabama carda. ³⁶ Che gogabiaama cade zienri bejn, gunabadiidxama xe cayajca. ³⁷ Choru rerma lojma:
—Jesús bejn Nazaret cade nizayee.

³⁸ Choru gurdxia'a bejn nina rema:

—¡Jesús, xdiaa David, baya naj!

³⁹ Peri bejn ni nediri, rdilirma laama deen yadiru curdxia'ma, peri laama mazru nayajcha rbidxia'ma rema:

—Xdiaa David, baya naj!

⁴⁰ Choru guzujdxe Jesús gunebiaama chica'rma laama. Che bidxinnerma laama gajxa lojma, re Jesús lojma:

⁴¹ —¿Xe renlu güinan por lij?

Re bendo nina:

— Dada, renan yani lon.

⁴² Choru re Jesús lojma:

—¡Babani lojlu! Babayajcalu deen bililadxilu naj.

⁴³ Lugoraze'gajca bani loj bejn nina, choru binalama Jesús rusa'tama Diosi zagadxe. Choru graziri bejn guna ni gojca, nerma ruza'ta Diosi zagadxe.


Biaj Jesús lidxi Zaqueo

19 Guxhu Jesús yedxi Jericó, choru gudema yedxi nina. ²Nina rbeza tijbi bejn dan la Zaqueo, Laama na bejn rnebiaa lojri bejn ruquixa impuesto. ³Rinma guayen gubiaama Jesús, peri di rajcadiga gubiaama laama yela bejn xtalaro'o rga'a nina, choru deen bejn maamadoozi najcama. ⁴Yela zani baxiinma gunedima, choru nina guye'pima loj tijbi yaga ni zojba gajxa lada te Jesús, deen gajca gubiaama laama. ⁵Che gude Jesús nina, babiaama yaa, gunama Zaqueo choru rema lojma:

—Zaqueo, baquier bayejta yagaj, deen lidxilu ba najca yaya'nán yandxej.

⁶ Choru la bayejtagajca Zaqueo loj yaga nina, choru rabaadoxama zinema Jesús lidxima. ⁷Che gunari bejn zani, guzloj gracazirma rniexhijdxa Jesús, rerma:

—Lidxi tijbi bejn dola zigaya'n Jesús.



Copyright © Global Recordings Network. Used with permission.

San Lucas 19:1-10

⁸Choru guzujli Zaqueo, rema loj Jesús:

—Babiaa dada, guden garola ni ra'pan lojri bejn probi.

Choru baali churma baquixan demaz loj ni rayalan, zatajpa biajaran yaden ni gulanan lojrma.

⁹Choru re Jesús lojma:

—Yandxej ba been Diosi perdón graziri bejn rbeza len xhu ye, deen bejn ye biliiladxima Diosi zega biliiladxi Abraham.

¹⁰Deen naj Bejn guxa'la Diosi zielagadilin bejn ni di xhu'u loj xnejza Diosi deen laarma loj dola.

Xcientari mosa ni nulen medi

¹¹La'ti caguqueexhdiaqari bejn ni rulii Jesús, bima tijbi cuento lojrma deen ba zidxin gajxarma Jerusalén choru laarma nugonrma lugoraze'e nidxin xyelarnebiaa Diosi. ¹²Choru re Jesús lojrma:

—Guxhu tijbi bejn, zedama loj tijbi famili zobaloj, bijajma ziju deen guderma yelarnebiaa laama deen gajcama rey choru yabi'i ladxima nebiaama. ¹³Che gadima xhiriaa gunema chiiri xmosama, choru loj tijbigarma badeema xoro'o medi, choru rema lojrma: “Gola güinne medi ye dxiin xta che yayelan deen gagaxejrun.” ¹⁴Peri bejn ladxima ridxe'chidoxarma laama, yela zani guxa'larma bejn deen chinalarma laama deen guerma loj

bejn ni mazru sobaloj: "Direndiganu gajca bejn ye duxreynu".¹⁵ Peri laacazima bazujrma gajca rey, choru babi'ma ziá ladxima. Che badxinma guxa'lama bejn biganeri xmosama bejn badeema medi deen gagabiaama blaca ba been tijbigarma gan.¹⁶ Mosa ni bia gallo rema: "Dada, za chii biaja ba been gan medi ni baneelu naj."¹⁷ Choru re rey nina lojma: "Zajcan, ba beenlu zega rayalan, yan yela babeenlu zega rayalan con ta'nzi ni banen lij, yana gunedxan chii yedxi nebiaalu."¹⁸ Che bia mosa rarojpa nina, rema: "Dada, za jaii biaja ba been gan medi ni baneelu."¹⁹ Choru negajca loj bejn yee re rey nina: "Lijza nebiaa jairi yedxi."²⁰ Choru biaj stjbi mosa nina lojma rema: "Dada, laa xmedilu ye. Badxe'cheenan loj tijbi baydoo,²¹ deen bidxebin lij yela dirayadigalu bejn, rca'l'u ni di na xenlu, choru rato'palu ni rca lada di gule'quili."²² Choru re rey nina lojma: "Mosa mala, por xtiidxagajcalu rayala telu castiga. Baali ragabiaalu di rayadigan bejnri, choru rca'n ni di na daxeenan, choru ratojpan ni rca lada di gulejquin,²³ ¿yexa di bigadxe'l'u da medin len bangu, deen che nayelan naca'nan con xhidibi xi'nin?"²⁴ Choru re rey nina lojri bejn zua'a nina: "Gola yaca'a medi ze'e lojma, choru gola gudeen loj bejn benxej za chii biaja mazru."²⁵ Peri rerma lojma: "Peri bejn ze'e baca'ma za chii biaja mazru."²⁶ Choru re rey nina: "Bejn rajpa xoro'o zajpama mazru, Peri bejn rajpa ta'nzi, xta ta'n ni rajpama xhidoobacan lojma.²⁷ Choru bejn rdxe'chiri naj, bejn ni di renri niajcan rey, gola dane laarma ye, choru gola gugüijti laarma niza lon."

Ru Jesús yedxi Jerusalén


²⁸ Che guyaaloj re Jesús zani, binuama zema Jerusalén.

²⁹ Che bidxinma gajxa yedxi Betfagé con yedxi Betania, ne gajxa dajn Olivos, guxa'lama tio'pa xbejnma,³⁰ rema lojma:

—Gola chiaj yedxidoo rga'a dalanti. Che xhidhindu nina xhiniadu tijbi buru quie'n caba duu, ni dichucazi bejn bagudxiba laaba. Gola yixejqui laaba choru gola dane laaba lon.³¹ Baali chu xhiniabadiidxa lojdu: "¿Yexa rixejquidu laaba?" Gola gue lojma: "Jesús naquiin laaba."

³² Biajtiri bejn guxa'lama chia yedxi nina, choru bidxagalorja zegapaca re Jesús lojma.³³ Che caxejquirma burado nina, bejn najcari xburan, gunabadiidxarma rema:

—¿Yexa caxejquidu laaba?



Copyright © Global Recordings Network. Used with permission.

San Lucas 19:28-40

³⁴ Retirma lojma:

—Jesús naquiin laaba.

³⁵ Binetirma burado nina lada zua'a Jesús, choru badxiiba xabarma xijchaba, choru gojcanerma Jesús gudxibama laaba.

³⁶ Xhidibicazi niza lada gude Jesús gudijxa xabarma deen tema. ³⁷ Che bazidxingajxarma para yayejtarma xhijqui dajn Olivos, gracaziri bejn ni zinala Jesús guzloj rbindixidajrma yela tantu rabaarma, choru ruza'tarma Diosi zagadxe por grari milagri ni ba gunarma. ³⁸ Rerma:

—¡Diosi rajcanedoха bejn zi'ta por laama! ¡Xhu'u legri xanyabaa! Xquixti Diosi bejn xhu'u xanyabaa!

³⁹ Xhu'ri bejn Fariseo naxhua lojri bejn zien nina rerma loj Jesús:

—Mextru, baxuuri xbejnlu deen yadiru rnierma zani.

⁴⁰ Peri re Jesús lojrma:

—Naj rnin lejtu baali laarma guzegu rua'rma, xhiajyeri cuidxia'a ni canerma.

⁴¹ Che bidxin Jesús gajxa Jerusalén, choru babiaama yedxi nina, guzuloj roonma por laan. ⁴² Choru rema:

—¡Bejn Jerusalénri, baali masu yandxej niagabiaadu chu gajca yabe'quichee luxtoodu! Peri yan nague'chi nan para lejtu, di zajcadiga gagabiaadun. ⁴³ Toru xhidxin dxej, che güinri bejn ridxe'chi lejtu tijbi gurajli, guguegurman



Copyright © Global Recordings Network. Used with permission.

San Lucas 19:45-46

ladxidu, gracazi lajta guegurma lejtu, tilinerma lejtu, ⁴⁴ choru gugüijtirma lejtu, gusie'nrma ladxidu, nega tijbi xhiaj di zaya'n xhijqui stijbi xhiaj, deen yela di beencuentadigadu lugora ni biidagana Diosi lejtu.

Rabee Jesús bejn ruto'ri lulia'a xhidoro'o Jerusalén

⁴⁵ Dxe guxhu Jesús lulia'a xhidoro'o Jerusalén, guzloj rabeema bejn caguto'ri nina conri bejn cazii, ⁴⁶ rema lojrma: —Loj Xtiidxa Diosi re: “Lidxin najcan lada rbejdxirma Diosi”, peri lejtu nindun zega len xabiliaari bejn gubaan.

⁴⁷ Guixe guixe cagulii Jesús bejnri len xhidoro'o Jerusalén peri bixioza rnebiaari bixioza conri mextru rajca ley choru neri guxtisi luyedxi nina, raxhilimodarma xena gajca gugüijtirma laama. ⁴⁸ Peri di badxejladiga xena nugüijtirma laama deen grari bejn rga'a nina caguqueexhdiagadxi'chirma ni cagulii Jesús.

Xyelarnebiaa Jesús

20 Tijbi dxej, che cagulii Jesús Xtiidxaza'ca Diosi lojri bejn len xhidoro'o Jerusalén, bidxinri bixioza rnebiaari bixioza conri mextru rajca ley, choru neri guxtisi Israel, ² rema lojma:

—Guna, ¿chu xyelarnebiaa rinnelu nineri? ¿Chu banee yelarnebiaa lij?

³ Badxi'i Jesúsn rema:

—Nega naj xhu'gajacaza ni ganabadiidxan lojdu. Gola nan:

⁴ ¿chu guxa'la Juan biidagaroobanijsama, Diosi ya, o bejn yidxilij ye?

⁵ Choru guzloj re loj lasa'rma:

—Baali ye'chiri Diosi guxa'la laama, zanama: “¿Yexaza di biliadixidu laama?” ⁶ Choru baali ye'chiri bejn yidxilij ye guxa'la laama, bejn zugüijtirma dulaari con xhiaj deen gracazirma rliiladxi Juan gojca bejn bate Xtiidxa Diosi lojri bejn.”

⁷ Choru badxi'rman rerma:

—Di ragabiaadiganu chu guxa'la Juan biidagaroobanijsama bejnri.

⁸ Reti Jesús lojrma:

—Negaza naj di zanidigan lojdu chu banee yelarnebiaa güinan nineri.

Xcientari mosa mala

⁹ Choru guzloj Jesús canema lojri bejn zua'nema choru rima cuento ye lojrma:

—Guxhu tijbi bejn basibinma uvari loj xiama, choru basa'nneman bejnri deen güinrma dxiin lojn, choru biriaazama zetima ziju. ¹⁰ Che bidxin dxej yala'rma uva nina, guxa'la tijbi xmosama chigaxiima ni rayalama. Peri bejn ni rinri dxiin loj xhiniaa nina gudinrma mosa yee, choru dixediga bederma laama, badxi'rma laama sanizi. ¹¹ Choru guxa'lama stijbicazi mosa, dixegajcadiga baderma laama, rdilirma laama, rerma lojma ni guyentizirma, choru gudinrma laama, badxi'gajcarma laama sanizi. ¹² Guxa'laczima stijbi xmosama, peri gudinlarma laama gudilixhijdxarma laama, choru baberma laama loj xhiniaa nina.

¹³ 'Choru reti bejn najca xxhujn: “¿Xena güinan yana? Gaxala da xi'nan biin rendoxan dxela laami si gajparma respeto.” ¹⁴ Peri che gunari bejn yee laami, re loj lasa'rma: “gola ye najca gola yaya'nne xhuj yee. Yagüijtiri laaxa deen gajcan duxeenri.” ¹⁵ Zanizi baberma laami loj xhiniaa nina, choru bagüijtirma laami.

Choru gunabadiidxa Jesús lojri bejn canenema rema:

—Yana, ¿xe naladxidu güinne bejn najca xxhujn, bejn ninari? ¹⁶ Naj rnin lojdu, zil'tama deen gugüijtima bejn ninari, choru gudema xhiniaa nina lojri bejn garen.

Che baqueexdiagarma zani, rerma:

—¡Digojcacazi gajca zani!

¹⁷ Peri Jesús babbiaama lojrma choru rema:

—Baali di zanin, ¿xeza ren gue ni ca loj Xtiidxa Diosi lada re?:

Xhiaj ni baguro'nri bejn rincheeri xhu, ni naladxirma
diru xe sirva, laan ni ben mazru sirva
gogachée xhu nina.

¹⁸ Choru chutizi bejn yaba xhijqui xhiaj nina zuluuxan laama, beda baali xhidiin xhiaj nina xhijquima bij bij gajcama.

Xuenta impuesto

¹⁹ Mextru rajcari ley conri bixioza ni rnebiaari bixioza guyenrma niniaazarma Jesús lugoraninagajca deen gogabiaarma laarma caguza'tama, peri di beendigarman deen bidxebirma xe ninri bejn laarma. ²⁰ Guxa'latirma bejn chigule'chi laama, bejn ni güin najca bejn za'ca, deen yaxhiilmodarma xhinie Jesús tijbi diidxa ni gajcane laarma deen güinrma laama ntrega loj bejn na gubierna Roma.

²¹ Choru gunabadiidxarma loj Jesús rerma:

—Mextru, dunoj ragabiaanu gualica ni rnielu choru laa na ni ruliilu, deen para lij tibilojzi najcari bejn, choru gualipacalu ruliilu xnejza Diosi. ²² Ze'ti guna, ¿laa rieennu radixanu impuesto loj rey César ya o di laa?

²³ Gogabiaagajca Jesús xgaba mala ni caxhinrma choru rema lojrma:

—Gola gulii tijbi medi lon. ¿Chu loj choru chu laj ca lojn?

Badxi'rman rerma:

—Xeen rey Césarn.

²⁵ Choru re Jesús lojrma:

—Gola gudee loj César ni najca xeen César puesi, choru loj Diosi gola gudee ni na xeen Diosi.

²⁶ Choru di gojcadija nadxejlarma xe nuti'pirma laama loj gra ni gunema niza lojri bejn nina, badxiadoxala lojrma xena badxi'i Jesús xtiidxarma choru dixecaziru rerma.

Xuenta che yabanri bejn güijti

²⁷ Xhu'ri bejn saduceo bigabiaarma Jesús. Laarma di rliiladxitidarma yabanri bejn güijti, ze'ti rerma loj Jesús:

²⁸—Mextru, loj xley Moisés ca, baali tijbi bejn nixhoo guejtimu choru di guxhu xi'nma con xbejngunaama, bijchi bejn nixhoo güijti nina yaca'a bejngunaa bizejbi yee, deen chu'u xi'nrma, choru xi'nma gajcarmi zega xi'n bejn bagüijti nina. ²⁹ Yana, guxhu tijbi famili lada gojcarma gajdxa bijchi. Choru bachiliaa bejn galu nina, peri güijtima choru di guxhudiga xi'nma con xbejngunaama. ³⁰ Choru bijchima gola rarojpa nina baca'ma bejngunaa nina, peri güijtigajcama choru di guxhugajcadiga xi'nma con bejngunaa yee. ³¹ Choru zanigajca gola rayon nina, baca'ma bejngunaa bizejbi nina, peri güijtigajcama. Zani bachiliaanema xhigadxazirma, peri grazirma güijti choru dichudiga xi'nrma guxhu con laami. ³² Choru digogaxchejdiga güijti gajca bejngunaa nina. ³³ Yana che yabanri bejn güijti, ¿chu loj xhigadxarma gajca xnixhoo bejngunaa nina yága grazirma bachiliaane laama?

³⁴ Choru re Jesús lojrma:

—Loj yidxilij yee ruchiliaari bejn, choru rudee xi'nrma guchiliaarixa. ³⁵ Peri bejn ni yaban stijbi, bejn yado'la gajpa xyelnaban Diosi, diru zaca'diga laza'rma, choru diru zudeediga xi'nrma xhica'rma laarmi. ³⁶ Deen nina diru zejtidigma, grazirma gajca zega xángel Diosi choru gajcarma xi'n Diosi yela nerma badoola yela naban yee. ³⁷ Choru xcuenta ni yabanri bejn güijti, zabannerma, xta Moisés re zani tibilajta loj Xtiidxa Diosi, che gunama yaga ni caye'qui. Nina re Diosi lojma, laama najca xDiosi Abraham, xDiosi Isaac, choru xDiosi Jacob. ³⁸ Laama di najcadigama xDiosiri bejn güijti, najcama xDiosiri bejn naban, deen para laama, grari bejn naban.

³⁹ Choru xhu'ri mextru rajca ley rerma loj Jesús:

—Mextru, laaca gunelu.

⁴⁰ Choru diru bayaxadiga xeru niniabadiidxarma lojma.

¿Chu xi'n najca Cristo?

⁴¹ Reti Jesús lojrma:

—¿Yexaza reri bejn xdiaa rey David zeda Cristo? ⁴² Ne David gajcaza bacaa loj libru Salmo lada re:

Diosi re loj dadadan bejn rnebiaa naj:

“Gurej cue'n ladu xnejza,

⁴³ Xta güinan nebiallu lojri bejn ridxe'chi lij.”

⁴⁴ Yan, baali rey David ree lojma dada, ¿yexaza redu zedama xdiama?

Ni rinri mextru rajca ley

⁴⁵ La'ti caguqueexhdiagari bejn gra ni re Jesús, rema lojri xbejnma:

⁴⁶ —Gola gajpa cudadu conri mextru rajca ley. Deen ruladxirma rzujrma conri lajdi za'ca, choru ruladxirma gugajpa Diosri bejn laarma con respeto tibinejza, choru lenri xhidoo ruladxirma cuerma lada rbejri bejn zobaloj, zanigajca rinrma lada ritaurma. ⁴⁷ Choru raca'rma lidxiri bejngunaa bizejbi, choru para yen najrma bejn za'ca, xhero'o rbejdxirma Diosi. Peri mazru castigaro'o najca ni yadoolarma.

Gon ni badee tijbi bejngunaa bizejbi

21 Che gulejsa loj Jesús gunama cagudxe'ri bejn dan gon lenri alcancía ni xhu'u len xhidoro'o Jerusalén. ² Choru gunagajcama tijbi bejngunaa bizejbi probi, cagudxe'ma tio'pa cintavadoo len alcancía nina. ³ Choru re Jesús lojri xbejnma:



Copyright © Global Recordings Network. Used with permission.

—Naj rrin lojdu, mazru lasajca gon ni badxe'e bejngunaa bizejbi probi ye, que loj ni badxe'e dimaziri bejn.⁴ Deen gracazirma rudxe'e ni rin laarma sobri, peri laama mazi bejn probi najcama, badxe'ma gracazi ni rajpama ni xhibannema.

Re Jesús saye'n xhidoro'o Jerusalén

⁵ Che cagubiaari bejn xhidoro'o Jerusalén, cayerma güendoxa nari xhiaj ni nagacheenen choru rdxaagadoxan ni lazajca basigadari bejn para xhliin güendoxa. Re Jesús:

⁶ —Zadxin dxej gra ni cagubiaadu yana, nega tijbi xhiaj di zaya'n xhijqui stijbin deen zaye'n grazin.

Ni gajca che ba nijti yidxilij

⁷ Choru gunabadidxari bejn nina loj Jesús rerma:

—Mextru, ¿gocaza suloj gajca zega naalu? ¿Xe sen chu'u che bazidxingajxa gajca zani?

⁸ Reti Jesús lojrma:

—Golagajpa cudadu di chu gusiyee lejtu. Deen zienri bejn xhi'ta narma da cuentan zi'tarma, narma: “Naj najca Cristo”, o narma: “Bazedazagaxa xhi'tama.” Peri yadi xhliiladxidu laarma. ⁹ Che guqueexhdiagadu xhu'u guadilij loj yidxilij ye, choru gracazi lajta cadijliri bejn, yadi yidxebidu deen zani rayala gajca gal. Peri gatiga dxej nina guidxin.

¹⁰ Binua Jesús rema:

—Tiliri nación con stijbi nación, choru tiliri bejn rajpa yelarnebiaa con stijbi bejn rajpa yelarnebiaa. ¹¹ Zin xuro'o, zu gubijn choru chu'u yelashhidxa gracazi lajta, choru xan yabaa xhniadu xejcaru ni guchebi lejtu.

¹² Peri che gadiri nine gajca, xhniazari bejn lejtu, gusagazirma lejtu, chinerma lejtu lenri xhidoo deen guterma lejtu castiga, gudxe'rma lejtu ladixixhiiba, chinerma lejtu lojri rey choru lojri gubierna yela rliiladxidu naj. ¹³ Zani gajca deen chile'e güidu da diidxan lojrma. ¹⁴ Yadi xhidxiga'du choru yadi güindu xgaba xe guedu lojrma lada chinerma lejtu. ¹⁵ Deen naj gunee diidxa ni xhniedu, naj gunee lejtu yelabini. Choru nega tijbi bejn ridxe'chi lejtu di zin guantari diidxa guedu, choru di chucazi lojrma zajca na lojdu dilaadiga canedu. ¹⁶ Peri lejtu xta xtada xniaadu, xamigodu, bijchidu o xfamilidu güin lejtu

ntrega, choru xhu'du gugüijtirma. ¹⁷ Gra bejn yidxilij yidxe'chi lejtu yela rliiladxidu naj. ¹⁸ Peri nega tijbi yidxaxhijquidu di zaniiji. ¹⁹ Choru baali su tijpadu loj da diidxan, zalaadu loj xcastiga Diosi. ²⁰ Che gubiaadu neguri soldado yedxi Jerusalén, cheze'e ba sidxin gajxa nijtin. ²¹ Choru bejn zua'ri niza Judea, gola guxiin niza dajnri, choru bejn zua'ri yedxi Jerusalén gola xhiriaa luyedxinina, choru bejn zua'ri luxhniaa yadi yaxhudu luyedxinina. ²² Deen lojri dxeze'e gutee Diosi castiga bejnri, deen gajca cumplidu zega ca loj Xtiidxama. ²³ Probizari bejngunaa nuxi'n o bejn ni ca'ri bindoobezu lenri dxejze'e!, Deen zazagadiadoxari bejn, choru castigaro'doxa yadolari bejn luyedxi nina. ²⁴ Xhu'ri bejn guejti loj guadijli, xhu'zarma xhniazarma laarma choru chinerma laarma grari nación. Choru bejn zijturi laalarma nebiaa Jerusalén xta che yaza'a dxej ni nuza'n Diosi nabiaarma.

Xhi'ta xi'n Diosi stijbi

²⁵ 'Choru zienri sen loj gubijdxo loj bee con lojri bajlaxhij. Choru loj yidxilij ye zadxiadoxa lojri bejn choru zadxebirma yela nayaçcharo'o yen nijsadoo. ²⁶ Choru xta xhcayjri bejn tantu guidxebirma che xhniarma ni gajca loj yidxilij ye, deen neri ni xhu'u xanyabaa zaniibirin. ²⁷ Choru xhniarma naj Bejn guxa'la Diosi rliabacha'n yelan loj bej con da yelarnebiaan. ²⁸ Che suloj gajcari nine, gola yabaa, gola xhliejsa lojdu, deen bazidxingajxa dxej ni laadu loj ni cazagadiadu.

²⁹ Choru regajca Jesús lojrma:

—Gola gubia yaga higo o xeticazi stijbi yaga, ³⁰ che bacayadxibari xbalagan, lejtu baragabiaadu zedaza tiempa nalaa. ³¹ Zanigajca che gubiaadu bacayajcari ninina zagabiaadu bazedagajxa xyelagubierna Diosi. ³² Naj rnin lojdu grari ninina gajca che gadi grari bejn nabon dxej tiempa ze'e guejti. ³³ Yidxilij con xanyabaa zanijtirin, peri da diidxan zajcapacan cumplidu. ³⁴ Gola gajpa cudadu, deen yadi güinri vicio lejtu gan, zega yelaria'a, choru yela rindoxa xgaba xena xhibandu, deen che yelan stijbi di gajca dxejnjina para lejtu ³⁵ zega tijbi trampa. Deen zani gajca dxejxe'e para grari bejn rga'a loj yidxilij yee. ³⁶ Gola susin, guixe guixe gola cuejdxí Diosi, deen gajca laadu loj grari ni gajca loj yidxilij yee, deen chile'e guidxindu lon naj Bejn guxa'la Diosi. ³⁷ Che guadxe rulii

Jesús bejnri len xhidoro'o Jerusalén choru guaxin rigaya'nma dajn la Olivos.³⁸ Choru rasilidoo riaj grari bejn len xhidoro'o Jerusalén nina riguqueexhdiagarma ni rnue Jesús.

Raya'nrma diidxa xena xhiniazarma Jesús

22 Che baza gajxa lanij pascu che raurma yedaxtili ni di xe levadura. ²Bixioza rnebiari bixiozari conri mextru rajca ley raxhiili modarma xena gugüijtirma Jesús, deen ridxebirma bejnri. ³Choru guxhu bejndxaba luxtoo Judas Iscariote bejn najca tibiri xapostol Jesús. ⁴Choru biganenema bixioza rnebiari bixioza conri bejn rnebiaa lojri bejn rajpa xhidoro'o Jerusalén, choru bii nema laarma diidxa xena güinma ntrega Jesús lojrma. ⁵Laarma babaadoxarma, choru rerma guderma laama medi. ⁶Cuejbi Judas ni rerma lojma, zanizti guzloj raxhiilmodama xena gajca güinma ntrega Jesús lada dichu bejn.

Rau Jesús xchee conri xbejnma

⁷Che bidxin lanij pascu, che rauri bejn yedaxtili ni di xe levadura choru rugüijtirma tijbi xili. ⁸Guxala Jesús Pedro con Juan, chiarma Jerusalén, peri rexgama lojrma:

—Gola chiyeen ni xhdauri xche guaxin pascu.



Copyright © Global Recordings Network. Used with permission.

⁹ Choru gunabadiidxarma lojma:

—¿Ca renlu yeennun?

¹⁰ Choru re Jesús

lojrma:

—Che chu'du luyedxi nina, xhniadu tijbi bejn nixhoo ca'ma tijbi re nijsa, laama chinaladu xta lada yaxhuma. ¹¹ Choru gola guee loj bejn najca lidxin: “Na mextru: ¿Con lanio gauneeri dabejnan xche guaxin pascu?” ¹² Choru gulima lejtu tijbi lanio ni rarojpa cuaa, ba nagachee lanio nina. Nina gola güin ni xhidauri xchee.

¹³ Biajрма, ne bichagalojrma zegapaca re Jesús lojrma.

Choru beenrma cumida ni gaurma guaxin pascu. ¹⁴ Che bidxin gora gaurma, gurej Jesús rua'a mexa conri xapostolma. ¹⁵ Re Jesús lojrma:

—¡Xta gojcala renan gauneen lejtu guaxin pascu yee, che gadi dxej gazagadian yidxin! ¹⁶ Deen naj rnin lejtu, diru zaunedigan lejtu pascu yee stijbi xtaru che xhidxin güin xyelagubierna Diosi guidibidoo.

¹⁷ Choru cua'ma tijbi copi vino, che guyaloj badeema quixti loj Diosi rema lojrma:

—Gola xhca'a vino yee, golaqui'sin loj gradu. ¹⁸ Deen naj rnin lejtu diru zia'digan vino, xtaru dxej xhi'ta xyelagubierna Diosi.

¹⁹ Choru cua'ma yedaxtili, che guyaloj badeema xquixti loj Diosi, gula'man choru badeeman lojrma, rema:

—Yedaxtili yee najcan da cuerpan ni rinan ntrega por lejtu, che güindun gola güinin yela razaaladxidu naj.

²⁰ Choru zanigajca beenma con copi vino nina che basiaaloj gudaurma xchee Rema:

—“Vino” ye najcan da rejnan ni gaxe'n che guejtin, deen guixala tijbi nejza cuibi para yidxindu loj Diosi.

²¹ Peri yan bejn güin naj ntrega, laama zojba yee, laa yaama naxooba loj mexa lada naxoobagajca yan.

²² Peri naj Bejn guxa'la Diosi gazagadiajn ni banajca gazagadian. Peri probiza bejn güin naj ntrega. ²³ Choru guzloj rniabadiidxa loj lasa'rma chuga ni güin zani chu ni güin laama ntrega.

Chu mazru zobaloj

²⁴ Sanigajca guzloj cadijlidiidxarma chu loj grarma najca bejn mazru zobaloj. ²⁵ Peri re Jesús lojrma:

—Bejn najcari rey loj yidxilij ye rnebiarma xnaciónrma zegarentizirma, choru bejn ni rnebiaari, reri bejn güen rnebiarma. ²⁶ Peri lejtu di rayaladiga güindu zani. Bejn mazru zobaloj lojdu rayala gajcama zega tijbi bejn di zobaloj. Choru bejn rnebiaa lojdu rayala gajcama zegazi tijbi bejn rin mandadu. ²⁷ Deen ¿Chuga najca bejn mazru zobaloj, bejn rbej rua'a mexa para gau ya o bejn rbe'qui cumida? ¿Di bejn rbej rua'a mexa najca bejn nazru zobaloj ya? Beda naj zua'n lojdu zega tijbi bejn rbe'qui cumida.

²⁸ 'Lejtu ni zua'nepaca naj lojri dxej ni cazagadian.

²⁹ Ze'ti gunen yelarnebiaa lojdu zega banee da dadanan lon. ³⁰ Choru gaudu loj da mexan lada ganebiaan, cuedu lada güindu yela guxtisi loj grari bejn zeda loj chiibitio'pari xdiaa Israel.

Re Jesús zej Pedro di nubiaadigama laama

³¹ Re Jesús:

—Simón, Simón, babiaa, ba gunaba bejndxaba lejtu deen cuijpay'a'ma lejtu zega che rbibiri bejn trigo. ³² Peri naj ba guredxin Diosi por lij deen di gusaan xhiliiladxilu naj. Choru che ba rliiladxilu naj stijbi, gojcaneri lasa'lú deen sudxi'chirma loj xyelarliiladxirma naj.

³³ Choru re Pedro lojma:

—Dada, naj di zusa'ncasin lij mazi gaxhu'neen lij ladixixhiiba o guejtineen lij.

³⁴ Choru re Jesús lojma:

—Naj rnin lojlu Pedro, yan guaxingajca che gadi xhidigay cuidxia'a, choona biaja barelu di nunbiaadigalu naj.

Ba zidxingajxa che sagadiaj Jesús

³⁵ Choru gunabadidxa Jesús lojri xbejnma rema:

—Che guxalan lejtu sin bolsa, sin medi, choru sin gurachi, ¿xhu'u xe ni biaadxadu ya?

Badxi'rman rerma:

—Dixecazi biaadxanu.

³⁶ Choru rema lojrma:

—Peri yana bejn rajpa medi choru bolsa, gola xhica'n.
Choru bejn ni di rajpa espada, gola guto'o xabadu deen sidu tijbin. ³⁷ Deen naj rmin, rayala gajca zega re loj Xtiidxa Diosi lada ruza'tan naj, ren: "Beenrma laama cuenta lojri bejn mala." Gra ni ca loj Xtiidxa Diosi sobre naj, zajcan cumplidu.

³⁸ Choru reri xbejnma lojma:

—Dada, laa dunoj naca'a tio'pa espada.

Reti Jesús:

—Bagojca.

Rbedxi rniaba Jesús loj Diosi dajn Olivos

³⁹ Biriaa Jesús, zega najca xcostumbrma zema dajn la Olivos, choru neri xbejnma binala laama. ⁴⁰ Che bidxinrma nina, rema lojrma:

—Gola cuejdxsi Diosi, deen yadi güin bejndxaba lejtu gan.

⁴¹ Choru biaj laama zega mididu ni rucua bejn tibi xhiaj, nina bazuj xibima gurejdxima Diosi. ⁴² Rema:

—Dada, baali xhquebilu yadi gulaalu gazagadian; peri yadi gajca zega renan, gajcatizi zega renlu.

⁴³ Choru baliloj tibi xángel Diosi lojma, choru badeema laama gojla. ⁴⁴ Choru che cazaganayadoxama mazru cabejdxima Diosi, choru riajba luxhu biniiro'o nijsa raganeema, najcan zega rejn.

⁴⁵ Che bisujma lada guredxima Diosi, biajma lada zua'ri xbejnma, peri naga'yejsilarma yela zua'a nayarma. ⁴⁶ Choru re Jesús lojma:

—¿Yexa naga'a yejsidu? Gola chixquie, gola cuedxi Diosi deen yadi güin bejndxaba lejtu gan.

Gunaazarma Jesús

⁴⁷ Sta cane Jesús bejn najcari xbejnma che bidxinri bejn zien. Choru bejn brelaj Judas, bejn gojca tibbiri xbejn Jesús, nedima lojri bejn nina, choru gubigama cue'e Jesús, badeema xhidu laama. ⁴⁸ Reti Jesús lojma:

—Judas, ¿Con tibi xidu rinlu ntrega naj Bejn guxa'la Diosi ya?

⁴⁹ Che gunari bejn zua'ne Jesús ni cayajca, rerma lojma:

—Dada, ¿zalee dux espadanu ya?

⁵⁰ Choru tijbi xbejnma gudiilixhijdxama tijbi xmosa bixioza zojbaloj loj grari bixioza, gutia'ma xhdiagama ladu xnejza.

⁵¹ Peri re Jesús lojrma:

— Bagojca. Guzujruri bejn nina. Choru baqui'i Jesús xhdiaga mosa nina, basiajcama laama. ⁵² Zanizi re Jesús lojri bixioza rnebiaa lojri bixioza, conri bejn rnebiaari lojri bejn rajpa xhidoro'o Jerusalén, con xguxtisiri bejn Israel, choru bejn bidxinri para chiganerma laama:

—¿Yexa zi'tadu con espada choru yaga deen chinedu naj zega tijbi bejn gubaan? ⁵³ Guixe guixe guzuneen lejtu len xhidoro'o Jerusalén choru di gunaazadigadu naj. Peri ba bidxin gora güindu ni rendu güindu, deen güin bejndxaba ni renma.

Re Pedro di nunbiaadiama Jesús

⁵⁴ Choru gunaazarma Jesús, binerma laama lidxi bixioza zojbaloj loj grari bixioza, choru ziju, ziju binala Pedro laama.

⁵⁵ Nina gule'quirma xhij galay lulia'a choru gurejrrma ludej. Nee Pedro gurejnee laarma. ⁵⁶ Peri tijbi bejngunaa rin dxiin nina che gunama Pedro zojbama lude nina, babiaama lojma choru rema:

—Ne bejn yee naxhua Jesús.

⁵⁷ Peri di guzujrua'diga Pedro, choru rema loj bejngunaa nina:

—Di nunbiaadigan laama.

⁵⁸ Stibiguejtizin che guna stijbiri bejn nina laama, rema lojma:

—Nelu naxhua laarma.

Peri re Pedro:

—Didxali, di xbejndigama naj.

⁵⁹ Gojca zega stibigora re stijbi bejn.

—Nensalidoo necazi bejn yee zua'nee laama deen nema najca bejn Galilea.

⁶⁰ Choru re Pedro:

—Di ragabiaacazin xe rinielu.

Lugoraze'gajca, che la canezi Pedro gurdxia'a xhidigay.

⁶¹ Badxi'ti loj Jesús babiaama Pedro, choru bazaaladxi Pedro ni re Jesús lojma: “Yan, che gadi xhidigay cuidxia'a, choona

bajia ba relu di nunbiaalu naj.”⁶² Choru bariaa Pedro lulia'a nina choru guzuloj nayadoxa roonma.

Rniedyarma Jesús choru rixhinrma laama

⁶³ Bejn cayajpari Jesús guneyarma laama, choru rixhinrma laama. ⁶⁴ Baseegurma lojma, gudijnrma laama, choru rerma lojma:

—¡Guneya'a, chu gudijn lij don!

⁶⁵ Choru zienro'ruri diidxa mala rerma lojma.

Rinerma Jesús lojri guxtisi Israel

⁶⁶ Che baxhini, bachaaga lasa"ri guxtisi Israel, conri bixioza rnebiaari bixioza, choru mextru rajca ley. Choru binerma Jesús lada ruchaaga lasa'a grari guxtisi, nina gunabadiidxarma lojma rerma:

⁶⁷ —Guna dulojnu, ¿lij najca Cristo ya?

Choru rema lojma: —Baali ganin najn, di zaliiladxitigadu. ⁶⁸ Choru baali xe ganabadiidxan lojdu di zadxi'digadun choru di zulagajcadigadu naj. ⁶⁹ Peri desde yana, Bejn guxa'la Diosi cuema ladu xnejza Diosi, bejn rajpa yelarnebiaa.

⁷⁰ Choru grazirma gunabadidxa lojma:

—Sanisti, ¿Lij na xi'n Diosi ya?

Reti Jesús:

—Lejtugajca na naan.

⁷¹ Retirma:

—¿Xega güin yadiiliruri testigo? Dulaagajcari babaqueexhdiaga ni nama con xtiidxagajcama.

Rinerma Jesús loj Pilato

23 Choru bisuj grazirma, binerma Jesús loj Pilato. ² Nina caguti'irma laama diidxa muxterari guzoloj rerma:

—Banaazalojnu bejn yee cagusiyemba bejn duladxiri. Rema dirayaladiga yadijaxi impuesto loj rey César, choru rema laama najca Cristo, choru rey. ³ Gunabadiidxati Pilato loj Jesús rema:

—¿Lij najca xreyri bejn Judea ya?

Choru re Jesús:

—Lij gajca naan.

⁴ Choru re Pilato lojri bixioza rnebiaari bixioza con loj grari bejn rga'a nina:

—Dixediga xfalta bejn yee radxejlan.

⁵ Peri laarma zega mazru nayajcha rerma:

—Caguskiyeema bejnri xhidibi niza Judea conri ni ruliima laarma. Guzlojma niza Galilea choru yana caxhinman yee Judea.

Rinerma Jesús loj Herodes

⁶ Che baqueexhdiaga Pilato baza'tarma Galilea, gunabadiidxama lojрма la Galilea najca ladxi Jesús. ⁷ Choru che gogabiaama lada rnebiaa Herodes naza Jesús, guxa'larma laama loj Herodes bejn rnebiaa Galilea, deen lenri dxejnina ne Herodes zua'a Jerusalén. ⁸ Che guna Herodes Jesús babaadoxama deen xta gojcala renma güinbiaama laama yela bijnma ruza'tari bejn laama, choru deen gubiaama güin Jesús tijbi milagri. ⁹ Zienri ni gunabadiidxama lojma, peri dixecazi badxi'i Jesús lojma. ¹⁰ Neri bixioza rnebiaari bixioza conri mextru rajca ley di rucueezacazi ruti'irma laama diidxa muxterari. ¹¹ Choru Herodes conri xsoldadoma



Copyright © Global Recordings Network. Used with permission.

San Lucas 23:1-12

basagadijdoxarma laama, guneyarma laama, bagajcurma laama lajdi za'cadoo lasa'ni rajcuri rey. Choru baxa'la Herodes laama loj Pilato stijbi.¹² Choru cheze'gajca bazuloj baneza'ca lasa'ri Herodes con Pilato, deen gojcalo ridxe'chi lasa'rma.

Rnebiaarma guejti Jesús

¹³ Bato'pa Pilato bixioza rnebiaari bixioza conri guxtisi, choru bejn luyedxinina. ¹⁴ Choru re Pilato lojrma:

—Biidanedu bejn yee lon, nadu cagusiyemaa bejnri. Peri niza lojdu ba gunabadiidxan lojma, choru dixediga xfaltama radxejlan zega nadu. ¹⁵ Nega Herodes di badxejla xfaltama, ze'ti baxa'lama laama lon stijbi. Ba babiaalojdu dixediga ni mala benma deen guejtima. ¹⁶ Yan, guten laama castiga choru gulaan laama.

¹⁷ Len dxej lanij Pascu yee, najca xcostumbri Pilato gulaama tijbi bejn xhu'u ladxixhiiba. ¹⁸ Peri gracazirma guzloj rbidxidiaj rerma:

—¡Bagüijti bejn ze'e! ¡Balaa Barrabás! ¹⁹ Ne Barrabás badxe'rma laama ladxixhiiba yela gudijlinema bejn rnebiaari Jerusalén, Choru yela bagüijtima bejn. ²⁰ Gunene Pilato laarma stijbi deen guyenma nulaama Jesús. ²¹ Peri laarma guridxiajrmra mazru nayajcha rerma:

—¡Bacaa laama loj curijzi! ¡Bacaa laama loj curijzi!

²² Ni bayona biaja re Pilato lojrma:

—¿Xeza ni mala ba been bejn yee? Dixediga xfaltama radxejlan para guejtima. Guten laama castiga choru gulaan laama.

²³ Peri laarma mazru rbidxidiajrmra rerma loj Pilato gucuama laama loj curijzi. Choru yela tantu rbidxidiajrmra beenrma gan gojca zega renrma. ²⁴ Choru cuejbi Pilato beenma zega renrma. ²⁵ Balaama Barrabás bejn guxhu ladxixhiiba yela gudijlinema bejn rnebiari Jerusalén choru yela bagüijtima bejn yana, choru beenma ntrega Jesús lojrma deen güinrma laama ni rentizima.

Rucuaarma Jesús loj curijzi

²⁶ Che zinerma Jesús lada gucuarma laama loj curijzi, gunaazarma tijbi bejn naza yedxi Sirene lama Simón. Luxhiniaa

bazama zedama, choru gunebiaarma güima xcurijzi Jesús
choru chinalama laama.

²⁷ Ziendoxari bejn zinalaj laama, choru zienro'ri bejngunaa
rbidxidiajrma roonrma yela rayarma laama. ²⁸ Peri babiaa
Jesús lojrma choru rema:

—Bejngunaa Jerusalén yadi roondu por naj, gola goon
por lejtugajca choru por xi'ndu. ²⁹ Deen zadxin dxej guedu:
“Xechabaari bejngunaa di gojca nixhu xi'n, bejn di guxhucazi
xi'n, choru bejn di baxhia'cazi bindobezu.” ³⁰ Choru suloj gueri
bejn lojri dajn: “Gola xa'ta dunoj”, choru lojri loma guerma:
“Gola gucue'chi dunoj.” ³¹ Deen baali naj rinnerma zani bejn
dixe xdola, xepaza mazru güinnerma bejn ni xhu'u xdola.

³² Choru nee tio'pari bejn gubaan zinerma deen gucuarma
laarma loj curijzi con Jesús. ³³ Che bidxinrma lugari lada
la Calavera, nina bacarma Jesús loj curijzi con grojpari bejn
gubaan nina: Tijbima cua ladu xnejza, stijbima cua ladu
rubesa. ³⁴ Choru che cagucuaarma Jesús loj curijzi rema:

—Dada, been laarma perdón, deen diragabiaadigarma
ni rinrma.



Copyright © Global Recordings Network. Used with permission.

San Lucas 23:32-34

Choru gudxijtari soldado nina suerti deen yala'rma xabama.
³⁵ Bejn rga'a nina cagubiaarma, choru xta neri guxtisi rnieya laama rerma:

—Balaama bejn garenri, yan gulaaza xhijbigama baali gualima laama na Cristo Bejn gule Diosi.

³⁶ Neri soldado rnieya laama, choru ribigarma rudeerma laama vinagri deen xhia'man, ³⁷ choru rerma lojma:

—Baali lij na xreyri bejn Israel balaa xhijbigalu.

³⁸ Choru bacaarma letru niza xhijqui Jesús con diidxa griego, diidxa latín, choru diidxa hebreo ren: “BEJN YEE NAJCA XREYRI BEJN ISRAEL.”

³⁹ Tijbiri bejn gubaan ni ca loj curijzi nina guneyijdxama Jesús rema:

—Baalcaza lij na Cristo, balaa xhijbigajlu choru balaa ne dunoj.

⁴⁰ Peri stijbi bejn gubaan nina baxuu xcompanierama rema lojma:

—¿Stacazi di ridxebilu Diosi ya, maz lasa'gajca castiga nina cadedilu? ⁴¹ Dulaa rayalacazi xhididi castiga yee deen zani yadixa ni babieen. Peri bejn yee dixecazi ni mala guaxhinma.

⁴² Choru rema loj Jesús:

—Basaaladxi naj che ba canebiaalu.

⁴³ Choru re Jesús lojma:

—Naj rnin lojlu yandxegajca sunelu naj xanyabaa.

Rejti Jesús

⁴⁴ Che gola laidxej bacajy xhidibidoo yidxilij xta rajca choon guadxe. ⁴⁵ Bacajy loj gubidxa, choru ne lajdi ni nala len xhidoro'o Jerusalén goxaya'n gojcan tio'pala la'a. ⁴⁶ Choru guridxidiaj Jesús rema:

—Dada, ladxiyaalu rusa'n da espíritun.

Che guyaaloj rema zani, güijtima.

⁴⁷ Che guna soldado rnebiaari soldado ni gojca, ruza'tama Diosi zagadxe rema:

—Walican dixediga ni mala been bejn yee.

⁴⁸ Che guna grari bejn zua'a nina ni gojca reezi luxtoorma ziarma yela zua'a nayarma. ⁴⁹ Peri grari bejn nunbiaa Jesús, conri bejngunaa guzanala laama desde Galilea, ziftula guzujrma babiaarma gra ni gojca.



Copyright © Global Recordings Network. Used with permission.

San Lucas 23:50-56

Rigueechi Jesús

⁵⁰ Guxhu tijbi bejn breelaj José, gojcama bejn za'ca beenma zega rayala. Nazama yedxi la Arimatea tijbi xyedxi Judea. Gojcama tijbiri xguxtisiri bejn Israel. ⁵¹ Nema rbejza xyelarnebia Diosi, choru di nedigama bachaaga xgabari bejn bagüijti Jesús. ⁵² Biajma loj Pilato biganabama xcuerpa Jesús. ⁵³ Che guloxa balejtama xcuerpa Jesús loj curijzi nina, bati'pima laama tijbi lajdi za'ca, choru bigaque'chima laama len tijbi baa ni bideen len xhiaj lada dichucazi babigue'chi. ⁵⁴ Dxej nina rinrma previnidu gra ni rayala güinrma para dxej ni raziladxiri bejn. Yamera suloj dxej nina che bigaque'chirma Jesús. ⁵⁵ Choru bejngunaa guzanala Jesús desde Galilea, nerma binala José gunarma xbaa Jesús, choru xena gudijxarma xcuerpama. ⁵⁶ Che babil'i lidxirma, beencheerma perfume choru zaj riliaa nejxi, choru baziladxirma dxej raziladxiri bejn zega re loj ley.

Raban Jesús

24 Che dumingu razilidoo, biajri bejngunaa nina rua'a xbaa Jesús, binerma perfume ni bencheerma. ² Che bidixinrma, gunarma xhiaj ni biegu rua'a baa nina diru nuseegudigan laan. ³ Choru guxhurma peri diruxediga xcuerpa Jesús naga'a nina. ⁴ La'ti di ridxela xe güinrma coma xegaruca

xcuerpa Jesús, dxe calacazi gogaxe tio'pari bejn nixhio cue'rma najcurma lajdi rliabacha'a.⁵ Choru yela tantu bidxebirma basajba lojrma xta luxhuj peri rerि bejn nina lojrma:

— ¿Yexaza raxhiilidu tijbi bejn ni nabán lojri bejn güijti?

⁶ Diruchudiga laama yee, bababanma. Gola yazaaladxi ni nama lojdu che zua'nema lejtu niza Galilea,⁷ nama lojdu laama Bejn guxa'la Diosi zinrma laama ntrega lojri bejn dola,deen gucuaarma laama loj curijzi, choru che yayon dxej yabanma.⁸ Choru bazaaladxirma diidxa ni re Jesús lojrma.

⁹ Che bazarma rua'a baa nina, bigayerma diidxa loj chiibitibiri xapostol Jesús, choru loj demazri bejn, gra ni gunarma.

¹⁰ María Magdalena con Juana, con María xna Jacob conri bejngunaa garen, laarma bigaye diidxa lojri xapostol Jesús.

¹¹ Peri laarma di bililadxidigarma ni reri bejngunaa nina lojrma, naladxirma xhijquirma rajca yela rerma zani.¹² Peri Pedro laa baxiinticazima bigabiaama len baa nina, choru che babiaama lenin, gunama ganaxazi lajdi bidi'pi Jesús naga'a nina, choru ziama radxiadoxa lojma por ni gojca.

Ruliloj Jesús loj tio'pari xbejnma

¹³ Dxej nina gajca, ze tio'pari xbejn Jesús tijbi yedxi la Emaús, raya'nin zega chibitibi "kilómetro" xta Jerusalén.

¹⁴ Xhu'rma tijbinezza caxhirma diidxa xcuenta grari ni gojca.¹⁵ La'ti caxhirma diidxa gubiga Jesús cue'rma, choru cazarema laarma.¹⁶ Peri mazi cagubiaarma laama, xhu'u ni badxoon naxhinbiaarma laama.¹⁷ Choru gunabadixa Jesús lojrma rema:

—¿Xe diidxa ridu xhu'du nejza? ¿Yexa zua'a nayadu?

¹⁸ Tijbirma, bejn la Cleófas, rema lojma:

—Graracaziri bejn ragabiaa ni gojca Jerusalén lenri dxej yee. ¿Laa tijbizi lij ni guzu Jerusalén di gogabiaa ni gojca nina ya?

¹⁹ Choru rema lojrma:

—¿Xe gojca?

Retirma:

—Ni bennerma Jesús bejn Nazaret, bejn bate Xtiidxa Diosi lojri bejn, gojpama yelarnebiaa loj ni benma choru lojri diidxa ni gunema niza loj Diosi choru niza lojri bejn.



Copyright © Global Recordings Network. Used with permission.

San Lucas 24:13-35

²⁰ Beenri bixioza rnebiari bixioza conri guxtisi laama ntrega deen guejtimá, choru bacaarma laama loj curijzi. ²¹ Para dunoj laama niajca bejn nulaa bejn Israelri, peri yan bagojca choon dxej gojcari nine. ²² Mazi tio'bachoonri bejngunaa no'cha dulojnu babachejbirma dunoj, deen biajrma bigabiaarma razilidoo rua'a baa nina, ²³ choru yela dixediga xcuerpa Jesús gunarma naga'a nina, babil'rma ziarma rirma diidxa balilojri ángel nina lojrma, rerma lojrma naban Jesús. ²⁴ La biajgajcari tioobachoonri duxcompanieranu rua'a baa nina choru gunarma zegapaca reri bejngunaa nina peri di gunadigarma Jesús.

²⁵ Choru re Jesús lojrma:

—¡Xepaza nadaxhijquidu, rzaganacuandu xhiliiladxidu gra ni gunéri bejn bate Xtiidxa Diosi lojri bejn! ²⁶ ¿Di rayaladi zagadiaj Cristo grari ni ze'e choru yaye'pima xanyabaa ya?

²⁷ Choru guzloj rema lojrma ni ren gue ni ca loj Xtiidxa Diosi xcuentama, guzlojma conri xlibru Moisés choru binuama con grari libru ni bacaari bejn bate Xtiidxa Diosi lojri bejn.

²⁸ Che ba bidxinrma yedxi lada zerma, been Jesús zega bejn chia mazru ziju. ²⁹ Peri laarma beenrma lafuerzi Jesús deen yaya'nneña laarma, rerma lojma:

—Baya'nnee dunoj, deen bagudxee yana, to ba cuajy.

Choru guxhu Jesús bayá'nnema laarma.³⁰ Choru che zojbanerma laama rua'a mexa, cua'ma yedaxtili, badeema quixti loj Diosi, gula'man choru badeeman lojrma.³¹ Lugora nina gajca guzajcarma zega bejn baxala loj, choru baxhinbiaarma laama, peri la banidilojgajcama.³² Choru re loj lasa'rma:

—¡Ze'tiguaza güendoxa biza'ca len du luxtoo, che choganene laama tijbinejza, che nama duloj ni ren gue ni ca loj Xtiidxa Diosi!

³³ Choru la babi'gajcarma ziarma Jerusalén lada nuchaga lasa'a chiibitibiri xbejn Jesús con demazri xcompanierarma.

³⁴ Choru rerma loj grojpari bejn badxin nina:

—Gualican bababan Jesús, babalilojma loj Simón.

³⁵ Choru bisa grojpari bejn nina diidxa ni guzajcarma che zerma tijbi nejza, choru xena baxhinbiaarma Jesús dxe gula'ma yedaxtili.

Ruliiloj Jesús lojri xbejnma

³⁶ La'ti caxhirma diidxa xcuentari nine, che baliloj Jesús galairma, rema:

—Diosi yabe'quichee luxtoodu.

³⁷ Badxiadoxa lojrma, choru bidxebirma deen naladxirma tijbi espíritu cagubiaarma.³⁸ Peri re Jesús lojrma:

— ¿Yexaza ridxebidu? ¿Yexaza di rliiladxitu najn?³⁹ Gola gubiaa yan con xhia'n. Naj gajcan. Gola guqui'i naj, gola gubiaa naj deen tijbi espíritu di najcadian zega naj, dixedia beela nega chijta xhu'n.

⁴⁰ Che rema zani balii yaama con xhia'ma.⁴¹ Peri laarma stacazi di rliiladxirma yela tantu rabaarma choru yela tantu radxia lojrma, choru re Jesús lojrma:

— ¿La di xe rajpadu gaun?

⁴² Choru baderma tibilia'a bejla biye'e choru chin.⁴³ Choru cua'man gudauman niza lojrma.⁴⁴ Choru rema lojrma:

—Che la zua'nezin lejtu, rnin lojdu rayala gaza'can zega ca lojri xlibru Moisés, loj xlibruri bejn bate Xtiidxa Diosi lojri bejn, choru lojri Salmos, lada ruza'tan naj.

⁴⁵ Choru guxalamama xquelarienrma deen gagania'rma ni ca loj Xtiidxa Diosi.⁴⁶ Choru re Jesús lojrma:

—Loj Xtiidxa Diosi re zagadiaj Cristo choru guejtima choru che yayon dxej yabanma.⁴⁷ Choru desde Jerusalén suloj xhire'cha Xtiidxama xta xhdibi yidxilij, guen lojrma xhu'u perdón para grari bejn guza'n xdola, choru xhiliiladxirma laama.⁴⁸ Lejtu na testigu xcuenta grari ni nine.⁴⁹ Choru naj gaxalan para lejtu ni bana da dadan, peri gola zujtizi yedxi Jerusalén xta xhca'du yelarnebiaa ni xhi'ta xanyabaa.

Re'pi Jesús xanyabaa

⁵⁰ Choru biriane Jesús laarma yedxi Jerusalén binema laarma gaxa yedxi Betania, choru gulejsa gropaladu yaama badeema diidxa za'ca laarma.⁵¹ La'ti cagudeema diidxa za'ca laarma guyajsama yaa ziama xanyabaa.⁵² Che guyaalj bazuj xibirma lojma, rabaadoxarma babi'rma ziarma Jerusalén.⁵³ Choru guixe guixe xhu'rma len xhidoro'o Jerusalén ruzajtarma Diosi zagadxe.